

Siunnersuummut nassuiaatit

Nassuiaatit nalinginnaasut

1. Aallaqqaasiut

1.1. Siunnersuummut tunngaviusut pingaarnerit

Inatsisartut inatsisissaattut siunnersuutip matuma, piginneqatigiilluni inissiat pillugit Inatsisartut peqqussutaat nr. 2, 16. maj 2008-meersoq, taarserpaa.

Innuttaasut imminnut inissamik pilersorsinnaanissamut periarfissaqarnerannik nukittorsaanis-saq Naalakkersuisut siunnerfigaat. Naalakkersuisut isumaqarput piginneqatigiilluni inissiat pillugit nutaamik Inatsisartut inatsisaannik suliaqarnissaq, siunnerfiup taassuma siuarsarne-qarnissaanut alloriarneq pingaaruteqartoq. Inunnut illoqarfinni nunaqarfinnilu minnerusu-niittunut tamatuma ajornannginnerulersinnissaanut, piginneqatigiilluni inissiaatillit peqatigiif-fianni inissiat najugaqarfigineqartussat pingasuusinnaalissapput, tassani siusinnerusukku inissiat najugaqarfigineqartussat minnerpaamik sisamaasussaagaluarlutik.

Siunnersuutigineqarpoq nutaanik piginneqatigiilluni inissialiornissamut pisortat taarsigassar-siarititaat, siunissami kommuninit taamaallaat isumagineqassasut. Piginneqatigiilluni nutaa-nik inissialiornissamut aningaasalersuinissamut, kommuninit taarsigassarsiarititanut killissali-ussani allanngortitsisoqarpoq, taamaalillunilu illuliat nutaat nunami sumiiffinni annertuneru-sumik siammartinniarnearlutik.

1.2. Inatsisinik piareersaanermi malitassat pingaarnerit

Ineqarnermut suliaqarfinni iluarsaaqqinnermik suliaqarnermut arlalinnut, ilanngullugulu ineqarnermut suliaqarfinni suliaqarfinni tunniussinissamut, ilaatillugu, piginneqatigiilluni inissiat pillugit Inatsisartut peqqussutaata iluarsaannissaa, Naalakkersuisut pisariaqartippaat. Siunnersuut illoqarfinnut nunaqarfinnullu ataasiakkaanut assigiinngisitaartunik taarsigassarsi-titsilluni, piginneqatigiilluni inissianik nutaanik sanaartornissamut taarsigassarsititsisinnaanis-samik periarfissiivoq. Inissianik aningaasalersuineq pillugu Inatsisartut inatsisissaattut siun-nersuummut ataqatigiissillugu isigineqassaaq.

2. Siunnersuummi immikkoortut pingaarnerit

a) Inatsisit atuuttut

Piginneqatigiilluni inissiat maannamut, piginneqatigiilluni inissiat pillugit Inatsisartut peqqus-sutaani, kiisalu Namminersornerullutik Oqartussat kommunillu inissiaataasa attartortittakkat teknikikkut aningaasatigullu nalilivigineqartarnerat pillugu Namminersornerullutik Oqartussat nalunaarutaani, maleruagassaqartinneqarput.

b) Siunnersuut

Siunnersuummi maleruagassat arlallit piginneqatigiilluni inissiat pillugit peqqussut naaper-torlugu atuuttut, ingerlateqqinneqarput. Tassunga tunngatillugu, piginneqatigiilluni inissiatillit peqatigiiffinik minnerusunik pilersitsinissamut kiisalu assigiinngisitaartunik taarsigassarsiaritanut killiliisoqarneratigut, illoqarfinni minnerusuni nunaqarfinnilu iluaqu-siisussanik, siunnersuummi periarfissiinermi, aallussisoqarpoq.

2.1 Peqatigiiffiit minnerusut

§ 1, imm. 2-imi siunnersuutigineqarpoq piginneqatigiilluni inissiatillit peqatigiiffiat inissia-nik najugaqarfigineqartussanik pingasunik inissartaqarsinnaasoq. Inatsisartut peqqussutaanni atuuttumi piumasaqaatini minnerpaaffiliunneqarpoq inissiat najugaqarfigineqartussat sisa-maapput. Siunnersuummut tunngaviuvoq, pingaartumik illoqarfinni minnerusuni nunaqarfin-nilu piginneqatigiilluni inissiatillit peqatigiiffiannik pilersitsinissap ajornannginnerulersinnis-saa.

2.2 Nunami sumiiffinni siaruarsimaneq

Piginneqatigiilluni inissianik sanaartornissamut imaluunniit pisinissamut taarsigassarsiarititit killissaannik nunami sumiiffinni agguluinermi siunnersuutigineqartumi, maannakkut aningaa-saqarnikkut inissisimaneq aammalu niuerfimmi atugassarititaasut tunngavigalugit aningaasa-lersuineramik angusaqarnissamut periarfissat, aallaavigineqarput. Illoqarfinni imaluunniit nu-naqarfinni ataasiakkaani aningaasaqarnikkut pisut allanngorneranni, piginneqatigiilluni inis-siatillit peqatigiiffiitut taarsigassarsiarititanik agguluinerup taamatullu atorunnaarsitsiartu-aartarnerup isumaliutersuutigeqqinneqarnissat pissutissaqalersinnaavoq.

2.3 Taarsigassarsiarititit assigiinngisitaartunik killissalerneqartut

Nutaanik inissialiornissamut taarsigassarsiarititit annertussusissaannut killissaliussat nunami sumiiffinni aggulunneqarnissaanni siunnersuutigineqartumi, maannakkut aningaasaqarnermi pisut aammalu niuerfimmi atugassarititaasut tunngavigalugit aningaasalersuutissarsinissamut periarfissat, aallaavigineqarput. Illoqarfinni imaluunniit nunaqarfinni ataasiakkaani aningaasa-qarnermi pisut allanngorneranni, nutaanik inissialiornissamut taarsigassarsiarititit annikilli-artorteqqinnissaasa taamatullu atorunnaarsikkiartuaarneqarnissaasa isumaliutersuutigeqqin-nissaanut pissutissaqalersinnaavoq.

2.4 Pisortat inissiaataannik attartortittakkanik tiguisarneq

Siunnersuummi attartortut kommunimi inissiamik attartukkamik piginneqatigiilluni inissiatut tiguisinnaaneranut periarfissaannik ingerlatitseqqiineruvoq.

Siunnersuutigineqarpoq attartortut attartukkamik piginneqatigiilluni inissiatut tigusinnaanut kommunalbestyrelsimut qinnutigisinnaagaat. Siusinnerusukkat maleruagassat malillugit pi-sortat inissiaataasa attartortittakkap piginneqatigiilluni inissiatut tiguneqarnissaannut inatsim-mi piumasaqaateqanngilaq. Kommunalbestyrelsip siunissami pisortat inissianik pilersuiner-mut akisussaasuusussaananerit, pingaartinneqarpoq. Taamaattumik kommunalbestyrelsi

inissianik pilersuinnermut pilersaarusiorsinnaassaaq, aammalu pisortat inissiaataasa attartortittakkat tuninissaannut pisussaaffeqassanani.

Siunnersuutigineqarpoq pisortanit inissianik attartukkap piginneqatigiilluni inissiatut tiguneqarnissaanik qinnuteqarneq inissiaateqarfimmi tamarmi attartortut 75 %-nik akuerineqassasoq piumasarineqarpoq. Pingaaruteqartutut isigineqarpoq piginnittunngornissamik qinnuteqaat illuummit pinngormat taamaalilluni suliassamut pisussaaffinnullu piginnittunngornermi malitseqartunut naammattumik tapersersuisoqarnissaa. Inatsisit maanna atuuttut naapertorlugit attartortut 55 %-iisa akuersinissaat piunasaqaataavoq.

2.5 Sanatitsisup namminersortup sanatitsisuulluni, piginneqatigiilluni inissiatillit peqatigiiffiannut tunniunneqartussanik inissialianik nutaanik sanaartornera

Siunnersuummi § 24 naapertorlugu sanatitsisoq namminersortoq piginneqataassutinik inuttanngitsunik kommunalbestyrelsimut neqerooruteqassaaq imaluunniit nammineerluni piginneqataassutissanik inuttanngitsunik piginneqataalernissamut pisussaaffeqarpoq. Aalajangersakkami pinngitsoortinneqassaaq piginneqatigiilluni inissiat piginneqatigiilluni inissiat inuttanngitsoortinneqarnissaat.

3. Pisortanut aningaasaqarnikkut allaffissornikkullu sunniutaasussat

Siunnersuummi matumani Namminersorlutik Oqartussanut ingerlaannaq sipaaruteqartitsinisaq siunertarineqanngilaq. Aningaasat maannamut Namminersorlutik Oqartussat maannamut aaqqissuussap ataani nutaanik piginneqatigiilluni inissialiornissamut taarsigassarsiarititassatut immikkoortinneqartut, suliap pissusissamisoornerani 2018-imut Aningaasanut inatsimmi ingerlateqqinneqassanngillat.

Kommuninut suliassanik tunniussinnermut atatillugu kommuninut ataatsimoortumik tapiissutit qaffatsinneqassapput. Taamaalilluni piginneqatigiilluni inissianut nutaanut aningaasalersuissamut taarsigassarsititsinnermut atatillugu allaffissornermut aningaasalersuinnermullu akisussaaffik kommuninut tunniunneqassaaq.

Siunnersuutip malitsigisaanik nutaanik piginneqatigiilluni inissialiornissamut aningaasalersuutissatut taarsigassarsiaritit annertussusaat, nunami sumiiffinni assigiinngitsuussapput.

Piffissaq ungasinnerusoq eqqarsaatigalugu taarsigassarsiat ernialersugaanatillu taarsersugassanngitsut ukiunut 30-nut killeqalernerani pisortat aningaasaqarniarnerannut sunniutissai piffissaq qaninnerusoq eqqarsaatigalugu annertunersusumik atuiffiunissaa nalilerneqarpoq, piffissarli ungasinnerusoq eqqarsaatigalugu sunniuteqannginnissaa nalilerneqarluni taarsigassarsiat akilerarneqalernissai pissutigalugit.

Kommunit tamaasa ataatsimut isigalugit siunnersuut tunngaviatigut aningaasaqarnikkut sunniuteqassanngilaq. Kommunit nutaanik piginneqatigiilluni inissialiornissamut aningaasalersuutissanik, kommunip missingersuutaanni aningaasassanik, immikkoortitsissapput. Taamaaqataanik kommunit kisimiillutik ineqarnermut suliaasaqarfimmi sanaartornermut pisortanit tapiissutinik pingaarnersiuneq siunissami isumagisarissavaat.

Kommunit maannamut pisartutut nutaanik piginneqatigiilluni inissialiornissamut aningaasalersuutissanik taarsigassarsiarititassanik qinnuteqaatinik suliaasanik suliarinnittassapput.

Namminersorlutik Oqartussat nutaanik piginneqatigiilluni inissialiornissamut aningaasalersuutissanik taarsigassarsititsinissaq pillugu sulianik nutaanik suliaqartartussaassanngillat.

4. Inuusutissarsiortunut aningaasaqarnikkut allaffissornikkullu sunniutaasussat

Nutaanik piginneqatigiilluni inissialiornissamut aningaasalersuutissanik taarsigassarsititsiner-
mut killiliussat allangortinneqarneranni, illoqarfinni nunaqarfinnilu arlalinni nutaanik piginneqatigiilluni inissianik sanaartorerulersitsinissaq, siunertaavoq.

Aningaasalersuinerup allangortinneqarnera taanna piffissami ikaarsaarfiusumi Nuummi illu-
liortiternermut pingaaruteqassasoq ilimanarpoq. Taamaattoq Grønlandsbanken aamma
BankNordik naliliipput, Nuummi taarsigassarsititsisarnermut atugassarititaasuni siunnersuuti-
gineqartuni tassani, Nuummi nutaanik piginneqatigiilluni inissialiornissamut realkredittimit
aningaasalersuutissarsisoqarsinnaanera, ingerlaannassasoq. Grønlandsbanken aamma
BankNordik naliliipput, aamma piginneqataasut ataasiakkaat qaammatikkaartumik akiliutis-
saasa annikitsumik qaffatsinneqarneranni, Nuummi nutaanik piginneqatigiilluni inissialiornis-
samut tunngavissaqaannassasoq.

5. Avatangiisinut, pinngortitamut inuillu peqqissusaannut sunniutaasussat

Pingaarnertigut isigalugu siunnersuut avatangiisinut, pinngortitamut aamma inuit peqqissu-
saannut sunniuteqassanngitsoq naatsorsuutigineqarpoq.

Nutaanik piginneqatigiilluni inissialiornermut aningaasalersuutissanik taarsigassarsiarititassa-
nut killiliussat allangortinneqarneranni, illoqarfinni nunaqarfinnilu arlalinni nutaanik inissia-
liortarnerup annertunerulersinnissaa, siunertaavoq.

Illoqarfinni nunaqarfinnilu arlalinnik piginneqatigiilluni inissialiortarneq annertusippat, ine-
qarnermut tunngasut pitsaanerulersinnaassapput, tamatumalu malitsigisaanik inuit peqqissu-
saat pitsaanerulissalluni.

Najukkani aammalu piffissami sanaartorfiusumi avatangiisinut pinngortitamullu sunniuteqarsinnaassaaq. Kisiannili sanaartorneq pilersaarusiortarnermut inatsisip maannakkut atuuttup killissaasa iluanni ingerlanneqartussaavoq.

Piginneqatigiilluni inissiat nutaat illoqarfiup nunaqarfiullu iluanni aammalu innaallagiamut, imermut kuuffeqarfinnullu pisariaqartunut atassusiligaallutik, sananeqartassapput.

6. Innuttaasunut sunniutaasussat

Nutaanik inissialiorterup aningaasalersorneqarnissaanut taarsigassarsiarititassanut killiliussat allanngortinneqarneranni, illoqarfinni nunaqarfinnilu arlalinni nutaanik inissialiortarnerup anertusitinneqarnissaa, peqatigisaanillu Nuummi inissialiorterup aningaasalersuisarnerup nalinginnaasunnngortinneqarnissaa, siunertaavoq.

Nuummi innuttaasunut inissiamik nutaatut sananeqartumik pisinissamik kissaateqartunut, siunnersuut qanoq pisoqaraluarpalluunniit aningaasalersuinerup aningaasartuutit qaffannerannik, kinguneqassaaq. Kisianni inissianik niuerfimmi suliaqartuusut qanoq aningaasalersuinissamut periarfissanut allannguteqartunut naleqqussassanersut, sioqqutsisumik aalajangerneqarsinnaanngilaq.

Innuttaasunut Nuup avataani najugaqartunut, inissiamik nutaatut sananeqartumik pisinissamik kissaateqartunut, siunnersuut qanoq pisoqaraluarpalluunniit aningaasalersuinerup aningaasartuutit annikillinerannik, kinguneqassaaq. Aamma tassani inissianik niuerfimmi suliaqartuusut qanoq aningaasalersuinissamut periarfissanut allannguteqartunut naleqqussassanersut, sioqqutsisumik aalajangerneqarsinnaanngilaq.

7. Sunniutaasussat annertuut allat

Naliliisoqarpoq siunnersuut annertuunik allanik sunniuteqassanngitsoq.

8. Oqartussanik kattuffinnillu il.il. tusarniaaneq

Siunnersuut ulloq 11. maj 2017 uani www.naalackersuisut.gl tusarniaanermut nittartakkami tamanut saqqummersinneqarpoq ulloq 14. juni 2017 tusarniaanermut killiliunneqarluni.

Siunnersuut piffissami 10. maj – 14. juni 2017 tusarniaaffigineqartuni makkunani tusarniaassutigineqarpoq:

Naalackersuisut Siulittaasuata Naalackersuisoqarfia
Pinngortitamut Avatangiisinullu Naalackersuisoqarfik
Aningaasaqarnermut Akileraartarnermullu Naalackersuisoqarfik
Aatsitassanut Ikummatissanullu Naalackersuisoqarfik

Aalisarnermut Piniarnermullu Naalakkersuisoqarfik
Inuussutissarsiornermut, Suliffeqarnermut, Niuernermut, Nukissiuuteqarnermullu
Naalakkersuisoqarfik
Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut
Naalakkersuisoqarfik
Peqqissutsimut Nunat Avannarliit Suleqatigiinnerannullu Naalakkersuisoqarfik
Ilinniartitaanermut, Kultureqarnermut, Ilisimatusarnermut, Ilageeqarnermullu
Naalakkersuisoqarfik
Namminiilivinnermut, Nunanut Allanut Nunalerinnermullu Naalakkersuisoqarfik
A/S Inissiaatileqatigiiffik INI
Iserit A/S
Agerskov Consulting ApS
KANUKOKA
Qaasuitsup Kommunia
Qeqqata Kommunia
Kommuneqarfik Sermersooq
Kommune Kujalleq
KANUNUPE
SIK (Sulinermik Inuussutissarsiuteqartut Kattuffiat)
Sulisitsisut (GE)
Peqqinnissaq Pillugu Kattuffiit (PPK)
Nunatsinni Perorsaasut Kattuffiat (NPK)
Atorfillit Kattuffiat (AK)
IMAK (Ilinniartitsisut Meeqqat Atuarfianeersut Kattuffiat)
Kalaallit Nunaanni ilinniagartuut Kattuffiat (ASG)
Mittarfeqarfiit A/S
Nukissiorfiit A/S
Asiaq
Kalaallit Nunaanni Rigsombudsmandi
Kalaallit Nunaanni Politimestereqarfik
Nunatta Eqqartuussivia
LM Ejendomme
Lynges.gl
Ejendomskontoret
DanskeBank
GrønlandsBanken
BankNordik
BRFKredit
Nykredit
Finanstilsynet

Tusarniaaffigineqartut makkua siunnersuummut oqaaseqaatissaqaratik nalunaarput:

Kalaallit Nunaanni Politimestereqarfik

Asiaq – Kalaallit Nunaanni misissueqqaartarfik

Nukissiorfiit

Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoqarfik

Aalisarnermut Piniarnermullu Naalakkersuisoqarfik

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfik

Aningaasaqarnermut nakkutilliisut

Aatsitassanut Ikummatissanullu Naalakkersuisoqarfik

Tusarniaaffigineqartut makkua siunnersuummut oqaaseqaateqarput:

SIK

IMAK

Aningaasaqarnermut Akileraartarnermullu Naalakkersuisoqarfik

Kommuneqarfik Sermersooq

GrønlandsBanken

KANUKOKA

SIK-p siunnersuut taperserpaa, ilanngullugu kommunit inissiaataat attartortittakkat piginneqatigiilluni inissiatut tiguneqassappata, illuummi attartortut tamarmiusut tiguneqarneranni 75 %-it tapersiinnissaat pisariaqartoq aammalu nunami sumiiffinni taarsigassarsiarititanut killiliussat assigiinngisitaartinneqarnerat.

IMAK-ip siunnersuut neriulluarnartutut isigaa, tassami piginneqataasut amerlassusissaannut minnerpaaffissat maannakkut 3-inut ikilisinneqarnerat pissutigalugu aammalu sumiiffinni realkredit-imit taarsigassarsisoqarsinnaanngiffiusuni imaluunniit taarsigassarsinissap ajornakusoortorujussuusinnaaffiini pisortanit taarsigassarsinissamut annertunerusunik periarfissiisoqarnera pissutigalugu, Nuup avataani amerlanerusut piginneqatigiilluni inissianik sanaartornissamut periarfissat maannakkut pitsaanerulissammata.

Tusarniaanermut piffissaliussap naanerani tusarniaaffigineqartunit makkunanga akissuteqaat tiguneqarpoq, tusarniaanermut akissuteqaatinut oqaaseqaatit uingasumik allanneqarput:

Aningaasaqarnermut Akileraartarnermullu Naalakkersuisoqarfik siunnersuummut nassuiaatinut aaqqissuussinermut oqaaseqaateqarpoq. Taakkua ilanngunneqarput.

Taakkua saniatigut Aningaasaqarnermut Akileraartarnermullu Naalakkersuisoqarfiup piffissaq ungasinnerusoq eqqarsaatigalugu taarsigassarsiat ernialersugaanatillu taarsersugassaanngitsut ukiunut 30-nut killeqalernerani pisortat aningaasaqarniarnerannut aningaasaqarnikkut sunniutaasussat ataani nassuiarneqarnissaa amigaatigaa.

Akissut

Aningaasaqarnikkut sunniutaasussat ataanni oqaaseqaatinik ilanngussisoqarpoq.

Kommuneqarfik Sermersooq

Piginneqatigiilluni inissiatillit peqatigiiffiannut tunniussinissaq siunertaralugu nutaanik inissialiornissamut kommunit periarfissaqarnerat pillugu maannakkut maleruagassat Kommuneqarfik Sermersuup maqaasivai, ilanngullugu piginneqatigiilluni inissiatillit peqatigiiffiat kommuni kisimi piginneqataasuulluni (takuuk § 29-ip oqaasertalerneqarnera maannakkut atuuttoq). Periarfissaq taanna kommunip innuttaasut piginneqatigiilluni inissiamik pisinisaannut tunngavissiiniarneranni ikiuunniarnerannilu imaluunniit kingusinnerusukku piginneqataalernissaq siunertaralugu aallaqqaammut attartortuunissaanut, kommunimut naleqquttorujussuuvoq. Taamaattumik piffissaq attartorfiusoq piffissatigut killilersorneqartariaqanngikkaluarpoq (takukkit § 29-imi kingulliutillugit oqaasertalernera kiisalu § 65 maannakkut atuuttut).

Ineqarnermut akitsuummik aamma ineqarnermut akiliummik akiliisarnermut tunngatillugu, peqatigiiffiup kommuni piginneqataasutut ineqarnermut akitsuummik akiliisissavaa, kommunip inissiaq, inissianik attartortitsisarneq pillugu Inatsisartut peqqussutaanni namminersortut attartortitsisarnerat pillugu maleruagassat maannakkut atuuttut malillugit, attartortissallugu, taamaattoq tassani ineqarnermut akitsuut 15 %-init annertunerusumik qaangerneqarsinnaanani (takuuk § 24, imm. 2-ip oqaasertalerneqarnera maannakkut atuuttoq).

Siunnersuummi § 24, imm. 2-imut imatut nipilimmik allangortitsinissaq siunnersuutigineqarpoq:

”Imm. 2. Inissiat sanatitsisumit namminersortumit sananeqartut piginneqatigiilluni inissiatillit peqatigiiffianni ilaasortanit amerlaneruppata, sanatitsisup kommuni piginneqataassutisani inuttaqanngitsuni piginneqataalernissamik neqeroorfigissavaa. Kommunalbestyrelsi piginneqataalinngippat, sanatitsisoq piginneqataassutissanik inuttaqanngitsunik piginneqataalissaaq.”

Siunnersuummi § 24, imm. 3 naapertorlugu sanatitsisup namminersortup inissiat piffissami killiligaasumi aammalu siunnersuummut naapertuuttumik ineqarnermut akiliuteqartitsilluni allamut attartortissavai, kommunip inissianik attartortitsisarneq pillugu Inatsisartut peqqussutaanni namminersortut attartortitsisarnerat pillugu maleruagassat sukulluunniit atuuttut malillugit aammalu piffissami killiligaanngitsumi, inissiaq attartortissallugu.

Akissut

Kommuneqarfik Sermersuup tusarniaanermut akissuteqaataa, siunnersuummi § 24-26 allanngortinnissaannut aammalu kapitali 5-ip nutaap ilanngunneqarnissaanut, pissutis-saqalersitsivoq.

Peqqussummut atuuttumut sanilliullugu ilanngussaq 1 Piginneqatigiilluni inissiatillit peqatigiiffiannut malittarisassat nalinginnaasut aamma ilanngussaq 2 Aserfallatsaaliuineranut innersuussutit, maqaasineqarput.

Akissut.

Piginneqatigiilluni inissiat pillugit Inatsisartut peqqussutaanni killissaliussat iluanni, piginneqatigiilluni inissiatillit peqatigiiffiat malittarisassat ilusilersorneqarnerat pillugu aalajangersakkanik aalajangersaasinnaavoq. Taamaattoq Naalakkersuisut siunnersuummi § 53, imm. 4 naapertorlugu malittarisassat nalinginnaasut pisussaaffiusut pillugit maleruagassanik aalajangersaasinnaapput.

Piginneqatigiilluni inissiat pillugit Inatsisartut peqqussutaat atuuttumi, ilanngussaq 2 Aserfallatsaaliuineranut innersuussutit, illup iluani aserfallatsaaliuineranut tunngassuteqarpoq. Aserfallatsaaliuineranut innersuussutit pingaarnernut aammalu ilitsersuissutit iluseqarput aammalu maleruagassanut pisussaaffiliinngitsunut tunngassuteqarlutik.

Grønlandsbanken

Grønlandsbanken tusarniaanermut akissuteqaateqarpoq. Siunnersuummut oqaaseqaatit eqikkarlugit issuarneqarput.

Grønlandsbanken isumaqarpoq [aningaasartuutinit tapersiivigineqarsinnaatitaasut] 50 %-iinik taarsigassarsiaritit killissalerneqarnerat minnerpaamik Nuummi atuutsiinnarneqassasoq. Aningaaserivik naliliivoq Nuummi inoqutigiit amerlasuut, aningaasarsianit isertit naapertuuttut aningaasarsiarineqartaraluartut, nammineq pigisamik inissiamik pisinissamut aningaasaqarnikkut akissaqassanngitsut.

Akissut.

Siunnersuutip kingunerisaanik 2018-imi piginneqatigiilluni inissiamut Nuummi sananeqartumut taarsigassarsiaritit annerpaaffissaat kr. 1.050.500-iniit kr. 990.000-inut allanngortinneqarpoq. Tamanna kr. 60.500,00-inik appartitsineruvoq, taakkua piginneqatigiilluni inissiatillit peqatigiiffiata ukiut 30-it angullugit nalinginnaasumik aningaasalersortussaassallugit. Tamanna tunngavigalugu naliliisoqarpoq aningaasartuutit tapersiivigineqarsinnaatitaasut 50 %-inik taarsigassarsiarititanut killissaliussat qaffanneqarnissaannut pissutissaqanngitsaq. Tamanna aammattaaq Nuummi aningaasanik taarsigassarsinermi isumaqatigiittoqarnerani nalinginnaasumik pilersinneqarnissaa politikkikkut kissaatigineqarnera isigineqassaaq.

Grønlandsbanken-ip siunnersuutigaa, kommuninut suliaassanik tunniussinermi kommuninut ataatsimoortumik tapiissutit pillugit aammalu suliaasaqarfimmi aningaasassat maannamut Namminersorlutik Oqartussanit atorineqartartut, kommuninut ingerlateqqinneqartarnissaat pillugu siunnersuummut nassuiaatit nalinginnaasut erseqqissarneqassasut.

Akissut.

Siunnersuummi matumani Namminersorlutik Oqartussanut ingerlaannaq sipaaruteqartitsinisaq siunertaanngilaq. Kommuninut suliaassanik tunniussinermut atatillugu, kommuninut ataatsimoortumik tapiissutit qaffatsinneqassapput. Suliaasaqarfimmi aningaasassat Namminersorlutik Oqartussanit maannamut atorineqartartut agguarneqarnerat, Namminersorlutik Oqartussat aamma KANUKOKA-p aamma Kommuneqarfik Sermersuup akornanni isumaqatigiissuteqarneq tunngavigalugu pissaaq.

Grønlandsbanken siusinnerusukkut inatsimmut allannguutissanut tunngatillugu akuersaartumik oqaaseqarpoq. Aningaaseriviup piginneqataasut qaammammut ineqarnermut akitsuutip qaffatsinneqarnissaanut tunngatillugu erseqqissarpaa ”annikitsumik qaffaaneq” annertuumik sunniuteqassanngitsoq aammalu tasaanani ”aalajangersimasumik qaffaaneq”.

Akissut.

Siunnersuummut nassuiaatit allanngortinneqarput.

Grønlandsbanken allappoq, taarsigassarsianit ernialersugaanatillu taarsersugassaanngitsunit, taarsigassarsianut ukiut 45-it ingerlaneranni taarsersugassanut ikaarsaarneq, piginneqataassutitut akigititanut sunniuteqassasooq naatsorsuutigineqartariaqartoq. Grønlandsbanken allappoq, tamanna siunnersuummut nassuiaatini sammineqanngitsoq.

Akissut.

Piginneqataassutitut naatsorsuinerit annerpaaffissaat siunnersuummi § 67-imi maleruagassiivigineqarpoq. Piginneqatigiilluni inissiatillit peqatigiiffianik pilersitsinermi aamma piginneqatigiilluni inissialiornissaq pillugu aalajangiinermi, piginneqataasut ineqarnermut akitsuummumut aningaasartuutissanik naatsorsuutigineqarsinnaasunik aamma piginneqataassutitut akigititanik, paasitinneqassapput. Piginneqataasut akigititaq annerpaaq § 67 malillugu naatsorsorneqartoq pissarsiarisinnaaneraat, neqeroorutit ujartuinerlu apeqqutaassapput.

Pitsaassutsit qulakkeerneqarnerannut uppernarsaammik aammalu sanaartornerup nalaani nakkutilliineq imaluunniit piffissakkaartumik aserfallatsaaliuinissamut pilersaarutigineqartunut pilersaarut pillugit immikkut piumasaqaateqarnermut Grønlandsbanken paasinnippoq, kisianni pisariaqartinneqanngitsoq isumaqarluni, takukkit siunnersuummi §§ 15, imm. 1, 18, imm. 2 aamma § 28, imm. 2. Grønlandsbanken isumaqarpoq tamanna illuliortiternernut taarsigassarsivigineqartunut tamanut atuuttoq taamaalillunilu atorunnaartariaqaraluartoq.

Akissut.

Piomasagaatit illuliortiternernut taarsigassarsivigineqartunut tamaginnut atuuttut Namminersorlutik Oqartussat isumaqatigaat. Namminersorlutik Oqartussat misilittagaat malillugit, pingaartumik piginneqatigiilluni inissialiornernut pitsaassutsinik isumannaarinissamut aammalu sanaartornerup nalaani tamatumalu kingorna aserfallatsaaliuinnermut nakkutilliinissamut piomasagaateqartoqartariaqarpoq.

Grønlandsbanken isumaqarpoq, piginneqataassutini ataasiakkaani qularnaveeqqusiussaqlarluni taarsigassarsisinnaaneq annertuumik pitsanngorsaanerussinnaassasoq. Tamatuma piginneqataasunut ataasiakkaanut taarsigassarsititsinissaq ajornannginnerulersissinnaassavaa aammalu piginneqataassutit tuniuminarnerulersissinnaassallugit.

Akissut.

Pigineqataassutini ataasiakkaani qularnaveeqqusiussilluni taarsigassarsisinnaanermik aaq-qissuussisoqarsinnaassanersoq, isumaliutersuutigineqarsimavoq. Naliliisoqarpoq maannak-korpiaq pigineqataassutini ataasiakkaani qularnaveeqqusiussilluni taarsigassarsinissaq ammaanqarsinnaanngitsoq imaluunniit ammaanqassanngitsoq.

Pigineqataassutip tunineqarnerani ilanngaaseereernermi tunisinermi iluanaarutini nuussisoqarnissaanik nalunaarutiginnittoqarsinnaanera allannguuteqanngilaq, takuuk siunnersuummi § 52, imm. 4. Aammattaaq ilanngaaseereernermi tunisinermi iluanaarutini akiliisitsisoqarsinnaavoq.

Naliliisoqarpoq pigineqataassutini ataasiakkaani qularnaveeqqusiussilluni taarsigassarsiat nalunaarsorneqartarnerannut aaqqissuussamik pilersitsinissamut inatsisit malillugit suliatigullu killissaliinissap pisariaqartup pilersinnissaa, aammalu kingusinnerusukkut pigineqataassutit aammalu atuisinnaatitaaffiit inissiamut atasut pinngitsaaliissummik piviusunngortinissaat, naalagaaffimmi oqartussat akuliutsinnagit pisinnaanngitsoq.

Pigineqataassutini ataasiakkaani qularnaveeqqusiussilluni taarsigassarsinermi, qularnaveeqqusiussivigineqartoq pigineqataassutip pinngitsaaliissummik tunineqarnissaanik piomasagaarsinnaatitaassanersoq, taamaalillunilu pisisup inissiamut atuisinnaatitaalluni pigineqatigiilluni inissiatillit peqatigiiffianni ilaasortaalernissaa pillugu apeqqut tunngavioq qaqqinneqassaaq. Tamanna pigineqataasut allat, pigineqatigiilluni inissiatillit peqatigiiffianni kina ilaasortaallissanersoq, sunniuteqarsinnaajunnaarsitsissaaq.

Grønlandbanken-ip tikkuarppaa, neriorsuutip inaarutaasup inissinnissaa sioqqullugu sanaartornerup aallartinneqarneranik kinguneqartumik, pisortat suliasamik suliarinninneranni kukkusortillugu aamma/imaluunniit suliarinninnerup arriippallaarnerani periaasissamut nassuiaammik siunnersuummi § 12-imut nassuiaatit imaqarsinnaagaluartut. Aningaaserivik allappoq ajornartorsiut akulikitsumik pisanngitsoq, kisianni pigineqataasunut ataasiakkaanut annertuumik pingaaruteqarsinnaasoq.

Akissut.

Sanaartornissamut isumaqatigiissutinik pisussaaffiliisunik isumaqatigiissuteqartoqaqqusaanngitsoq aammalu taarsigassarsiarititassanik neriorsuutip akuerineqarnissaa sioqqullugu sanaartormermik suliaqarnerit aallartinneqassanngitsut, maannakkut piginneqatigiilluni inissianut peqqussut aammalu siunnersuummi § 12 malillugit saneqqunneqarsinnaanngitsumik piumasasaataavoq.

Piumasasaat malinneqarsimangippat, periaasissamik nassuiaanissamut pissutissaqanngilaq. Taamaattoqarsimappat taarsigassarsiarititassanut neriorsuut tunniunneqarsinnaanngilaq.

Grønlandsbanken allappoq inatsisissatut siunnersuummi paarlaassinermut taarsigassarsiarititassat pillugu § 84, maleruagassanut maannakkut atuuttunut sanilliullugu sukannernerulersit-sinermik kinguneqassasoq. Siunnersuummi paarlaassinermut taarsigassarsiarititassanut piffissaq ernialersuiffiunanilu akilersuiffiusussaannngitsoq ukiunit 15-init ukiunut 10-inut sivikilineqarpoq. Aningaaserivik allappoq tamanna piginneqatigiilluni inissianit inissianut nammineq pigisanut allanngortitsinerup ikinnerulernerannik kinguneqassasoq naatsorsuutigineqartariaqartoq.

Akissut.

Maleruagassat atuuttut malillugit piginneqatigiilluni inissiatillit peqatigiiffiunut piffissami paarlaassiffiusumi annerpaamik ukiunik 15-inik pisoqaassusilinnut, piffissami ukiuni 15-ini ernialersugassaanatillu akilersugassaanngitsunik paarlaassinermut taarsigassarsititsisoqarsinnaavoq. Piginneqatigiilluni inissiatillit peqatigiiffiunut piffissami paarlaassiffiusumi ukiunit 15-init pisoqaanerusunut piffissami ukiuni 10-ini ernialersugassaanatillu taarsersugassaanngitsunik paarlaassinermut taarsigassarsititsisoqarsinnaavoq.

Naliliisoqarpoq piffissap ernialersuiffiunanilu akilersuiffiusussaannngitsup ukiunik 5-inik sivi-killisinneqarnera, piginneqatigiilluni inissiat inissianut nammineq pigisanut allanngortinneqarnissaat pillugu, piginneqataasut aalajangiinerannut aalajangiisuusumik sunniuteqassanngitsoq. Aalajangiineq, sunniuteqarnerulernissaq pillugu, minnerunngitsumillu inissiat nammineq pigisat ataasiakkaarlugit taarsigassarsivigineqarnissaannut periarfissaqarnissamik kissaateqarnerup, inernerissagaa ilimanaateqarpoq.

Grønlandsbanken allappoq, ulloq 1. januar 2018 sioqqullugu taarsigassarsititsinissamik neriorsuut suli akiliivigineqarsimangitsoq, nutaamik qinnuteqarfigineqassanersoq, siunnersuummi § 90 aamma § 91 nalornilersitsisinnaasut.

Akissut.

Taarsigassarsititsinissamik neriorsuut ulloq 1. januar 2018 sioqqullugu nalunaarutigineqarsimappat aammalu taarsigassarsiarititassat suli tunniunneqarsimangippata, qinnuteqaqqit-toqassanngilaq.

Taarsigassarsititsinissamik neriorsuuteqartoqarniariarnerani Namminersorlutik Oqartussat aningaasassat Sanaartornissamut Iluarsaassinissamullu aningaasaateqarfimmut illuartittarpai. Neriorsuut ulloq 1. januar 2018 sioqqullugu nalunaarutigineqartoq tunngavigalugu taarsigassarsiarititassat tunniunneqarnissaannut aningaasassat, taamaalilluni Sanaartornissamut Iluarsaassinissamullu aningaasaateqarfimmiittarput aammalu Namminersorlutik Oqartussanit tunniunneqartarlutik.

Piginneqatigiilluni inissiaatillit peqatigiiffiata maannakkut maleruagassat malillugit taarsigassarsititsinissamik neriorsuummik tigusaqarsimasup, 1. januar 2018 aallarnerfigalugu maleruagassat nutaat malillugit taarsigassarsititsinissamik neriorsuummik qinnuteqarnissaq toqqarsinnaavaat.

KANUKOKA

Nunatsinni peqatigiiffik pingaarnertigut naliliivoq, kommuninut aningaasaqarnikkut sunniutaasussat inatsisissatut siunnersuummi naammanngitsorujussuarmik nassuiarneqartut.

Tassani kommunit suliasamik taarsigassarsititsinissamut tunngasumik ”tigusinerannut” qanoq iliorluni aningaasaqarnikkut taarsiivigineqarnissaat qulakkeerneqarsinnaanersoq, ersaripasinngilaq. Tamanna paasinarsisinneqartariaqarpoq aammalu ataatsimoortumik tapiissutit isumaqatiginninniutigineqarnerannut atatillugu oqallisigineqaqqissaartariaqarluni.

Oqaatigineqassaaq, ataatsimoortumik tapiissutit inatsimmi (aningaasanut inatsit) aalajangersaavigineqarmata, aammalu kommunit isumaqatigiissuteqarnissamut pisussaaffeqanngimmata. Taamaattumik kommunit nutaamik aaqqissuussinermik allaffissornikkut aqutsinerannut aningaasartuutaasa matussuserneqartarnerannut tunngaviusunik toqqaannartumik aalajangersaaviusumik, immikkut inatsimmi maleruagassaqarnissaq, isumaliutersuutigineqartariaqarpoq.

Siunnersuut ataatsimut isigalugu kommuninut aningaasartuuteqarfiussanngitsoq pingaarnertigut oqaatigineqarnera, akuersaarneqarsinnaanngilaq, aammalu kommuninit allanit taarserneqartussanik, Kommunip ataatsip sipaaruteqarfigalugu, aningaasartuutit agguarneqarnerannut ilusiliaq, KANUKOKA-p akuersaarsinnaassanngilaa.

Akissut

Maleruagassat maannakkut atuuttut malillugit 20/20/60 atorlugu taarsigassarsititsinissaq pillugu qinnuteqaatinut atatillugu suliasanik suliarinnittarneq kommuninit isumagineqarpoq. Tamanna aamma siunissami kommunini pisassaaq, taamaattoq taarsigassarsiarititassat tamarmiusut isummerfigineqartassallutik, tassani Namminersorlutik Oqartussat siusinnerusukut pisortanit taarsigassarsiarititassat affai pillugit qinnuteqaatinik suliarinnittarsimalluni.

Aningaasat maannamut suliassaqarfimmi Namminersorlutik Oqartussanit atorneqartartut agguarneqarnerat, Namminersorlutik Oqartussat aamma KANUKOKA-p aammalu Kommuneqarfik Sermersuup akornanni isumaqatigiissuteqarneq tunngavigalugu pissaaq.

Ataatsimoortumik tapiissutit aqutigalugit imaluunniit utertitsilluni akiliinikkut taarsiisarnisaq pillugu inatsimmi maleruagassanik ilanngussisoqanngilaq.

Tusarniaanermut piffissaliussap naareernerata kingorna Sulisitsisunit tusarniaanermut akissuteqaat alla tiguneqarpoq. Tusarniaanermut akissuteqaat ilanngunneqanngilaq, kisianni nalilisoqarpoq tamanna missingiummi allanngortitsinissamut pissutissaqalersitsisimassanngikkaluartoq.

Siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Siunnersuut, piginneqatigiilluni inissiaatillit peqatigiiffiunut piginneqatigiilluni inissianik, piginneqatigiilluni inissiaatillit ilaasortaannut atugassanik pigisaqarnissamik siunertaqartunut, atuuppoq. Piginneqatigiilluni inissiaatillit peqatigiiffiat assersuutigalugu inissianik allanut attartortitsinissamik siunertaqarluni inissianik pisisinnaangilaq.

Imm. 2-imut

Aalajangersakkami piginneqatigiilluni inissiaatillit peqatigiiffianni inissiat ikinnerpaaffissaat aalajangersarneqarpoq. Tassalu piginneqatigiilluni inissiaatillit peqatigiiffiat ataaseq ikinnerpaamik pingasunik inissiaartaqartussaavoq. Piginneqatigiilluni inissiaatillit peqatigiiffiat nammineerluni inissialioraluarpat, inissianik nutaanik pisigaluarpat, inissiat sanatitsisumit namminersortumit sananeqarsimagaluarpata imaluunniit pisortat inissiaataat attartortittakkat pioreersut piginneqatigiilluni inissiaatitut tiguneqaraluarpata piumasaqaat taanna atuutissaaq.

Imm. 3-imut

Aalajangersakkami piginneqatigiilluni inissiaatillit peqatigiiffiisa illuliaannut, illutut quleriaatut imaluunniit uiguleriaatut sananeqartussanut piumasaqaatit aalajangersarneqarput. Tamatuma saniatigut piginneqatigiilluni inissiat ataasiakkaat namminerisaminnik isaariaqarnissaat, igaffeqarnissaat igasarfeqarnissaalluunniit kiisalu uffarfeqarnissaat perusersartarfeqarnissaallu piumasaqaatigineqarpoq. Piginneqatigiilluni inissiaatillit peqatigiiffiata illunik ataqatigiissitanik, uiguleriaarlugit taamatullu quleriaarlugit sananissaa aalajangersakkami ajornartinneqanngilaq, tassanili sanaartukkat pissusissamisoorumik ataatsimoortutut ilusiligaanissaat kisimi piumasarineqarpoq.

Imm. 4-imut

Piginneqatigiilluni inissiat illutut ilaqutariinnut ataatsinut inissiatut imaluunniit illutut affarle-riittut sananeqarnissaat tiguneqarnissaalluunniit, kommunalbestyrelsip pisuni immikkut ittuni akuerisinnaavaa. Immikkut ittumik akuersissuteqarsinnaanerup assersuutigalugu illunut eqimattanut, pissusissamisoorumik ataatsimoortutut iluseqalersillugit sananeqarsinnaasunut nunaminertanik tunniussisoqarsinnaatillugu atorneqartarnissaa eqqarsaatigineqarpoq.

§ 2-imut

Siunnersuut ataatsimut isigalugu piumasaqaatit naammassineqarpata atuuttussatut eqqarsaatigineqarpoq, taamaalillunilu peqatigiiffiup ingerlanneqarnera il.il. pillugu piginneqatigiilluni inissiaatillit peqatigiiffii pisussaaffilerneqarsinnaanatik. Siunnersuutip atuutilernerani assersuutigalugu aningaaserivik imaluunniit kommunalbestyrelsi piginneqatigiilluni inissiaatillit

peqatigiiffiata siulersuisuini ilaasortaanissamik piunasaqarsinnaanerat, imaluunniit aningaaseriviup imaluunniit kommunalbestyrelsip allaffissornermik aqutsisartumik ingerlatseqatigiiffimmik immikkuullarissumik atuinissamik piunasaqarsinnaanerat, inerteqqutigineqarput.

Kapitali 2-mut

Kapitali 2-imi kommunalbestyrelsit nutaanik inissialiornep aningaasalersornissaanut taarsigassarsititsisarnissaa maleruagassinneqarpoq. Kapitali 2-imi aalajangersakkat taamaaqataanik sanatitsisumut namminersortumut, piginneqatigiilluni inissianik sanaartortumut aammalu piginneqatigiilluni inissiatillit peqatigiiffiannut tunniussisussamut kiisalu piginneqatigiilluni inissiatillit peqatigiiffiata kommunip inissiaataannik attartortittakkanik tigusineranut, taarsigassarsititsinermi, atuutissapput.

Piginneqatigiilluni inissianik sananissamut imaluunniit pisinissamut taarsigassarsiarititassanut killiliussat nunami sumiiffinnut aggulunneqarnissaanni siunnersuutigineqartumi, maannakkut aningaasaqarnikkut pisut aammalu niuerfimmi atugassarititaasut tunngavigalugit aningaasalersuutissanik pissarsinissamut periarfissat, aallaavigineqarput. Illoqarfinni imaluunniit nunaqarfinni ataasiakkaani aningaasaqarnikkut pisut allangorneranni, piginneqatigiilluni inissiatillit peqatigiiffiinnut taarsigassarsiaritit atuggulunneqartarnerisa taamatullu annikillisikkiartuaarneqartarnerisa atorunnaarsikkiartuaarneqartarnerisalu isumaliutersuutigeqqinneqarnissaa pissutissaqalersinnaavoq.

§ 3-mut

Imm. 1-imut

Siunnersuummi nutaanik piginneqatigiilluni inissialiornep aningaasalersornissaanut kommunalbestyrelsip taarsigassarsititsisarnissaa inatsimmi tunngavissalernerqarpoq aammalu taarsigassarsiarititassanut killissaliussat. §§ 4-7-imi maleruagassinneqartut innersuussutigineqarput. Maleruagassanut atuuttunut sanilliullugu, maannakkut kommunalbestyrelsi kisimi piginneqatigiilluni inissiatillit peqatigiiffiinnut taarsigassarsititsisinnaavoq.

Nutaanik inissialiornissamut aningaasartuutit tamarmiusut, kommunalbestyrelsip taarsigassarsiarititassaannik naatsorsuinnermut tunngavissaliisussat, siunnersuummi § 9-imi erseqqinnerusumik maleruagassinneqarput.

Imm. 2-mut aamma 3-mut

Siunnersuummi annertussusissaq taarsigassarsivigineqarsinnaasoq aammalu nutaanik piginneqatigiilluni inissialiornep aningaasartuutit taarsigassarsivigineqarsinnaasut, killilerneqarput. Inissiap angissusaa annerpaamik taarsigassarsivigineqarsinnaasoq, piginneqatigiilluni inissiaq anginerugaluarpuunniit 110 m²-iuvoq. Nutaanik piginneqatigiilluni inissialiornep aningaasartuutit annerpaamik taarsigassarsivigineqarsinnaasut, sanaartornermut aningaasartuutit annertunerugaluarpuunniit, m²-imut kr. 20.000-iupput.

M²-imut aningaasartuutitut annerpaamik taarsigassarsivigineqarsinnaasunut killiliussaq kr. 19.100-imiit kr. 20.000-imut qaffanneqarpoq. Naliliisoqarpoq nutaanik inissialiornissamut aningaasartuutit tamarmiusut, agguaqatigiissillugu m²-imut kr. 20.000-inik annertussuseqartut.

Kommunalbestyrelsi aningaasartuutit taarsigassarsivigineqarsinnaasunik naatsorsuinermini, annerpamik taarsigassarsiarititassanik tunniussisassasoq, inatsimmi piumasaqaataannngilaq. Kommunalbestyrelsi nalinginnaasumik allaffissornikkut suleriaatsiminut ilaatillugu annikillisanik tunngaveqartumik taarsigassarsititsiniarluni aalajangersinnaavoq. Kommunalbestyrelsi assersuutigalugu aalajangersinnaavoq, inissiap angissusaa annerpaamik taarsigassarsivigineqarsinnaasooq, inissiaq anginerugaluarpalluunniit 100 m²-isut annertussuseqassasoq. Kommunalbestyrelsi assersuutigalugu aalajangersinnaavoq, nutaanik innissialiornissamut aningaasartuutit annerpaamik taarsigassarsivigineqarsinnaasut, sanaartornermut aningaasartuutit anner-tunerugaluarpataluunniit, m²-imut kr. 18.000-inik annertussuseqassasut.

Nutaanik inissialiornissamut aningaasartuutiviusut tamarmiusut, kommunalbestyrelsip taarsigassarsiarititassaannik naatsorsuinermut tunngavissaliisussat, siunnersuummi § 9, imm. 2-imi erseqqinnerusumik maleruagassiivigineqarput. Inissiap annertussusaanik naatsorsuisarneq siunnersuummi § 8-imi erseqqinnerusumik maleruagassiivigineqarpoq.

Imm. 4-mut

Pisortanit taarsigassarsiarititassat akuerineqarnissaannut piginneqataasut ataasiakkaat nammineerlutik sanaartornermut aningaasartuutit tamakkisut 5 %-iinik aningaasanngorlugit aallaqqaatissatut akiliisinaanissaa piumasarineqarpoq. Piginneqataasup assersuutigalugu aningaasaliissutissat 5 %-ii aningaasanngorlugit akiligassani aningaaserivimmit taarsigassarsinermigut akilersinnaavai.

5 %-it nammineq aallarniutissatut akiliutissat, sanaartornermut aningaasartuutit tamarmiusut imaluunniit § 51, imm. 2 naapertorlugu inissiamut atuisinnaatitaaffiusumut naligitinneqartoq naleqqussagaq tunngavigalugit naatsorsorneqassapput. Piginneqatigiilluni inissiaatillit peqatigiiffiat piginneqataasutit nalinginik naleqqussaasimannngippat, inissiallu angeqqatigiippata nammineerluni aallaqqaatissatut akiliutissaq piginneqataasunut tamanut assigiimmik annertussuseqassaaq. Kisiannili naleqqussaasoqarsimappat, nammineerluni aallaqqaatissatut akiliutissat annertussusaat assigiissannngillat.

Matuma kinguliani assersuut tamatumunnga takussutissiivoq:

Piginneqataasut 1 = inissiamut naligititaasoq 1,2.

Piginneqataasut 2 = inissiamut naligititaasoq 0,8.

Sanaartornermut aningaasartuutit m²-imut = 17.500 koruunit.

Piginneqataasummut 1-imut m²-imut nammineerluni aallaqqaatissatut akiliutissat 5 %-iusut = (17.500x1,2x0,05= 1.050 koruunit).

Piginneqataassummut 2-mut m²-imut nammineerluni aallaqqaatissatut akiliutissat 5 %-iusut = (17.500x0,8x0,05=700 koruunit).

Imm. 5-mut

Piginneqatigiilluni inissiatillit peqatigiiffiata aningaasalersuutissat sinneri pissarsiarissavai. Piginneqatigiilluni inissiatillit peqatigiiffiat nalinginnaasumik realkredit-imi taarsigassarsis-saaq immaqa aningaaserivimmit taarsigassarsianit tapertaqartinneqartumik.

§ 4-mut

Nuummi kommunalbestyrelsi nutaanik piginneqatigiilluni inissialiornissamut aningaasartuutit tamarmiusut 45 %-ii tikillugit aammalu siunnersuummi § 3, imm. 1- 2-imi killissaliussat ilu-anni, taarsigassarsititsisinnaavoq. Tamanna isumaqarpoq Nuummi piginneqatigiilluni inissia-mut ataatsimut kr. 990.000-inik taarsigassarsititsisoqarsinnaasoq.

Aningaasartuutit taarsigassarsivigineqarsinnaasut 45 %-ii tikillugit kommunalbestyrelsimit taarsigassarsititsisoqassasoq, inatsimmi piumasaqaataanngilaq. Kommunip politikikkut pi-ngaarnersiuneranut aamma allaffissornikkut nalinginnaasumik suleriaatsiminut ilaatillugu sanaartornissamut aningaasartuutit taarsigassarsivigineqarsinnaasut annikinnerusumik procentilerlugu taarsigassarsititsisarnissaq aalajangiussinnaavaa.

§ 5-imut

Qaqortumi, Sisimiuni, Aasianni aamma Ilulissani kommunalbestyrelsi nutaanik piginneqati-giilluni inissialiornissamut aningaasartuutit tamarmiusut 55 %-ii tikillugit aammalu siunners-uummi § 3, imm. 1- 2-imi killissaliussat iluanni, taarsigassarsititsisinnaavoq. Tamatuma ki-ngunerisaanik Qaqortumi, Sisimiuni, Aasianni aamma Ilulissani piginneqatigiilluni inissiamut ataatsimut annerpaamik kr. 1.210.000-inik taarsigassarsititsisoqarsinnaavoq.

Aningaasartuutit taarsigassarsivigineqarsinnaasut 55 %-ii tikillugit kommunalbestyrelsimit taarsigassarsinissaq inatsimmi piumasaqaataanngilaq. Kommunilbestyrelsip politikikkut pingaarnersiuneranut aamma allaffissornikkut nalinginnaasumik suleriaatsiminut ilaatillugu sanaartornissamut aningaasartuutit taarsigassarsivigineqarsinnaasut annikinnerusumik pro-centilerlugu taarsigassarsititsisarnissaq aalajangiussinnaavaa.

§ 6-imut

Maniitsumi aamma Tasiilami kommunalbestyrelsi nutaanik piginneqatigiilluni inissialiornis-samut aningaasartuutit tamarmiusut 60 %-ii tikillugit aammalu siunnersuummi § 3, imm. 1- 2-imi killissaliussat iluanni, taarsigassarsititsisinnaavoq. Tamatuma kingunerisaanik Maniitsumi aamma Tasiilami piginneqatigiilluni inissiamut ataatsimut annerpaamik kr. 1.320.000-inik taarsigassarsititsisoqarsinnaavoq.

Aningaasartuutit taarsigassarsivigineqarsinnaasut 60 %-ii tikillugit kommunalbestyrelsimit taarsigassarsinissaq inatsimmi piumasaqaataangilaq. Kommunalbestyrelsip politikikkut pingaarnersiuineranut aamma allaffissornikkut nalinginnaasumik suleriaatsiminut ilaatillugu sanaartornissamut aningaasartuutit taarsigassarsivigineqarsinnaasut annikinnerusumik procentilerlugu taarsigassarsititsisarnissaq aalajangiussinnaavaa.

§ 7-imut

Illoqarfinni nunaqarfinnilu allani kommunalbestyrelsi nutaanik piginneqatigiilluni inissialior-nissamut aningaasartuutit tamarmiusut 65 %-ii tikillugit aammalu siunnersuummi § 3, imm. 1- 2-imi killissaliussat iluanni, taarsigassarsititsisinnaavoq. Tamatuma kingunerisaanik illo-qarfinni nunaqarfinnilu allani piginneqatigiilluni inissiamut ataatsimut annerpaamik kr. 1.430.000-inik taarsigassarsititsisoqarsinnaavoq.

Aningaasartuutit taarsigassarsivigineqarsinnaasut 65 %-ii tikillugit kommunalbestyrelsimit taarsigassarsinissaq inatsimmi piumasaqaataangilaq. Kommunalbestyrelsip politikikkut pingaarnersiuineranut aamma allaffissornikkut nalinginnaasumik suleriaatsiminut ilaatillugu sanaartornissamut aningaasartuutit taarsigassarsivigineqarsinnaasut annikinnerusumik procentilerlugu taarsigassarsititsisarnissaq aalajangiussinnaavaa.

§ 8-mut

Imm. 1-imut

Inissiap annertussusaa ataatsimut katillugu qanoq naatsorsorneqassanersoq, aalajangersakka-mi aalajangersarneqarpoq. Suliffeqarfik namminersortoq assersuutigalugu ilaqtariinnut arla-linnut illuummik, arfinilinnik inissiartaqartumik, sanaartornissamut taarsigassarsinissamik qinnuteqarpat, inissiat pingasut 100 m²-inik aammalu inissiat pingasut 140 m²-inik annertus-suseqarlutik, pisortat taarsigassarsiarititassaat inissianut ataasiakkaanut tamarmik immikkut naatsorsorneqassapput.

Toqqorsiveqarfiup, biilnut inissiiviup, salliarnartap imaluunniit biilnut qulisaliap najugaqar-fissatut oqorsarneqarnissaa teknikkikkut ajornarsimangippat, kisianni nunaminertamik atu-gassiisoqarsimanginnera imaluunniit pissutsit pilersaarusiornermut inatsimmut akerliusut kisimik pissutaappata, toqqorsiveqarfik, biilnut inissiivik, salliarnartaq imaluunniit biilnut qulisaliaq najugaqarfissamut ilanngunneqassanngillat, tassami najugaqarfissamut taamatut ilanngussineq nunaminertanut pilersaarusiornermullu inatsimmut akerliussammaat.

Imm. 2-mut

Inissiap annertussusaa naqqup ataanut, quleriiaani nalinginnaasumiittumut aamma qalianut tunngatillugu qanoq naatsorsorneqartarneranut teknikkikkut sukumiisortai aalajangersakkap imarai.

Imm. 3-mut

Aalajangersakkap atuunnerani naqqup ataa aamma qalia, aatsaat quleriiaani taakkua najuga-qarfissatut ilaappata ilanngunneqassapput. Naliliinermi ilanngunneqarsinnaavoq ini najuga-qarfissatut suliarineqarsimanersoq, oqorsaasersorneqarsimanersoq, igalaat naqqillu ikkunneqarsimanersut allalluunniit.

Imm. 4-mut

“Aalaakkaasumik nateqanngitsoq” paasineqassaaq tassaasoq inissiami sumiiffik natermut taarsiullugu putoqartoq. Assersuutigalugu inissiaq aaqqissuussaasinnaavoq quleriinni ini aammalu qaliaqarluni. Qaliani inimi teqeqqoq, ungaluusamik sinaakkuteqarluni, nateqarani aaqqissugaasinnaavoq, taamaalilluni tassanngaanniit inimut ammut isigisoqarsinnaalluni. Teqeqqoq taanna aalaakkaasumik nateqanngilaq taamaattumillu, tassani tummeraqanngippat, inissiap angissusaani naatsorsuineri ilaatinneqassanani.

Imm. 5-imut

Ataatsimoorussamik torsuusaq isertarfik, majuartarfiit aamma majuartarfiit sangoriaat 11 m²-isut naatsorsuineri ilaatinneqassaaq, annertussutsip 110 m²-iusup annerpaamik taarsigassar-sivigineqarsinnaasup 10 %-iatut annertussuseqartumik. Inissiaq 110 m²-init angineruppat, ataatsimoorusaaq torsuusaq isertarfik, majuartarfiit aamma majuartarfiit sangoriaat sulii annerpaamik 11 m²-isut naatsorsuineri ilanngunneqarsinnaavoq.

§ 9-mut

Imm. 1-imut

Inissiap kvadratmeterimut akia, piginneqatigiilluni inissiamut ataatsimut katillugu sanaartornermut aningaasartuutit, ataatsimut katillugu inissiap angissusaanut agguarlugu, nanineqassaaq.

Piginneqatigiilluni inissiatillit peqatigiiffiisa ilaasa inissianik assigiinngitsumik angissusilikkanik sananissartik aalajangertarpaat. Assersuutigalugu inissiat 95 m²-inik angissusillit arfinillit aamma inissiat 120 m²-inik angissusillit sisamat, katillugit 1050 m²-iusut, aammalu katillugit 15.487.500 koruuninik akeqartut sananeqarpata, m²-imut akiusoq agguaqatigiissillugu $15.487.500 / 1050 = 14.750$ koruuniussaaq. Taanna malillugu piginneqatigiilluni inissiaq 95 m²-inik angissuseqartoq 1.401.250 koruuninik akeqassaaq, aammalu piginneqatigiilluni inissiaq 120 m²-iusoq 1.770.000 koruuninik akeqassalluni.

Assersuusiornermi piginneqataassutinut ataasiakkaanut naligititaasunik naleqqussaasoqarsimanersoq ilanngunneqanngilaq.

Imm. 2-imut

Allattukkat aalajangersakkami taagorneqartut ataaniipput assersuutigalugu taakkununga i-laassallutik sanaartornissap pilersaarusiorneqarneranut, sanasunut, sanaartornissamut taarsigassarsianut erniarititanut, sanaartorfissagissaanermut, attaviliinermut akitsuutinut, sanaartornermik aqutsinermut, teknikkikkut, aningaasaqarnikkut, inatsisilerituumik aammalu aningaasalersuinermi siunnersorteqarnermut, aqutsinermut, aningaasalersuinermi aningaasartuutitut, piginnittuunermut uppernarsaatip aamma qularnaveeqqusiussaqaarluni taarsigassarsinermi allagartat suliarineqarnerinut kiisalu naqissusiinermut akitsuutinut, qularnaveeqqusiussaqaarluni taarsigassarsititsinermut uppernarsaatip naqissuserneqarneranut nalunaarsorneqarneranullu aningaasartuutit, illuliornermik nakkutilliinermut aningaasartuutit aammalu aningaasartuutit allat tamarmik, illuliornermut attuumassuteqartut. Sanaartornermut aningaasartuutit attuumassuteqartut tamaasa naatsorsuinermi ilanngunneqarnissaat taarsigassarsisup akisussaaffigaa.

Aningaasartuutit illuliornermut naatsorsuutini ilaasut, illuliornermut nalinginnaasumik ilaatinneqartartunut tunngatinneqarsinnaanersut, kommunalbestyrelsi ataasiakkaatigut nalilersuisinnaavoq.

§ 10-mut

Imm. 1-imut

Kommunalbestyrelsip taarsigassarsiarititai piginneqatigiilluni inissiani qularnaveeqqusiussaqaarnikkut qularnaveeqquserneqassapput. Kommunalbestyrelsimut qularnaveeqqusiussaqaarluni taarsigassarsianut uppernarsaat, assersuutigalugu realkredit-imut aamma aningaaserivimmut qularnaveeqqusiussaqaarluni taarsigassarsianut uppernarsaatip, nutaanik piginneqatigiilluni inissialiornissamut aningaasartuutit tamarmiusut ilaasa sinneruttut aningaasalersornissaannut taarsigassarsititsinermut qularnaveeqqutitut tunniunneqartup, akilerneqareernerani akilerneqartussatut tunniunneqassaaq. Kommunalbestyrelsimut qularnaveeqqusiussaqaarluni taarsigassarsianut uppernarsaat Kalaallit Nunaanni Eqqartuussivimmi nalunaarsuinermi allattuiffimmi illuummut allatukkani nalunaarsorneqassaaq, Kommunalbestyrelsi taarsigassarsiarititanik tunniussinermut atugassarititaasussatut, qularnaveeqqusiussaqaarluni taarsigassarsinermut uppernarsaatip tassanilu atugassarititaasut ilusilersorneqarnerannut piumasaqaateqarsinnaavoq. Piginnittut nikinnerat, allatut pingaarnersiuermi tulleriinniliinissaaq, aamma akiligassanngortit-sisarneq pillugit qularnaveeqqusiussaqaarluni taarsigassarsianut uppernarsaammi aalajangersakkat ilanngunneqartarnerat nalinginnaasuuvoq.

Imm. 2-mut

Kommunalbestyrelsip taarsigassarsiarititai ukiut 30-it tikillugit ernialersugaanngitsutut taarsersugassaanngitsutullu tunniunneqassapput, ulloq atuilernissamik akuersissuteqarfiusoq aallarnerfigalugu naatsorsorneqartumik. Tamatuma kingorna taarsigassarsiarititat ukiut 15-it tikillugit piffissap ingerlanerani ernialersorneqartussaassapput akilersorneqartussaassallutillu. Taarsigassarsiarititat ataatsimut katillugu piffissaaq akilersorneqarfissaat taamaalilluni ukiut 45-it tikillugit sivilissuseqarpoq. Ukiuni 15-ini taarsigassarsiat akilersorneqarfissaanni, ernia-

liussiaq aalajangersimasuuvoq. Ernialiussiaq nationalbankip erniaritittagaanut qaavatigut 3 procentpoint-imik ilallugu piffissamut akilersuiffiusussamut tamarmut ukiut 30-it angullugit aalajangersarneqassaaq. Erniaritittagaq ullormi atuilernissamut akuersissuteqarfiusumi aalajangerneqassaaq.

Kommunalbestyrelsip taarsigassarsiarititaasa piffissaq akilersuiffissaq sivisunerpaaq atorlugu tunniunneqarnissaat, inatsisini piunasaqaataangilaq. Kommunalbestyrelsi suleriaatsiminut ilaatillugu piffissaq akilersuiffissaq sivikinnerutillugu taarsigassarsititsisinnaavoq. Piffissap akilersuiffiusussap sivikillisinnera, piffissamut ernialersuiffiusussaangitsumut akilersuiffiusussaangitsumullu taamatullu piffissamut akilersuiffiusussamut, agguarneqarsinnaavoq. Kommunalbestyrelsi assersuutigalugu ataatsimut katillugu ukiuni 35-ini akilersuiffissalerlugu taarsigassarsititsisinnaavoq, ukiuni 25-ini piffissamut ernialersuiffiusussaananilu akilersuiffiusussaangitsumut aammalu ukiuni 10-ini piffissamut akilersuiffiusussamut agguarsinnaallugu.

Imm. 3-mut

Naalackersuisut pisortat taarsigassarsiarititaasa akilersorneqartarnerat pillugu maleruagassanik aalajangersaanissaannut, aalajangersagaq inatsimmi tunngavissaavoq. Piffissamut akiitsut akuttoqqatigiimmik akilersorneqarfissaannut naatsorsuineranut aammalu taarsigassarsiaritit akilersorneqartarnerannut tunngatillugu suliaqarnermut tunngasunik maleruagassanik pisariartitsisoqartoq paasinarsissappat, piginnaatitsissut atorneqassasoq eqqarsaatigineqarpoq.

§ 11-imut

Imm. 1-imut

Qinnuteqaat kommunalbestyrelsimut nassiunneqassaaq. Qinnuteqaat aamma ilanngussat tasunga atasut allaganngorlugit nassiunneqassapput. Qinnuteqaat aamma fax-ikkut imaluunniit mail-itut uppersaartit scannerlugit nassiunneqarsinnaavoq. Allaganngorlugu tunniussinissamut piunasaqaammi, kommunalbestyrelsip paasissutissanik attuumassuteqartunik uppersaatinillu tigusinissaa qulakkeerneqassaaq.

Imm. 2-mut

Pilersaaruisiamut nassuiaat nalinginnaasumik piginneqatigiilluni inissiatillit peqatigiiffiata siunnersortaanit suliarineqartarpoq.

Sanaartornermi aningaasartuutissanut tamakkiisunut missingersuusiami, nalinginnaasumik sanaartornermi aningaasaqarnermut takussutissiat, entreprenørp sanasussap pigisai aallaavigineqartarput. Aamma kisitsisitigut takussutissiat taakkununnga assingusut eqqortullu allat missingersuusiornermut tunngavigineqarsinnaassapput.

Pigineqataasut namminneerlutik aningaasalersuutissaannut uppersaart amerlanertigut tassaarpoq pigineqataasup aningaaserivianit, pigineqataasup nammineerluni aningaasaler-

suutissaminik akiliisinnaaneranut uppernarsaat. Tamatuma saniatigut piginneqatigiilluni inissiatillit peqatigiiffiat allaniit aningaasersuutissanik siumoortumik akuersinissamik neriorsuummik peqartussaavoq, taannalu nalinginnaasumik piginneqatigiilluni inissiatillit peqatigiiffiata aningaaserivianit nalunaarutitut suliarineqartarpoq.

§ 12-imut

Imm. 1-imut

Qinnuteqaat kommunalbestyrelsip suliarinninneranut tunngavissaliissaaq. Qinnuteqaatip imarisai amigarpata, kommunalbestyrelsip qinnuteqartut uppernarsaatinik imaluunniit paasissutissanik ilassutaasussanik nassiussinissamik qinnuigissavaa. Qinnuteqaatip suliarinissaanut aalajangiiffiginissaanullu tunngavissat pisariaqartut pigineqanngippata, kommunalbestyrelsip qinnuteqaat itigartissinnaavaa.

Imm. 2-mut

Piginneqatigiilluni inissiatillit peqatigiiffiat, kommunalbestyrelsip taarsigassarsititsinissamik qinnuteqaammik suliarinninnissaa sioqqullugu, sanaartornissamut akigititassanut isumaqatigiissummik pituttuisumik isumaqatigiissuteqaqqusaangilaq. Aammattaaq illuliornermik sanaartornermillu suliaqarneq aallartinneqarsimassanani. Kisiannili piginneqatigiilluni inissiatillit peqatigiiffiata sanaartornissamut pilersaaruserneq aallartissimasinnaavaa, tassungalu aamma ilaavoq sanaartornerup pilersaaruserneqarneranut nassuiaat. Taamaattoq sanaartornissamut pilersaaruserneq kommunalbestyrelsimut taarsigassarsiarititassanik qinnuteqaammik suliaqarnissamut pisariaqartunut killeqartinneqassasoq, inassutigineqarpoq.

Piginneqatigiilluni inissiatillit peqatigiiffiat taarsigassarsinissaq pillugu qinnuteqaateqarnerup nalaani piginneqatigiilluni inissiatillit peqatigiiffiata illuliornerup tamarmi ingerlanneqarnerani soqutigisaannik isumaginninnissamut, illuliornermik ilisimasalimmik ikiortissarsisimassaaq. Illuliornermik ilisimasalik assersuutigalugu piginneqatigiilluni inissiatillit peqatigiiffiata nunaminertamik tunineqarnissamik qinnuteqaateqarneranut, sanaartugassamik pilersaaruserneranut, neqerooruteqartitsineranut, sanaartornermi akigititassanut isumaqatigiissuteqarneranut, sanaartornerup nalaani nakkutilliinermut, tunniussinermut kiisalu ukiup ataatsip aamma ukiut tallimat qaangiunneranni misissuinnermut aammalu amigaataasut iluarsineqarnissaannut malinnaaneranut, ikiutissaq.

Kiisalu sanaartornermi sanaartornermut pilersaarusernermullu inatsit, piffissami sanaartorfiusumi atuuttoq, malinneqassaaq. Piginneqatigiilluni inissiatillit peqatigiiffiata sanaartornerup sanaartornermut pilersaarusernermullu inatsit malillugu ingerlanersoq nakkutigissallugu suliarinnigilaa. Suliassaq taanna kommunalbestyrelsip taarsigassarsiarititassanik qinnuteqaammik suliarinninnerminnut atatillugu aammalu allatigut kommunip teknikkimut ingerlatsiviani sanaartornermut suliassanik suliarinninnermut nalinginnaasumut ilaatillugu, isumagissassaraa.

Imm. 3-mut

Pisortat namminersortullu aningaasaataat annertoorujussuit nutaanik piginneqatigiilluni inissialiormi aningaasaliissutigineqartarnissaat ilimanarpoq. Piginneqatigiilluni inissiaatillit peqatigiiffiat nalinginnaasoq piginneqatigiilluni inissianik amerlanerusunik sanaartornermi ilaanissamut teknikkikkut, aningaasaqarnikkut imaluunniit inatsisilerinikkut tunuliaqutaqanngilaq.

Illuliornermi ilisimasalimmik siunnersorteqarnermi, inuit naleqquttumik ilinniagaqarsimanermik tunuliaqutaqartut siunnersortiginissaat piunasaqaatigineqarpoq. Tamanna piginneqatigiilluni inissialiormerup sulianut tunngatillugu eqqortumik amigaateqanngitsumillu pinissaasa qulakkeernissaanut iluaqutaassaaq. Aammattaaq siunnersorteqarnissamut isumaqatigiissutit atu-gassarititaasut nalinginnaasut tunngavigalugit, ilanngullugulu piginneqatigiilluni inissialiormerup sanaartorneqarnerata nalaani nakkutilliinermik ilaqartillugu, isumaqatigiissutigineqartasasut, piunasaqaatigineqarpoq.

Siunnersorteqarnissamut isumaqatigiissut nalinginnaasutut isikkoqarnermaq aammalu sanaartornerup nalaani nakkutilliinermik ilaqarnermaq, kommunalbestyrelsip taarsigassarsinissamik qinnuteqaatip suliarineqarneranut atatillugu misissussavaa.

Imm. 4-mut

Naalakkersuisut piginneqatigiilluni inissiaatillit peqatigiiffiisa illuliornermik ilisimasaqartumik ikiortissarsisarnissaq tamatumalu annertussusissaa pillugit maleruagassanik aalajangersaanissamut piginnaatinneqarput. Maleruagassat piginneqatigiilluni inissialiormerup sulianut tunngatillugu eqqortumik amigaateqanngitsumillu pinissaasa qulakkeernissaanut iluaqutaassapput. Assersuutigalugu illuliornermik ilisimasaqartoq immikkut ilinniagaqarnikkut tunuliaqutaqassasoq aammalu imm. 3-imi allassimasut saniatigut sullississutinut nassuiaatinut piunasaqaatit pillugit maleruagassat aalajangersarneqarsinnaapput.

Imm. 5-imut

Piginneqatigiilluni inissialiornissamut taarsigassarsititsinermut atugassarititaasut, digitalimik illuliornermut suliamut aqutsissummik atuinissaq pillugu piunasaqaatit pillugit maleruagassanik aalajangersaanissamut Naalakkersuisut piginnaatinneqarput. Digitalimik suliamik aqutsineq illuliornerup pitsaanerusumik aqunneqarneranut iluaqutaassaaq aammalu illuliornerup immikkoortuini assigiinngitsuni uppersaasiisarnissaq qulakkeerneqassalluni.

§ 13-imut

Imm. 1-imut

Taarsigassarsititsinissamik neriorsuummi, taarsigassarsiassat annertussuserigallagassai aammalu atugassarititaasut allat taarsigassarsititsinissamik neriorsuummut atuuttut, allassimassapput. Taarsigassarsititsinissamik neriorsuut qinnuteqaatigineqartumut aalajangersimasumut aammalu illuliornermut akuerisaasumut, tunniunneqassaaq.

Imm. 2-mut

Aatsaat sanaartornermut naatsorsuutit inaarutaasut uppernarsarneqarsimasut pigineqalerpata, taarsigassarsiarititassat annertussusissaat inaarutaasumik naatsorsorneqarsinnaalissapput. Inuup allap attuumassuteqanngitsup sanaartornermut naatsorsuutinik, inaarutaasumik uppernarsarneqarsimasunik suliaqarnissaa atsiuinissaalu taarsigassarsisup akisussaaffigaa. Aningaasartuutit taarsigassarsivigineqarsinnaasut tamarmiusut pillugit siunnersuummi § 9, imm. 2 innersuussutigineqarpoq.

Imm. 3-mut

Illuliassamut qinnuteqaatigineqartumut aningaasartuutissanut missingersuutit sipporneqartut paasineqarpat, taarsigassarsisoq pissutissaqarani kinguarsaanertaqanngitsumik kommunalbestyrelsimut nalunaaruteqassaaq. Kommunalbestyrelsi missingersuutinut allannguuteqartunut qaffanneqartunullu isummernissamut piviusumik periarfissinneqassaaq.

Kommunalbestyrelsip taarsigassarsititsinissamik neriorsuutip qaffaaviginissaa itigartissinnaavaa aammalu assersuutigalugu illuliornissap allanngortinnissaanik taarsigassarsisoq kaammattorsinnaallugu. Kommunalbestyrelsip taarsigassarsititsinissamik neriorsuutip qaffaaviginissaa tamakkiisumik ilaannaasumilluunniit akuerisinnaavaa.

Taarsigassarsisoq pissutissaqarani kinguarsaanertaqanngitsumik kommunalbestyrelsimut nalunaaruteqanngippat, taarsigassarsiarititassat inaarutaasut taarsigassarsititsinissamik siullermersuumik neriorsuummit annertunerusinnaanngillat.

Aningaasartuutinut missingersuutit sipporneqarnissaat naatsorsuutigineqartariaqartoq, taarsigassarsisumut paasinarsinerata kingorna sapaatit akunnerisa 2-4 iluanni, taarsigassarsisoq nalinginnaasumik kommunalbestyrelsimut nalunaaruteqartariaqarpoq.

Suliaqarnermi illuliornermik ilisimasalik siunnersortaasoq, missingersuutinik malinnaanissap pisariaqartup ingerlannissaanut aammalu piginneqatigiilluni inissiatillit peqatigiiffiata sippunerusinnaasut pillugit kommunalbestyrelsimut nalunaarutiginninnissaata qulakkeernissaanut, akisussaasuusaaq.

§ 14-imut

Imm. 1-imut

Neriorsuutip tunniunneqartup atorneqarnissaa imaluunniit atorunnaarnissaa qulakkeerneqassaaq. Neriorsuummik tunniussinermi kommunip sanaartornermut aningaasaataasa ilai inniminnerneqartarput. Suliassaq qinnuteqaatigineqartoq ingerlanneqanngippat, aningaasat siunertanut allanut pingaarnersiuisutiginissaat pingaaruteqarpoq.

Imm. 2-mut

Taarsigassarsisup suliassaq taarsigassarsisup taarsigassarsititsinissamik neriorsuummik pisarsarvigisimasaa aallartissimagaa, kommunalbestyrelsimut uppernarsarnissaa, taarsigassarsisup pisussaaffigaa. Taarsigassarsisoq nammineerluni nalunaarummik suliaqarsinnaavoq, kisianni taarsigassarsisup illuliornermik ilisimasalik siunnersortini tamatumingga qinnuigisinnavaa. Ingerlatassat aallartinneqarsimanersut imaluunniit aallartinneqarsimannginnersut pillugu naatsumik paasissutissiineq, nalunaarutip imarissavaa. Illuliorneq sumut killinnersoq sukumiumik nassuiarnissaa pisariaqangilaq.

Imm. 3-mut

Taarsigassarsisoq atuilernissamut akuersissutip assilineranik kommunalbestyrelsimut nassiusinissamik pisussaaffeqarpoq. Taarsigassarsisup assilineranammineerluni nassiusinnaavaa imaluunniit illuliornermik ilisimasalik siunnersortini tamatumingga qinnuigisinnaallugu.

Imm. 4-mut

Kommunalbestyrelsi piffissamut killiliussatut allassimasut saneqqunneqarnissaannik akuersinnaavoq. Illuliornerup ingerlalluarnarani kiisalu atuilernissamut akuersissutip tunniunneqarnissaa taamaallaat utaqqineqarpat, saneqqutsinissamik akuersinissamut periarfissaq atorineqartussatut eqqarsaataavoq.

Aalajangersakkami pingaarnertut eqqarsaatigineqarpoq, aningaasassat siunertamut atorineqarnissaasa qulakkeerneqarnissaa.

§ 15-imut

Imm. 1-imut

Kommunalbestyrelsimut taarsigassarsiarititat tunniunneqarnissaannut piunnaasaqaataapput piginneqatigiilluni inissiat naammassineqarsimassasut, atuilernissamut akuersissut tunniunneqarsimassasoq, sanaartornermut naatsorsuutit inaarutaasut arlaannaannulluunniit attuumassuteqanngitsumit uppernarsarneqartut naammassisimassasut kiisalu piginneqatigiilluni inissiatillit peqatigiiffiata illuutaani qularnaveeqqusiussaqarluni taarsigassarsianut uppernarsaatip allaqqaarnera oqaaseqaatitaqanngitsumik Kalaallit Nunaanni Eqqartuussivimmi nalunaarsorneqarsimassasoq, qularnaveeqqusiussaqarluni taarsigassarsianut uppernarsaat oqaaseqaatitaqanngitsumik nalunaarsorneqarsimassasoq naqissuserneqarsimassasorlu kiisalu piginneqatigiilluni inissiatillit peqatigiiffiata ikuallattoornissamut aamma illuutip ajoqusernissaanut nalinginnaasumik sillimmasiisimaneranut uppernarsaasimassasoq.

Sanaartornermut naatsorsuutit inaarutaasumik uppernarsagaasut arlaannaannulluunniit attuumassuteqanngitsumit allamit suliarineqarsimanissaannut atsiorneqarsimanissaannullu, taarsigassarsisoq akisussaasuvoq. Sanaartornermut naatsorsuutit assersuutigalugu taarsigassarsisup aningaasaqarnikkut siunnersortaanit, kukkunersuiusuanut, illuliornermik ilisimasalimmit siunnersortaanit imaluunniit entreprenørimit illuliornermik suliaqarsimasumit, atsiorneqarsimasinnaapput.

Piginneqatigiilluni inissiatillit peqatigiiffiata nammineerluni imaluunniit piginneqatigiilluni inissiatillit peqatigiiffiata eqqartuussissuserisuata, aningaaseriviata imaluunniit siunnersortaata allap qularnaveeqqusiussaqaarluni taarsigassarsianut uppersaasatip suliarinissaa isumagissavaa, ilanngullugu qularnaveeqqusiussaqaarluni taarsigassarsianut uppersaasatit, taakkua kommunalbestyrelsimut nassiunneqannginneranni, Akileraartarnermut Aqutsisoqarfimmit naqissuserneqarnissaat aammalu Nunatta Eqqartuussiviani nalunaarsorneqarnissaat isumagissallugu, tamatumalu kingorna taarsigassarsiarititassat tunniunneqassapput.

Piomasaaqatit nutaatut, taarsigassarsiarititassat tunniunneqarnissaannik qinnuteqarnerup peqatigisaanik, pilersaarutaasumik piffissakkaartumillu aserfallatsaaliuinissamut pilersaarutip assilineranassiunneqassaaq. Naliliisoqarpoq illuliornerup naammassinerani, entreprenørip suliarinnittuusup illuliami pilersaarutaasumik piffissakkaartumillu aserfallatsaaliorneqarnissaanut pilersaarummik suliaqarnissaa pissutissaqartoq. Tamatumani piginneqatigiilluni inissiatillit peqatigiiffiata aallaqqaataanili peqatigiiffiup illuutaata aserfallatsaaliorneqarnissaanut paasisimaarinninnissaa qulakkeerneqassaaq, taamatullu ingerlaavartumik pilersaarutip nutartarnissaanut peqatigiiffiullu ileqqaagaqarnissaanut tunngavissaqalissalluni.

Imm. 2-mut

Taarsigassarsiarititassat tunniunneqarnissaanut piomasaaqatit naammassineqarsimagaluarpataluunniit, taamaattoq taarsigassarsiarititassat siusinnerpaamik ukiumi aningaasaliissutit kommunalbestyrelsip missingersuutaanni akuerisani ilanngunneqarfianni, tunniunneqarsinnaapput. Taamaattumik piginneqatigiilluni inissiatillit peqatigiiffiat taarsigassarsiarititassat tignissaannut utaqqisariaqarsinnaavoq aammalu aningaaserivimmi taarsigassarsigallarnikkut aningaasalersuigallartariaqarsinnaalluni. Taamaattumik piginneqatigiilluni inissiatillit peqatigiiffiata taassumalu aningaaseriviata taarsigassarsititsinissamik neriorsuummi tunniussinissamut atugassarititaasut eqqumaffigissavaat.

Kapitali 3-mut

Kapitali, inissianik nutaanik piginneqatigiilluni inissiatillit peqatigiiffiannut tunniunneqartusantik sanatitsisup namminersortup sanaartorneranik aningaasalersuinissamut taarsigassarsititsisarnermut, tunngassuteqarpoq.

Kommunalbestyrelsip piginneqatigiilluni inissiatillit peqatigiiffiannut taarsigassarsiarititassaanut killiliussat pillugit §§ 3-9-imi aalajangersakkat, sanatitsisup namminersortup inissialiorneranut tamatumalu kingorna piginneqatigiilluni inissiatillit peqatigiiffiannut taakkua tunniunnerannut, taamaaqataanik atuupput. Taarsigassarsititsinissamik neriorsuummut aammalu inaarutaasumik taarsigassarsiarititanut tunngaviusut suli tassaapput inissialiornermut aningaasartuutit tamarmiusut.

§ 16-imut

Siunnersuutip atuutilerneratigut sanatitsisoq namminersortoq nammineerluni inissianik nutaanik, piginneqatigiilluni inissiatillit peqatigiiffiannut tunniunneqartussanik sanaartornissamik aallartitsisinnaavoq. Sanatitsisup namminersortup inissianik piginneqatigiilluni inissiatillit peqatigiiffiannut tunniussinnginnermini sanaartornermik aallartitsinissani piumanerusinnaavaa, sanatitsisup namminersortup taamaaliornermigut sanaartornerup aallartinnerani piginneqataasut ataasiakkaat kissaatigisaanik eqqarsaatiginninnissaminut naleqqiullugu sanaartornermut aningaasartuutissat appartissimaarsinnaagamigit.

§ 17-imut

Aalajangersakkami kommunalbestyrelsip taarsigassarsititsinissamik neriorsuuteqarnissaanut tunngavissat sanatitsisup namminersortup nutaanik piginneqatigiilluni inissialiornissaanut aningaasalersuutissani tamarmiusuni ilaatinneqarsinnaasut, nassuiarneqarput.

Kommunalbestyrelsip piginneqatigiilluni inissiatillit peqatigiiffiannut taarsigassarsiarititassaannut killiliussat pillugit §§ 3-9-imi aalajangersakkat, sanatitsisup namminersortup inissialiorneranut tamatumalu kingorna piginneqatigiilluni inissiatillit peqatigiiffiannut taakkua tunniunnerannut, taamaaqataanik atuupput. Taarsigassarsititsinissamik neriorsuummut aammalu inaarutaasumik taarsigassarsiarititanut tunngaviusut sulit tassaapput inissialiornermut aningaasartuutit tamarmiusut.

§ 18-imut

Nutaatut piunasaqaataavoq pitsaassutsimik qulakkeerinissamut nakkutilliinermullu pilersaarummik kiisalu sanatitsisup namminersortup pisortanut akiitsui pillugit Akiliisitsiniarnermut oqartussaasumit oqaaseqaammik, sanatitsisoq nassiussissasoq.

Imm. 1-imut

Qinnuteqaat kommunalbestyrelsimut nassiunneqassaaq. Qinnuteqaat aamma ilanngussat tassungat atasut allaganngorlugit nassiunneqassapput. Qinnuteqaat aamma fax-ikkut imaluunniit mail-itut uppernarsaatit scannerlugit nassiunneqarsinnaavoq. Allaganngorlugu tunniussinissamut piunasaqaammi, kommunalbestyrelsip paasissutissanik attuumassuteqartunik uppernarsaatinillu tigusinissaa qulakkeerneqassaaq.

Imm. 2-mut

Suliassamut nassuiaat taarsigassarsisup siunnersortaanit ingeniørimit, taamaattumik ikiortisarsisoqarsimappat, suliarineqarajuppoq. Tamatuma saniatigut qinnuteqaammut illuliornermi sanaartornermut aningaasartuutissanut tamarmiusunut missingersuut ilanngunneqassaaq. Aningaasartuutit ukiumut agguagaassasut piunasaqaataaangilaq.

Nutaatut sanatitsisoq namminersortoq, pitsaassutsimik qulakkerinissamut pisussanut pilersaarummut aammalu illuliassap sananeqarnerata nalaani nakkutilliinermullu pilersaarummik, saqqummiussissaaq.

Qinnuteqaammut kommunalbestyrelsimit nunaminertamik inniminniineq imaluunniit nunaminertamik atugassiineq kiisalu sanatitsisup namminersortup illuliassap sananissaa aningaasalersorsinnaagaa uppernarsaat, ilanngunneqassapput.

Nammineq aningaasalersuutissanut uppernarsaat amerlanertigut tassaasarpog taarsigassarsisup aningaaserivianit uppernarsaat, tassani allassimasarluni taarsigassarsisoq nammineq aningaasalersuutissaminik atugassaqaarnissamut periarfissaqartoq. Kiisalu qinnuteqaammut qinnuteqartup erseqqissumik kinaassusaa ilanngunneqassaaq. Qinnuteqartoq tassaasimappat inuk, qinnuteqartup cpr. normua ilanngunneqassaaq. Qinnuteqartoq tassaappat pisinnaatitaasoq pisussaataasorlu, qinnuteqartup CVR normua imaluunniit assigisaa erseqqissumik kinaassutsimut uppernarsaataasoq, ilanngunneqassaaq.

Kiisalu qinnuteqartup pisortanut akiitsoqarnera pillugu Akiliisitsiniartarnermut oqartussaasunit oqaaseqaat, qinnuteqartup nassitutissavaa. Akiliisitsiniartarnermut oqartussaasup pisortanut akiitsut akiligassanngoreersut akilerneqanngitsut pillugit paasissutissiissaaq. Piumasaqaat siunnersuummi § 21-imi aalajangersakkamut ataqatigiissillugu isigineqassaaq.

Qinnuteqaatip suliarineqarnerani suliassamut nassuiaat, illuliornermut sanaartornermut aningaasartuutitut tamarmiusunut missingersuutit kiisalu nammineq aningaasalersuutissat pissarsiarineqarsinnaasut qinnuteqartup uppernarsaasiinera, kommunalbestyrelsip immikkut pingaartissavai. Nalilerneqassaaq sanatitsisoq namminersortoq pitsaassutsimik qulakkeerinissamut aamma illuliornermi sanaartornerup nalaani nakkutilliinissamut pilersaarutit saqqummiunneqartunik piviusunngortitsisinnaassuseqartutut, isigineqartariaqarnerisooq.

§ 19-imut

Imm. 1-imut

Qinnuteqaat kommunalbestyrelsip suliarinninneranut tunngavissaliissaaq. Qinnuteqaatip imarisai amigarpata, kommunalbestyrelsip qinnuteqartut uppernarsaatinik imaluunniit paasissutissanik ilassutaasussanik nassiussinissamik qinnuigissavaa. Qinnuteqaatip suliarinissaanut aalajangiiffiginissaanullu tunngavissat pisariaqartut pigineqanngippata, kommunalbestyrelsip qinnuteqaat itigartissinnaavaa.

Imm. 2-mut

Sanatitsisoq namminersortoq kommunalbestyrelsip qinnuteqaammik suliarinninnera aammalu taarsigassarsititsinissamik neriorsuummik tunniussinissaa sioqqullugu pituttuisumik sanaartornermut akigititassanut isumaqatigiissuteqaqqusaanngilaq aammalu illuliornermik sanaartornermillu suliaqarneq aallartinneqarsimassanngilaq. Kisiannili sanatitsisup namminersortup

sanaartugassamut pilersaarusiorneq aallartissinnaavaa, ilanngullugu sanaartugassanut sulias-samut nassuiaat suliarisinnaallugu. Taamaattoq sanaartugassamut pilersaarut, kommunal-bestyrelsimit taarsigassarsiarititassanik qinnuteqaatip suliarinissaanut pisariaqartunut killeqar-tinneqassasoq, inassutigineqarpoq.

Kiisalu illuliornermi illuliornermut pilersaarusiornermullu inatsisit atuuttut, sanaartornerup nalaani atuuttut, naammassineqarsimassapput. Illuliornermi illuliornermut pilersaarusiornermullu inatsisit atuuttut naammassineqarsimanersut, sanatitsisup namminersortup suliasarin-gilaa. Suliassaq taanna taarsigassarsinissaq pillugu qinnuteqaatip suliarineqarneranut atatil-lugu aammalu allatigut kommunimi teknikkimut ingerlatsivimmi illuliassanut suliasat sulia-rineqarnerannut nalinginnaasumut ilaatillugu, kommunalbestyrelsimiippoq.

Imm. 3-mut

Pigineqatigiilluni inissialiornissamut taarsigassarsititsinermut atugassarititaasut digitalimik suliasanik aqutsissumik atuinissaq pillugu piumasaqaatit pillugit maleruagassanik aalajanger-saanissamut Naalakkersuisut piginnaatinneqarput. Digitalimik suliasanik aqutsisuut illulior-nerup pitsaanerusumik aqunneqarneranut iluaqutaasinnaavoq aammalu illuliornerup immik-koortuini assigiinngitsuni uppersaasiinissaq qulakkeerseqarsinnaalluni.

§ 20-imut

Imm. 1-imut

Taarsigassarsititsinissamik neriorsuut tunniunneqassaaq. Taarsigassarsititsinissamik nerior-suummi taarsigassarsiarititassat annertussuserigallagassaat aammalu taarsigassarsititsinissa-mik neriorsuummut atugassarititaasut atuuttut allat, allassimapput. Taarsigassarsititsinissa-mik neriorsuut, illuliassamut qinnuteqaatigineqartumut aalajangersimasumut akuerisaasumul-lu, tunniunneqassaaq.

Imm. 2-imut

Aatsaat sanaartornermut naatsorsuutit inaarutaasut uppersarneqarsimasut pigineqalerpata, taarsigassarsiarititassat inaarutaasumik annertussusissaat naatsorsorneqarsinnaalissaaq. Inuup allap attuumassuteqanngitsup sanaartornermut naatsorsuutinik, inaarutaasumik uppersarne-qarsimasunik suliaqarnissaa atsiuinissaalu taarsigassarsisup akisussaaffigaa. Aningaasartuutit taarsigassarsivigineqarsinnaasut tamarmiusut pillugit siunnersuummi § 9, imm. 2 innersuussu-tigineqarpoq.

Imm. 3-imut

Illuliassamut qinnuteqaatigineqartumut aningaasartuutissanut missingersuutit sipporneqartut paasineqarpat, taarsigassarsisoq pissutissaqarani kinguarsaanertaqanngitsumik kommunal-bestyrelsimut nalunaaruteqassaaq. Kommunalbestyrelsi missingersuutinut allannguuteqartu-nut qaffanneqartunullu isummersornissamut piviusumik periarfissinneqassaaq.

Kommunalbestyrelsip taarsigassarsititsinissamik neriorsuutip qaffaaviginissaa itigartissinnaavaa aammalu assersuutigalugu illuliornissap allanngortinnissaanik taarsigassarsisoq kaammattorsinnaallugu. Kommunalbestyrelsip taarsigassarsititsinissamik neriorsuutip qaffaaviginissaa tamakkiisumik ilaannaasumilluunniit akuerisinnaavaa.

Taarsigassarsisoq pissutissaqarani kinguarsaanertaqannngitsumik kommunalbestyrelsimut nalunaaruteqanngippat, taarsigassarsiarititassat inaarutaasut taarsigassarsititsinissamik neriorsuummit annertunerusinnaanngillat. Aningaasartuutitut missingersuutit sipporneqarnissaat naatsorsuutigineqartariaqartoq, taarsigassarsisumut paasinarsinerata kingorna sapaatit akunnerisa 2-4 iluanni, taarsigassarsisoq nalinginnaasumik kommunalbestyrelsimut nalunaaruteqartariaqarpoq.

Sanatitsisup namminersortup immaqalu taassuma siunnersortaata missingersuutininik malinnaanissap pisariaqartup ingerlannissaa aammalu sippuinerusinnaasut pillugit kommunalbestyrelsimut nalunaaruteqarnissap qulakkeernissaa, akisussaaffigaa.

§ 21-imut

Aalajangersagaq nutaajuvoq aammalu siunnersuummi § 18, imm. 2, nr. 6-imut ataqatigiissillugu isigineqassalluni.

Qinnuteqaat pisortanut akiligassanngoreersunik akilerneqannngitsunik akiitsoqarpat, taarsigassarsititsinissamik neriorsuummik tunniussisoqarsinnaanngilaq. Taamaaliornikkut kommunalbestyrelsi qinnuteqartumut pisortanut akiligassanngoreersunik akilerneqannngitsunik akiitsoqarreersumut taarsigassarsititsinissamik akuersinnginnissaa, pingaartinneqarpoq. Taarsigassarsinissamik qinnuteqartup taarsigassarsitinneqarnissamik akuerineqarsinnaanissamut, pisortanut akiitsuni akileqqaartariaqarpai.

§ 22-mut

Imm. 1-imut

Neriorsuutip tunniunneqartup atorneqarnissaa imaluunniit atorunnaarnissaa qulakkeerneqassaaq. Neriorsuummik tunniussinermi kommunip sanaartornermut aningaasaataasa ilai inniminnerneqartarput. Suliassaq qinnuteqaatigineqartoq ingerlanneqanngippat, aningaasat siunertanut allanut pingaarnersiuisutiginissaat pingaaruteqarpoq.

Imm. 2-mut

Taarsigassarsisup suliassaq taarsigassarsisup taarsigassarsititsinissamik neriorsuummik pisarsivigisimasaa aallartissimagaa, kommunalbestyrelsimut uppenarsarnissaa, taarsigassarsisup pisussaaffigaa. Taarsigassarsisoq nammineerluni nalunaarummik suliaqarsinnaavoq, kisianni taarsigassarsisup illuliornermik ilisimasalik siunnersortini tamatuminnga qinnuigisinnaavaa. Ingerlatassat aallartinneqarsimanersut imaluunniit aallartinneqarsimannnginersut pillugu

naatsumik paasissutissiineq, nalunaarutip imarissavaa. Illuliorneq sumut killinnersoq sukumiisumik nassuiarnissaa pisariaqangilaq.

Imm. 3-mut

Taarsigassarsisoq atuilernissamut akuersissutip assilineranik kommunalbestyrelsimut nassius-sinissamik pisussaaffeqarpoq. Taarsigassarsisup assilineranammineerluni nassiussinnaavaa imaluunniit illuliornermik ilisimasalik siunnersortini, taamaattumik ikiortissarsisoqarsimapat, tamatuminnga qinnuigisinnaallugu.

Imm. 4-mut

Kommunalbestyrelsi piffissamut killiliussatut allassimasut saneqqunneqarnissaannik akuersin-naavaoq. Illuliornerup ingerlalluarnarani kiisalu atuilernissamut akuersissutip tunniunneqar-nissaa taamaallaat utaqqineqarpat, saneqqutsinissamik akuersinissamut periarfissaq ator-neqar-tussatut eqqarsaataavoq. Aalajangersakkami pingaarnertut eqqarsaatigineqarpoq, aningaasas-sat siunertamut ator-neqarnissaasa qulakkeerneqarnissaa.

§ 23-mut

Imm. 1-imut

Sanatitsisup namminersortup kingusinnerpaamik atuilernissamut akuersissutip suliarineqarne-rani inissiat piginneqatigiilluni inissiatillit peqatigiiffiannut ataatsimut pisinermut akiusumik, sanatitsisumit namminersortumit aalajangerneqartumik tamakkiisumik akilersillugit tunniussi-massavai. Taamatut pisoqangippat aammalu kommunalbestyrelsi allamik aalajangiingippat, taarsigassarsititsinissamik neriorsuut atorunnaassaaq. Assersuutigalugu piginneqatigiilluni inissiatillit peqatigiiffianni ilaasortannagortussat katersorneqarsimagaluarlutik atuilernissamut akuersissutip suliarineqarneraniit aatsaat sapaatit akunnerata ataatsip qaangiunnerani piginne-qatigiilluni inissiatillit peqatigiiffiannik pisortatigoortumik pilersitsisimappata, tamanna na-leqqussinnaavoq.

Sanatitsisup namminersortup inissiat pisiarineqarnerinut akigititassaq tamakkiisoq, taamaalil-lunilu m²-imut akiusoq aalajangersimasoq aalajangissavaa. Taamaalilluni tassani piginneqa-taassutit ataasiakkaat akiisa, inissiat angissusaasa allanngorarnerat peqquataalluni aammalu piginneqataassutinut ataasiakkaanut naligititaasunik naleqqussaanerup kingunerisaanik, allan-ngorarsinnaanerat isummerfigineqangilaq. Piginneqatigiilluni inissiatillit peqatigiiffiata aningaasartuutissat tamarmiusut pisinermut attuumassuteqartut, taamaalillunilu piginneqati-giilluni inissiatillit peqatigiiffiat pisinermut aningaasartuutissat saniatigut aningaasartuute-garnissamik pisussaaffilerneqanginnissaa, ilisimassavai.

Piffissami, inissiat piginneqatigiilluni inissiatillit peqatigiiffiannut tunniunneqarfianni, sana-titsisup namminersortup inuillu piginneqatigiilluni inissiatillit peqatigiiffiannik pilersitsiniar-tut inissianillu tunniussivigineqartussat akornanni, sananerup ingerlanneqarneranili attaveqa-qatigiittoqalereersimanissaa ilimagineqarsinnaavoq. Taamaalilluni aamma piginneqataassuti-

nut ataasiakkaanut naligititaasussanik naleqqussaasoqassanersoq isummerfigineqareersima-sinnaavoq, piffissami pilersitsiviusumi piginneqatigiilluni inissiatillit peqatigiiffiisa inissiaa-taasa ataasiakkaat ilusissaat inissaallu eqqortumik ilisimaneqalereersimasussaammata.

Imm. 2-mut

Pisinissamut akiusumut tamakkiisumut pisinermut atatillugu aningaasartuutissat tamarmik ilaatinneqassapput. Piginneqatigiilluni inissiatillit peqatigiiffiat taamatullu piginneqataasut ataasiakkaat illersorneqarnissaat tassaniippoq, tassuunakkut pisinissamut akiusoq paasinartu-mik isummerfigisinnaalereersimassagamikku, taamaalillutillu akiusoq appasittutut isumaqar-figineqarsinnaagaluartoq, assersuutigalugu sanatitsisup piginnittuunermut uppersartaatip na-qissuserneqarneranut, aningaasaqarnermut aningaasalersuinernullu siunnersorteqarnermut il.il. aningaasartuutunik ilassuteqarnissamut imminut pisinnaatitaaffilerluni akiusumut ilassu-teqarniarnera pissutigalugu tupaallaatigisussaaganu.

Kisiannili pisinermut akiusumit tamakkiisumit aningaasartuutinit qanoq annertutigisut sanaar-tornerpiamut attuumassuteqarnerisut nassuiaatigissallugu sanatitsisoq pisussaataaangilaq. Sa-natitsisup sanaartornermi iluanaarutissanik pisinermut akiusumut ilanngussisimanera tamatu-munnga pissutaavoq, sanatitsisullu taakku annertussusaasa ilisimatitsissutiginnissaat pisussaaf-figinngilaa. Assersuutigalugu allaffissornermut aningaasartuuteqartoqarsimangippat, taakku sanaartornermut aningaasartuutinit ilanngunneqassanngillat.

§ 24-mut

Imm. 1-imut

Siunnersuummi piffissami tunniussiffiusumi piginneqataassutsit tamarmik piginneqataasunit atsiorneqarsimanissaat, taamaalillunilu piginneqatigiilluni inissiatillit peqatigiiffiata inissia-nut aningaasalersuutissanik realkredit-imit taarsigassarsinissamut periarfissaqarnissaat qulak-kearniarneqarpoq.

Aalajangersakkami, inissiat sanatitsisumit namminersortumit sanaartorneqartut amerlassusaat, piginneqatigiilluni inissiatillit peqatigiiffianni ilaasortat amerlassusaannit, amerlanerullutik pisut, maleruagassiivigineqarput. Taamatut pisoqarnerani kommuni piginneqataassutini inut-taqanngitsuni piginneqataalersinnaasoq, kommunalbestyrelsi neqeroorfigineqassaaq.

Kommunalbestyrelsi piginneqataassutini inuttaqanngitsuni piginneqataalernissamik kissaate-qanngippat, sanatitsisoq namminersortoq nammineerluni piginneqatigiilluni inissiatillit peqa-tigiiffianni piginneqataalissaaq.

Sanatitsisoq piginneqataassutit inuttaqanngitsut atsiornissaannut aammalu nammineq akiliu-tissanik tassunga atasunik akiliinissamik, pisussaaffeqarpoq. Taamaalilluni aalajangersakkami piginneqatigiilluni inissiatillit peqatigiiffianni inissianut piginneqataassutit atsiorneqanngit-

sut sinneqarnissaat pinngitsoorniarneqarpoq. Sanatitsisoq namminersortoq aamma kommunalbestyrelsi piginneqataasunut allanut sanilliunneqarpoq.

Imm. 2-mut

Sanatitsisoq namminersortoq imaluunniit kommunalbestyrelsi piginneqataasutut inissippat, piginneqatigiilluni inissiatillit peqatigiiffiannut piginneqatigiilluni inissianut atuisinnaatitaaffigineqartunut ineqarnermut akiliuit nalinginnaasoq akilerneqassaaq.

§ 25-imut

Imm. 1-imut

Sanatitsisoq piginneqataalerpat, sanatitsisup inissiat atuisinnaatitaaffigineqartut siunnersuummi §§ 63-65-imi allanut attartortitsisarneq pillugu maleruagassat malillugit allamut attartortissinnaavai. Allamut attartortitsinermi attartortumit ineqarnermut akiliummik, piginneqatigiilluni inissiatillit peqatigiiffiannut ineqarnermut akitsuutitut annertussusilimmik, akiliisitsisoqarsinnaavoq.

Imm. 2-imut

Allamut attartortitsineq piffissami killiligaasumi atugassarititaasut tunngavigalugit isumaqatigiissutigineqassaaq. Taamaaliornermi pingartinneqarpoq, piginneqataassutini tunisinissap, piginneqatigiilluni inissiap allamut attartortinneqarnerata malitsigisaanik, pisariaqanngitsumik akornuserneqannginnissaa.

Piginneqataassutiniq inuttaqanngitsunik peqannginnissaa sanatitsisup namminersortup sapinngisamik qulakkiissagaa, peqatigisaanillu piginneqataassutini sapinngisamik sukkanerpaamik tuniniassagai, siunnersuut iluaqutaassaaq.

Imm. 3-imut aamma 4-imut

Sanatitsisoq namminersortoq, piginneqataassutimi inunnut piginneqatigiilluni inissiatillit peqatigiiffiannit akuerineqartumik, piginneqatigiilluni inissiatillit peqatigiiffianni ilaasortanngorsinnaasunut, tunniunniarnissaannut, pisussaaffeqarpoq.

Imm. 5-imut

Sanatitsisup namminersortup piginneqataassutini piumasaminik sanatitsisup toqqagaanut pisisussamut tunisinaanngilai. Piginneqataassutit tunineqarnerat, piginneqatigiilluni inissiatillit peqatigiiffiat aqputigalugu aammalu inatsisinut aamma peqatigiiffiup malittarisassannut naapertuuttumik, pissaaq.

Imm. 6-imut

Sanatitsisup piginneqatigiilluni inissiamik allamut attartortitsinera, piginneqataasup allap kialuunniit piginneqatigiilluni inissiamik allamut attartortitsineranut, sanilliunneqarpoq. Aam-

mattaaq allamut attartortitsinissamut isumaqatigiissut siunnersuummi kapitali 8-imi allamut attartortitsisarneq pillugu aalajangersakkani pineqartunut ilaavoq.

§ 26-imut

Imm. 1-imut

Kommunalbestyrelsi piginneqataalerpat, kommunalbestyrelsip inissiat atuisinnaatitaaffigineqartut taakkua, inissianik attartortitsisarneq pillugu inatsimmi namminersortut attartortitsisarnerat pillugu maleruagassat malillugit, attartortissinnaavai. Taamaattoq ineqarnermut akiliutip annertussusaa, piginneqatigiilluni inissiatillit peqatigiiffiannut ineqarnermut akitsuut 15 %-inik ilallugu annertussusilimmik, aningaasartaqarsinnaavoq. Attartortitsineq piffissami killili-gaanngitsumi atugassarititaasut tunngavigalugit pisinnaavoq.

Imm. 2-imut

Kommunalbestyrelsip piginneqataassutini inunnut piginneqatigiilluni inissiatillit peqatigiiffiannit akuerineqartumik piginneqatigiilluni inissiatillit peqatigiiffiannut ilaasortanningsinnaasunut, tunniunniassavai.

Imm. 3-imut aamma 4-imut

Kommunalbestyrelsip piginneqataassutini pisisussamut kommunimit toqqarneqartumut piumasaminik tunisinnaanngilai. Piginneqataassutit tunineqarnerat, piginneqatigiilluni inissiatillit peqatigiiffiat aqutugalugu aammalu inatsisinut aamma peqatigiiffiup malittarisassannut naapertuuttumik, pissaaq.

Imm. 5-6-imut

Kommunalbestyrelsi attartortup aalajangiinerinut akisussaasuvoq. Attartortup aalajangiineri, piginneqatigiilluni inissiatillit peqatigiiffiata tungaanut, kommunalbestyrelsimit aalajangiussatut isigineqassapput. Kommunalbestyrelsi attartortup aalajangiussaasa malitsigisaanik ilaasortaajunnaarsinneqassagualarpat, attartornissamut isumaqatigiissut atorunnaassaaq aammalu attartortoq qimagulluni nuussalluni.

§ 27-imut

Imm. 1-imut

Piginneqatigiilluni inissiatillit peqatigiiffiat, kommunalbestyrelsimit taarsigassarsiarititassanik tiguisussaavoq.

Piginneqatigiilluni inissiatillit peqatigiiffiat kommunalbestyrelsimit taarsigassarsiarititassani ilaalersinneqarsinnaassasoq aammalu tunineqarsinnaassasoq, ilanngullugulu paasissutissat uppernarsaatillu kommunalbestyrelsimit taarsigassarsiarititassanik tunniussinissamut pisariaqartut sanatitsisup namminersortup tunniussimassagai, pisinissamut isumaqatigiissummi piumasqaataasoq, piginneqatigiilluni inissiatillit peqatigiiffiata qulakkiissavaa.

Imm. 2-mut

Pisortat taarsigassarsiarititaasa akuerineqarnissaannut, piginneqataasut ataasiakkaat sanaartornermut aningaasartuutit tamarmiusut 5 %-iinik aningaasanngorlugu aallarniutissatut akiliisimassasut, piunasaqaataavoq. Piginneqataasup assersuutigalugu aningaasaliissutissat 5 %-ii, aningaasanngorlugit akiligassani aningaaserivimmit taarsigassarsinermigut akilersinnaavai.

5 %-it nammineq aallaqqaasiussatut akiligassat, sanaartornermut aningaasartuutit tamarmiusut imaluunniit § 51, imm. 2 naapertorlugu inissianut ataasiakkaanut naligititaasoq naleqqussarneqartoq tunngavigalugit naatsorsorneqassapput.

Piginneqatigiilluni inissiatillit peqatigiiffiat piginneqataassutinut ataasiakkaanut naligititaasunik naleqqussaasimangippat, inissiallu angeqqatigiippata, piginneqataasup nammineerluni aallaqqaatissatut akiliutissai piginneqataasunut tamanut atuuttumik assigiimmik annertussuseqassaaq. Kisiannili naleqqussaasoqarsimappat, nammineerluni aallaqqaatissatut akiliutissat annertussusaat assigiissanngillat.

Matuma kinguliani assersuut tamatumunnga takussutissaavoq:

Piginneqataassut 1 = inissiamut naligititaasoq 1,2.

Piginneqataassut 2 = inissiamut naligititaasoq 0,8.

Sanaartornermut aningaasartuutit m²-imut = 17.500 koruunit.

Piginneqataassummut 1-imut m²-imut nammineerluni aallaqqaatissatut akiliutissat 5 %-iusut = (17.500x1,2x0,05= 1.050 koruunit).

Piginneqataassummut 2-mut m²-imut nammineerluni aallaqqaatissatut akiliutissat 5 %-iusut = (17.500x0,8x0,05=700 koruunit).

Imm. 3-mut

Piginneqatigiilluni inissiatillit peqatigiiffiata nammineerluni aningaasalersuutissat sinneri pissarsiarissavai. Piginneqatigiilluni inissiatillit peqatigiiffiat nalinginnaasumik realkreditimit taarsigassarsissaq aningaaserivimmit taarsigassarsianit tapertaqartillugu.

§ 28-imut

Imm. 1-imut

Sanatitsisup namminersortup inissiat tunniussimagai, kommunalbestyrelsi nalunaarfigineqassaaq. Piginneqataasut aamma piginneqatigiilluni inissiatillit peqatigiiffiata aningaasalersuutissat sinneri inissereerpatigit, taarsigassarsititsinissamik neriorsuutit ingerlaannaq tunniunneqarsinnaapput.

Imm. 2-mut

Aalajangersakkami nalunaarummut pilersitsinermi isumaqatigiissutip, piginneqatigiilluni inissiatillit peqatigiiffiata malittarisassaasa, pisinissamut isumaqatigiissutip atsiorneqarsimasup

aamma nammineerluni aningaasalersuutissanut uppersarsaatip ilanngunneqarnissaat taaneqarpoq.

Immikkoortutut 4-tut nutaatut sanatitsisup pitsaassutsinut qulakkeerineranut aammalu piginneqatigiilluni inissiat sanaartorneqarnerisa nalaanni nakkutilliinermut uppersarsaatit nassiunneqassapput. Siunnersuut § 18, imm. 2, nr. 2-mut siunnersuummut ataqatigiissillugu isigineqassaaq. Uppersarsaatit taakkua suliarinissaat aammalu taakkua kommunalbestyrelsimut aamma piginneqatigiilluni inissiatillit peqatigiiffiannut tunniunnissaat, sanatitsisup akisussaaffigaa.

Immikkoortutut 5-itut nutaatut pilersaarutaasumik piffissakkaartumillu aserfallatsaaliuinissamut sanatitsisup pilersaarutaata assilineranassiunneqassaaq. Naliliisoqarpoq sanaartorerup naammassinerani sanatitsisup namminersortup peqatigisaanik pilersaarutaasumik piffissakkaartumillu aserfallatsaaliuinissamut pilersaarummik suliaqarnissaanut pissutissaqartoq. Tamatumani piginneqatigiilluni inissiatillit peqatigiiffiata aallaqqaataaniilli peqatigiiffiup illuutaani aserfallatsaaliuineranut paasisimaarinninnissaa qulakkeerneqassaaq, taamatullu pilersaarutit ingerlaavartumik nutarterneqartarnissaanut tunngavissaqassalluni.

§ 29-imut

Imm. 1-imut

Kommunalbestyrelsimut taarsigassarsiarititit tunniunneqarnissaannut piumasaqaataavoq, uppersarsaatit siunnersuummi § 28, imm. 2-imi allassimasut kiisalu qularnaveeqqusiussaqaarluni taarsigassarsianut uppersarsaat sillimmasiissullu nassiunneqassasut.

Imm. 2-imut

Taarsigassarsiarititassat tunniunneqarnissaannut piumasaqaatit naammassineqarsimagaluarpataluunniit, taamaattoq taarsigassarsiarititassat siusinnerpaamik ukiumi aningaasaliissutit kommunalbestyrelsip missingersuutaanni akuerisani ilanngunneqarfianni, tunniunneqarsinnaapput. Taamaattumik piginneqatigiilluni inissiatillit peqatigiiffiat taarsigassarsiarititassat tignissaannut utaqqisariaqarsinnaavoq aammalu aningaaserivimmi taarsigassarsigallarnikkut aningaasalersuigallartariaqarsinnaalluni. Taamaattumik piginneqatigiilluni inissiatillit peqatigiiffiata taassumalu aningaaseriviata taarsigassarsititsinissamik neriorsuummi tunniussinissamut atugassarititaasut eqqumaffigissavaat.

Imm. 3-mut

Piginneqatigiilluni inissiatillit peqatigiiffiata nammineq imaluunniit piginneqatigiilluni inissiatillit peqatigiiffiata eqqartuussissuserisuata, aningaaseriviata allanulluunniit siunnersortaaqta qularnaveeqqusiussaqaarluni taarsigassarsinermi allagartap suliarineqarnissaa isumagissavaa, tassunga ilanngullugu qularnaveeqqusiussaqaarluni taarsigassarsinermi allagartap kommunalbestyrelsimut nassiunneqannginnerani Akileraartarnermut Pisortaqarfimmit naqissuserne-

qarnissaa aamma Kalaallit Nunaanni Eqqartuussivimmi nalunaarsorneqarnissaa, isumagissal-lugu.

§ 30-mut

Kommunalbestyrelsi piginneqatigiilluni inissiaatillit peqatigiiffiannut kommunip inissiaataan-
nik attartortittakkanik piginneqatigiilluni inissiatut tiguisumut, taarsigassarsititsisinnaavoq.

Inissiat kommunimit tiguneqarneranni, kommunalbestyrelsip piginneqatigiilluni inissiaatillit
peqatigiiffiannut taarsigassarsiarititassaanut killissat aamma qularnaveeqqusiussaarluni taar-
sigassarsititsisarneq pillugit §§ 3-10-imi aalajangersakkat, taamaaqataanik atuutissapput.
Kommunip illuutaanik attartortittakkanik inissiarqartumik tigusineq, nutaanik inissialiorto-
qarneranik kinguneqassanngilaq, taamaattumillu sanaartornermut naatsorsuutininik soqarani.
Taamaattumik taarsigassarsiarititassanik naatsorsuinermit tunngaviusut tassaanngillat sanaar-
tornermut aningaasartuutit tamarmiusut aamma sanaartornermut naatsorsuutit, kisianni tas-
saallutik illuutip nalinga siunnersuummi §§ 35-39-imi maleruagassat naapertorlugit naatsor-
sugaasoq.

Pigineqataasut aamma piginneqatigiilluni inissiaatillit peqatigiiffiata nammineerlutik ani-
ngaasalersuutissaat pillugit siunnersuummi § 3, imm. 1-2 innersuussutigineqarpoq.

§ 31-mut

Imm. 1-imut

Siunnersuut malillugu illuummi attartortittakkami attartortut, inissiaq attartortittagaq najugar-
tik piginneqatigiilluni inissiatut tigunissaanik kissaateqartut piginneqatigiilluni inissiaatillit
peqatigiiffianni pilersitsisinnaapput aammalu inissiaq attartortittagaq najugartik piginneqati-
giilluni inissiatut tigunissaa pillugu qinnuteqarsinnaallutik.

Imm. 2-mut

Siunnersuutigineqarpoq pisortat inissiaataannik attartortittakkamik piginneqatigiilluni inis-
siatut tigusinissaq pillugu qinnuteqaateqarnissamut, illuummi attartortut tamarmiusut 75 %-
iinit tapersiisoqarnissaa, piunasaqaataassasoq. Tigusinissaq pillugu qinnuteqaat illuummiit-
toq, taamaalilluni suliaqarnermut pisussaaffinnullu, aamma tigusinermut malittaasunut, taper-
siisoqarnissaa, pingaartinneqarpoq.

Inissiami attartortut attartortitsinermit isumaqatigiisummi allassimasut qanorluunniit amerla-
tigigaluarpata, inissiami ataatsimi attartortoq ataaseq kisimi naatsorsuutigineqassaaq. Illuutip
piginnittua, tiguserup kingorna inissianik suli attartortunit, inissianik attartukkaminik pi-
gineqatigiilluni inissiatut tigusinissamik kissaateqanngitsunit najugaqarfigineqartunik aqutsi-
suusussaq eqqarsaatigalugu piunasaqaat ikkunneqarpoq.

75 %-inik piumasaqaateqarnerup naatsorsuiffigineqarnerani ammut qummulluunniit akunaallisaasoqassanngilaq. Assersuutigalugu 15-iusunit arfineq marluk 73,33 %-inik naatsorsorneqassapput, taamaattumillu 75 %-inik piumasaqaateqarnermut naammannatik. 15-iusunit 12-it 80 %-inik naleqarput, aammalu 75 %-inik piumasaqaateqarnermut naammallutik.

Imm. 3-mut

Aalajangersakkap atuutilerneratigut illuummi attartortittakkanik inissartaqartumi attartortut tamarmik, piginneqatigiilluni inissiatillit peqatigiiffianni ilaasortanngornissamut allakkatigut neqeroorfigineqassapput. Tamatumuunakkutaaq piginneqataassutit, kommunalbestyrelsimit aqunneqalersussat ikilisinniarneqarput. Suliniut nalinginnaasumik attartortumit ataatsimit amerlanerusunilluunniit, aallaqqaammut attartortunut allanut attaveqarlutik inissianik attartukkaminik piginneqatigiilluni inissiatut tigusinissamik soqutiginninersut tusarniaasimasunit aallartinneqartarpoq. Suliassamik aallarniisut amerlanerussuteqarnissaq pisariaqartoq anguniarlugu attartortunut tamanut aperinissaq soqutigisarissavaat.

§ 32-imut

Illuut allanngortinnagu tiguneqartussaavoq. Illuut tamarmiusoq piginneqatigiilluni inissiatillit peqatigiiffiannut tunineqassaaq. Piginneqatigiilluni inissiatillit peqatigiiffiat assersuutigalugu illuummi inissiat affaannut piginnittussaataalersinnaanngilaq.

Piginneqatigiilluni inissiatillit peqatigiiffia, illuutit arlallit ataatsimoortut inissisimappata, illuutit immikkoortunik arlalinnik pisisinnaavoq. Illuutit inissisimaffimmini ungasissusiat kiisalu assersuutigalugu torsusuanik atassusigaanerat imm. 1-imi pineqartumik saneqqussisinaanermik naliliiniarnermut pingaaruteqassapput.

Kommunalbestyrelsi qinnuteqaatip suliarineranut ilaatillugu, kommunip illuutaata attartortittakkanik inissartaqartup tigusinissamut ilaatinneqarsinnaasup, nassuiarneqarnera aggulunneqarneralu pillugit, aalajangiissaaq.

§ 33-imut

Kommunip illuutaanik attartortittakkanik inissartaqartumik piginneqatigiilluni inissiatut allanngortinneqarnissaa siunertaralugu qinnuteqaat kommunalbestyrelsimut nassiunneqassaaq. Qinnuteqaammut ilanngunneqassapput piginneqatigiilluni inissiatillit peqatigiiffiata pilersinneqarneranut uppersaat, pilersitsisut peqatigiiffimilu ilaasortat allassimassallutik. Aammattaaq kommunip illuutaani attartortittakkanik inissartaqartumi attartortut tamarmik piginneqatigiilluni inissiatillit peqatigiiffianni ilaasortaanissamik neqeroorfigineqarsimasut, uppersaat, ilanngunneqassaaq.

§ 34-mut

Imm. 1-imut

Kommunalbestyrelsi pisinermi akigititassaq aamma atugassarititaasut allat paasissutissiissutigalugit, piginneqatigiilluni inissiatillit peqatigiiffiannut pisinissamik neqeroorummik suliaqassaaq. Pisinissamik neqeroorut piginneqatigiilluni inissiatillit peqatigiiffiata akuersaarnissaq pillugu aalajangiineranut tunngavigineqassaaq aammalu taanna illuutip tiguneqarnerani teknikkimut, aningaasaqarnermut inatsisilerinermullu tunngasut sukumiisumik nassuiaataanik imaqtartariaqarluni.

Illuummut nassuiaat, ilaatigut illuummi killissalersuinernik aammalu tassani illuutitut sanilinit allanullu pilersuinermit aqquersuutitut tunngatillugu pilersuinermit aqquersuutinik imaqassaaq.

Imm. 2-mut

Piginneqatigiilluni inissiatillit peqatigiiffiannut pisinissamik neqeroorut, kommunip illuutaani attartortittakkanik inissartaqartumi qularnaveeqqusiussaqaarluni pisinnaatitaaffiit imaluunniit pisussaaffiit nalunaarsorneqarsimasinnaasut pillugit paasissutissanik imaqassaaq. Pisinissamut neqeroorutip ilaatut kommunalbestyrelsi, pisussaaffinnik nalunaarsorneqarsimasunik, kisianni aamma qularnaveeqqusiussaqaarluni akiliisussaatitaanerit atuuttut, tiguneqarnissaat pillugu piumasaqaateqarsinnaavoq. Taamaattoqarpat qularnaveeqqusiussaqaarluni akiliisussaatitaanerit atuuttut tiguneqarnerat, pisinissamut akigititap uppersarneqarnerani kommunalbestyrelsip taarsigassarsiarititaannut ilanngullugit, ilaatinneqassapput.

§ 35-mut

Imm. 1-imut

Kommunalbestyrelsip qinnuteqaat akuerissamaarpagu, kommunalbestyrelsi illuummi attartortittakkanik inissartaqartumi illutaani misissuissaaq. Taamatut misissuineq teknikkikkut aningaasaqarnikkullu naliliissutip suliarineqarnissaa siunertaralugu ingerlanneqassaaq. Piginneqatigiilluni inissiatillit peqatigiiffia akigititassamik aalajangiinermit oqimaaqatigiissitsinissaq siunertaralugu, tassungalu ilanngullugu illuutip qanoq issusia aalajangerniarlugu sanaartukkaniq ilisimasalimmik, illuutip qanoq issusianik nalunaarusiortussamik atorfinitsitsissaaq.

Imm. 2-mut

Kommunalbestyrelsip kommunip illuutaata attartortittakkanik inissartaqartup piginneqatigiilluni inissiatillit peqatigiiffiannut tunniunneqarnissaa pillugu qinnuteqaat akuerippagu, pisinermi akigititaq killilersugaanngitsumik aalajangersarneqarsinnaanngilaq. Siunnersuutigineqarpoq pisinermi akigititaq pisinissamik neqeroorummi aalajangersarneqartoq, teknikkikkut aningaasaqarnikkut nalilersuineq aamma qanoq issutsimut nalunaarusiaq tunngavigalugit aalajangersarneqassasoq.

Imm. 3-mut

Teknikkikkut-aningaasaqarnikkut nalilersuineramik suliaqartarnej aamma qanoq issutsimut nalunaarusiamik suliaqarnej pillugit maleruagassanik aalajangersaanissamut Naalakkersuisut piginnaatinneqarput.

Maannakkorpiag Namminersornerullutik Oqartussat kommunillu inissiaataasa attartortittakkat teknikikkut aningaasatigullu nalilivigineqartarnerat pillugu Namminersornerullutik Oqartussat nalunaarutaat nr. 9, 12. maj 2003-meersoq atuutsinneqarpoq.

Qanoq issutsimut nalunaarusiamik suliaqarnissaq pillugu maleruagassanik aalajangersaanissamut siusinnerusuklut piginnaatitsisoqarsimanngilaq. Piginnaatitsissut ilanngunneqassasoq siunnersuutigineqarpoq, taamaalilluni teknikkikkut-aningaasaqarnikkut nalilersuinerup aamma qanoq issutsimut nalunaarusiap imminnut sanilliunneqarneranni, taamaalillunilu akigittassamik aalajangersaanissamut tunngaviusuni oqimaaqatigiinngitsoqartoq paasineqassagaluarpat, qisuariartoqarsinnaassaaq.

§ 36-mut

Imm. 1-imut

Sanaartukkanik ilisimasalik sanaartukkanik misissuisarnermik sanaartukkanillu pilersaarusernermik misilittagaqarsimassaaq. Taamatuttaaq sanaartukkanik ilisimasallip illuummut immikkut ittumik attuumassuteqannginnissaa piumasarineqarpoq, tamannalu ilaatigut paasineqassaaq sanaartukkanik ilisimasalik sanaartukkap suliarineqarnerani ingerlanneqarneraniluunniit piginnittutut, entreprenøritut, siunnersortitut imaluunniit nakkutilliisutut attuumassuteqartuusimassanngitsoq attuumassuteqassaniluunniit. Aamma sanaartukkanik ilisimasalik illuummi attartortutut inissisimassanngilaq.

Kisiannili sanaartornermik ilisimasallip sanaartukkap suliarineqarnerani ingerlanneqarneraniluunniit piginnittutut, entreprenøritut, siunnersortitut imaluunniit nakkutilliisutut attuumassuteqartuusimasumi attuumassuteqartumiluunniit atorfeqartuusimanissaa akornutissartaqartinneqanngilaq. Taamaattoq naatsorsuutigineqarpoq illuliornermut ilisimasaqartoq atorfeqarnerminut ilaatillugu illuummi attartortittakkanik inissiartaqartumik suliaqarsimassanngitsoq.

Illuliornermik ilisimasaqartup soqutigisaminik aporaatsitsilinnginnissaa aalajangiisuulluinnartumik pingaaruteqarpoq. Sanaartukkanik ilisimasallip piginneqatigiilluni inissiatillit peqatigiiffiata soqutigisai isumagissavai. Sanaartukkanik ilisimasalik piginneqatigiilluni inissiatillit peqatigiiffiat sinnerlugu suliassap suliarineqarnerani kukkunernut sumiginnaanernullu taarsiusannorgortitaasarnermut maleruagassat nalinginnaasut naapertorlugit akisussaasuvoq, taamaattumillu sanaartukkanik ilisimasalik inuussutissarsiornermi akisussaassuseqarnermut sillimmasiisimassaaq.

Imm. 2-mut

Aalajangersakkami piginneqatigiilluni inissiatillit peqatigiiffiat aningaasalersuineri siunnersortimik, allannguinnissap ingerlanerani piginneqatigiilluni inissiatillit peqatigiiffiannut ikiuuttussamik atorfinitsinissamut pisussaaffilerneqarpoq. Kommunalbestyrelsip piginneqatigiilluni inissiatillit peqatigiiffiisa siunnersorlugit allaffissornikkut isumalluutissarpassuarnik atuisariaqannginnerat imaluunniit akisussaaffeqalinnginnissaa eqqarsaatigalugu, taamatullu suliasamat ilisimasalimmik akuutitsinikkut suliasarpiap eqaannerusumik ingerlanneqarsinnaanissaa naatsorsuutigineqarmat piumasaqaat ilanngunneqarpoq.

§ 37-imut

Imm. 1-imut

Aalajangersakkami illuummik attartortittakkanik inissiatartumik pisinnermut akiusup qanoq iliorluni aalajangerneqartarnissaa nassuiarneqarpoq. Tassani illuutip teknikkikkut aningaasqarnikkut nalinga aallaavigineqassaaq, taannalu illuutip pisiareqqinnerani akiusup, nalikillilinerit aserfallatsaaliorneqarsimangitsullu ilanngaatalugit angeqqatigissavaa.

Kisiannili teknikkikkut aningaasqarnikkullu naliliissutaasut 2 %-inik ilaneqassapput, tigusiinnermut atatillugu aningaasartuutitut matusissutissanik, taakkununga ilaassallutik sanaartornissap pilersarusiorneqarneranut, sanasunut, sanaartornissamut taarsigassarsianut erniarititanut, sanaartorfissagissaanermut, attaviliinnermut akitsuutitut, sanaartormik aqutsinnermut, teknikkikkut aningaasqarnikkullu siunnersorteqarnermut, inatsisilerituumik siunnersorteqarnermut, aningaasalersuineri siunnersorteqarnermut, allaffissornermut, aningaasalersuinnermut, piginnittuunermut uppersaatip aamma qularnaveeqqusiussaqarluni taarsigassarsinnermi allagartat suliarineqarneritut kiisalu naqissusiinnermut akitsuutitut, aningaasartuutit.

Tamatumanili qanoq issutsimut nalunaarusiap, piginneqatigiilluni inissiatillit peqatigiiffiata sanaartukkanik ilisimasalimmik suliaritissimasaata, teknikkikkut aningaasqarnikkullu naliliinnermut oqimaaqatigiissinneqarsinnaanissaa pingaaruteqarpoq. Suliamik ingerlatseriaaserineqassaaq illuut ataatsimoortumik misissorneqassalluni, aammalu illuatungeriit assersuutigalugu naliliissut, aserfallatsaaluisimanginnerup amigaaterpianillu ilanngaaserneqarsimasinnaasoq isumaqatigiissutigissallugu. Taamaalilluni teknikkikkut aningaasqarnikkullu naliliineq aamma illuutip qanoq issusianik nalunaarut assigiimmik pingaaruteqassapput, taakku ataatsimoor-tillugit pisinnermut akiusoq aalajangerneqartussaammat.

Aalajangersagaq naapertorlugi illuut aserfallatsaaliorneqarnermigut amigaateqartoq ilusia allanngortinnagu tunniunneqarsinnaavoq, tamatumalu kingorna piginneqatigiilluni inissiatillit peqatigiiffiata illuut iluarsaassinnaallugu. Amigartumik aserfallatsaaluisimaneq paasineqassaaq illuut ataavartumik tulleriiaraluni aserfallatsaaliorneqarsimangitsoq, taamaakkaluartorli tamakkiisumik iluarsaassinissaaq pisariaqarani. Taamaattumik amigartumik aserfallatsaaluisimaneq aappaatigut iluarsaassinnerup aappaatigullu tamakkiisumik iluarsaassinnerup akornanniittut paasineqassaaq. Iluarsaassineq nalinginnaasumik inissiat najugaqarfigineqarnerini su-

liarineqarsinnaapput, tassanilu pingaartumik pinnersaanerit, taarsersuinerit annikitsut nutarterinerillu suliarineqartarput.

Illuummut amigartumik aserfallatsaaliorneqarsimasumut pisinermi akigititaq, nalinginnaasumik illuummik ingerlaavartumik nalinginnaasumillu aserfallatsaaliorneqarsimasumik pisinermut naleqqiullugu akikinnerusussaavoq. Kisiannili teknikkikkut aningaasaqarnikkullu siunnersuisoqarnermut, eqqartuussissuserisumut, allaffissornermut, aningaasalersuinermi siunnersorteqarnermut aningaasartuutit illuummi amigartumik aserfallatsaaliugaasimangitsumi aningaasartuutit amerlatigiinnarnissaat naatsorsuutigineqartariaqarpoq.

Imm. 2-mut

Aalajangersakkami piginneqatigiilluni inissiatillit peqatigiiffiata illuutip pisortanit pigineqarnermi nalaani aserfallatsaaliorneqarsimangitsunik suliaqarnissamut aningaasartuutitut matussutissanik taarsigassarsisinnaaneranut periarfissat nassuiarneqarput. Kommunalbestyrelsip taarsigassarsiarititaat akilerneqartussanik tulleriinnilersuinermi piginneqatigiilluni inissiatillit peqatigiiffiata taarsigassarsiaat taamaattut akilerneqareernerini akilerneqartussatut inissisimalernissaat pisussaaffiliunneqarpoq.

Aalajangersakkami taarsigassarsiarititanut atugassarititaasut aammalu peqatigiiffiup illuutaani qularnaveeqqusiussaqaarluni taarsigassarsianik qularnaveeqqusiinerup tassunga atasup, male-ruagassiivigineqarnissaat siunertaanngilaq. Aalajangersakkami taamaallaat kommunalbestyrelsip illuummik pisinissamut aningaasalersuutissanik taarsigassarsititsinera, aserfallatsaaliuinerup iluarseqqinnissaanut aningaasalersuinissamut taarsigassarsiat kingornanni, akilerneqartussani inissisimasoq, erseqqissarneqarpoq.

Imm. 3-mut

Siunnersuutigineqarpoq piginneqatigiilluni inissiatillit peqatigiiffiata inissiaateqarfimmit inissiat attartortittakkat siusinnerusukkat ilaaffigisimasaannit illuartitat ileqqaakkat tigusi-naassanngikkai.

Teknikkikkut-aningaasaqarnikkut nalilersuinermi illuutip pisiareqqinneqarnerani akigititaq, nalikilliliinerit aserfallatsaaliuisimanginnerlu ilanngaatigalugit, nassuiarneqarpoq. Piginnittut peqatigiiffianni illuartitat aserfallatsaaliuinermut ilaatinneqarput. Pisinermi akigititassap aalajangersarneqarnerani aserfallatsaaliuisimanginneq ilanngaatigineqareerpoq. Piginneqatigiilluni inissiatillit peqatigiiffiata aserfallatsaaliuisimanginnermut ilanngaasiivigineqareerami, aningaasassat aserfallatsaaliuinermut matussutaasussat, ilanngaatigineqareersut, pissarsiarisinaanngilai.

§ 38-imut

Aalajangersakkami illuutip nutaap sananeqarneraniit ukioq ataaseq qaangiutsinnagu tunnius-sineq pitillugu pisinermit akiusoq tamakkiisoq aalajangersarneqarpoq. Akiusoq sanaartorner-

mut naatsorsuutit akuerisat malillugit sanaartornermut aningaasartuutit, tigusinermut atatillugu aningaasartuutininik matusissutissanik 2 %-inik ilassuserneqartut nalingannut aalajangerneqassaaq, taakkununga ilaassallutik sanaartornissap pilersaaruserneqarneranut, sanasunut, sanaartornissamut taarsigassarsianut erniarititanut, sanaartorfissagissaanermut, attaviliinermut akitsuutinut, sanaartornermik aqutsinermut, teknikkikkut aningaasaqarnikkullu siunnersorteqarnermut, inatsisilerituumik siunnersorteqarnermut, aningaasalersuinermi siunnersorteqarnermut, allaffissornermut, aningaasalersuinermut, piginnittuunermut uppernarsaatip aamma qularnaveeqqusiusaarluni taarsigassarsinermi allagartat suliarineqarnerinut kiisalu naqissusiinermut akitsuutinut, aningaasartuutit.

Siunnersuutigineqarpoq piginneqatigiilluni inissiaatillit peqatigiiffiata, inissiaateqarfimmit inissiat attartortittakkat siusinnerusukkut ilaaffigisimasaanit illuartitat ileqqaakkat, tigusiinnaassanngikkai. Taamaaliornikkut pingaartinneqarpoq, inissianut ataasiakkaanut illuartitat ileqqaakkat, illuummut attartortittakkanik inissiarqartumut, ukioq ataaseq inorlugu pisoqaassuseqartumut, killeqartinneqartut. Aammattaaq pingaartinneqarpoq illuutip attartortittakkanik inissiarqartup tunniunneqarneranut allaffissorinikkut aningaasartuutit killeqartinneqar-nissaat.

§ 39-imut

Siunnersuutigineqarpoq pisinermi akigititaq siunnersuummi §§ 37 aamma 38 naapertorlugit aalajangersarneqartoq, appartinneqassasoq, kommunalbestyrelsi aalajangersinnaassasoq.

Pissutsit tunngavigalugit tamanna pissutissaqarpat, matumanilu assersuutigalugu illuut, soorlu toqqavimmi pissutsit, aningaasat nalingisa nikerarnerat imaluunniit sanaartornermi suliaqarpallaarneq pissutigalugit immikkut qaffasissumik akeqartinneqarluni sananeqarsimappat aalajangersagaq atorneqarsinnaavoq. Tassalu suliami aalajangersimasumi pissutsit immikkorluinnaq issimappata, aatsaat akimik appaasoqarsinnaavoq.

Siunnersuutigineqarpoq siunnersuummi §§ 37-imi aamma 38-imi aalajangersakkat apeqqu-taatinngit, pisinermi akigititaq niuerfimmi nalinganit annertunerusinnaanngitsaq. Niuerfimmi nalinga paasineqassaaq tassaasoq illuummut akigititaq killilersugaanngitsumik nalinginnaasumik niuernermi pissarsiarineqarsinnaasusaaq.

Illuummut attartortittakkanik inissiarqartumut aalajangersimasumut niuerfimmi nalingata aalajangersarneqarnissaa ajornakusoorsinnaavoq. Tamatumani illunik tuniniaasartunit 1-2-init nalilersuinermik piniarnissaaq nalinginnaasumik pisariaqartusaaq. Aalajangersagaq illoqarfinni mikinerusuni nunaqarfinnilu atussallugu naleqqussinnaavoq pisinermi akigititaq niuerfimmi nalinganit annertunerusinnaammat.

§ 40-mut

Imm. 1-imut

Kommunip inissiaataani attartortittakkani innaallagissamik, imermik, kiassarnermik kuuffeqarfinnillu il.il. pilersuineq amerlanertigut ataatsimoorussamik pilersuineranut assigiinngitsumik iluseqartunut attaviliinikkut pisarpoq. Tamatuma saniatigut illuutit amerlanertigut imermut aqquersuutitut pingaarnernut aamma kuuffeqarfiit aqquataannut pingaarnernut pisortanit ingerlanneqartunut, attaviligaasarput.

Pigineqatigiilluni inissiani aamma inissiani nammineq pigisani inissiani attartortittakkani pisortanit pigineqartuni, taamatut ataatsimoorussamik pilersuineranut akisussaaffiup aalajangiisinaatitaanerullu agguarsimanerisa, ilanngullugulu pilersuiffiit aamma pilersuineranut aqquersuutit ingerlanneqarnerannut minnerunngitsumillu aserfallatsaaliorneqarnerannut akisussaaffiup, erseqqissumik aalajangersaruminaannerat misilittagaqarfigneqarpoq.

Tamanna tunngavigalugu kommunalbestyrelsi kommunip illuutaata attartortittakkanik inissiarqartup tigneqarneranut ilaatillugu, taamatut ataatsimoorussamik pilersuineranut, pilersuinermik isumaginnittussamik pilersitsinikkut, erseqqissumik taamatut akisussaaffimmik aalajangiisinaatitaanerumillu agguaanissamut pisussaaffeqartoq, piumasagaatitut aalajangersarnerqarpoq. Pilersuinermik isumaginnittuususaq kommunalbestyrelsimit imaluunniit pilersuinermik pilersuisussamit allamit pigineqartuusinnaavoq ingerlanneqartuusinnaallunilu.

Imm. 2-mut

Kommunalbestyrelsi ataatsimoorussamik pilersuiffiusunik nassuiaanissamut agguaanissamullu il.il. aammalu taakkua pisortat pilersuineranut aqquersuutaannut il.il. sanilliullugu killilersuinissamut, akisussaasuvoq. Kommunalbestyrelsi pilersuinermik isumaginnittuusussamik pilersitsinissamut aammalu ataatsimoorussamik pilersuiffiusut il.il. pilersuinermik isumaginnittuusussamik tunniunneqarnissaannut, akisussaasuvoq.

Imm. 3-mut

Kommunip inissiaataani attartortittakkami piginnittumut immikkut piumasagaarnikkut pisussaaffilerneqassaaq attavilersuinissamut aammalu pilersuinermik isumaginnittumut akiliisusaatitaassalluni.

Kommunip inissiaataani attartortittakkat pigineqatigiilluni inissianik peqatigiiffimmut piginnittuunermik tunniussisoqarsinnaanngilaq pilersuinermik isumaginnittussamik pilersitsisoqarsimangippat nalunaarsorneqarlunilu illuutit sorliit pilersuinermik isumagineqartussanut ilaatinneqarnersut.

Pilersuinermik isumaginnittuusussami ilaasortaanissamut pisussaaffeqarnek, pigineqatigiilluni inissiatillit peqatigiiffiisa pilersuineranut attaveqaatit tamakkiisumik paasisimaarinagit pilersuinissamut pisussaaffimmik tigusisinnaasimallutik, siusinnerusukkut misilittakkanut, ataqatigiissillugu, isigineqassaaq. Taamaalilluni pigineqatigiilluni inissiatillit peqatigiiffiisa

pilersuinnermut attaveqaatit piginneqatigiilluni inissiatillit peqatigiiffiannit pigineqartut iluarsaannissaannut aningaasanik amerlanerusunik atuisariaqarlutik, pisoqartarsimavoq.

Imm. 4-mut

Aalajangersakkami aalajangersarneqarpoq ataatsimoorussilluni pilersuinnermik tunngaviusoq tassaamat inatsisitigut oqartussaasoq ataaseq, taaneqartorlu pilersuinnermik isumaginnittoq. Pilersuinnermik isumaginnittup pilersuinnermi atortulersuutit ataatsimoorussat pigivai ingerlallugillu, illuutinillu attavilerneqarsimasunut piginnittunut akiliisitsiniartarluni.

Imm. 5-imut

Pilersuinnermik isumaginnittoq aalajangersakkatigut periarfissaqalerpoq akiligassanik akilinngisanik akiliisitsinissamut.

§ 41-mut

Aalajangersakkami kommunalbestyrelsip tigusinnermut atatillugu aningaasartuutaasinnaasunik akiliisussaananerit aalajangersarneqarpoq. Matumani teknikkikkut, aningaasaqarnikkut, inatsilerituumik aningaasalersuinnermullu siunnersorteqarnermut, allaffissornermut, aningaasalersuinnermut, piginnittuunermut uppernarsaatip kiisalu naqissusiinnermut uppernarsaatinut aningaasartuutit eqqarsaatigineqarput.

Piginneqatigiilluni inissiatillit peqatigiiffiata illuliornermik ilisimasaqartumut siunnersortimut, qanoq issutsimut nalunaarusiamik suliaqartussamut, aningaasartuutai Namminersorlutik Oqartussat imaluunniit kommunalbestyrelsip susassarinnilai.

Aningaasartuutissat naggataagut piginneqatigiilluni inissiatillit peqatigiiffiata nammineerluni akilertussaavai, pisinnermut akiusumut aningaasartuutissanut siuliani taaneqartunut matusissutissatut 2 %-it ilanngunneqartussaammata.

§ 42-imut

Imm. 1-imut

Attartortut piginneqatigiilluni inissiatillit peqatigiiffianni ilaasortaanissamik kissaateqanngitsut, marlunnik periarfissaqarput, inissiami attartortutut najugaqaannarsinnaapput imaluunniit inissianik attartortitsisarneq pillugu Inatsisartut peqqussutaat tamatumunnga periarfissaqartitsippat, illoqarfimmi tassani inissiamik allamik neqeroorfigineqarnissaq piumasarisinnaallugu. Kingulliullugu taaneqartup toqqarneqarnerani, ilaatigut innersuussisarnermut maleruagassani piunasaqaatit naammassineqarsimassapput. Attartortut ilai inigisaminnik piginneqatigiilluni inissiatut tigusinissamik imaluunniit inissiamut taamaaqataanut allamut nuunnissamik kissaateqartanngillat. Attartortutut sooq inissiaq attartortittagaq najugarisaq piginneqatigiilluni inissiatut tigorusunnginnerlugu imaluunniit nuukkusunnginnerluni, tunngavilersorneqartariaqanngilaq.

Imm. 2-mut

Kommunalbestyrelsi piginneqatigiilluni inissiatillit peqatigiiffianni inissianut attartortunit najugaqarfigiinnarneqartuni, atuisinnaatitaalluni piginneqataasutut inississaaq. Tamanna piginneqatigiilluni inissiatillit peqatigiiffiata illuummik tamarmiusumik tigusineranut, naapertuuppoq.

Kommunalbestyrelsi piginneqatigiilluni inissiateqartutut attartortitsisutullu attartortup iliusaanut, iliuseqarfiginngisaanut suliaanullu allanut attartorneqarnerani piginneqatigiilluni inissiatillit peqatigiiffianut akisussaasuvoq. Attartortoq allakkatigut ilisimatinneqassaaq § 65 naapertorlugit pisinnaatitaaffianik annikinnerusumik periarfissaqarnera.

Piginneqatigiilluni inissiatillit peqatigiiffiata kommunalbestyrelsi piginneqatigiilluni inissiat atuisinnaatitaaffigisai pillugit kommunalbestyrelsi ineqarnermut akitsuummik akiliisissavaa.

Imm. 3-mut

Kommunalbestyrelsi ineqarnermut akiliut attartortut sinnerinut akilersinneqartussaaq, inissiat attartortittakkat pillugit Inatsisartut peqqussutaat naapertorlugu aalajangersarneqartoq naapertorlugu akiliisitsissaaq.

Imm. 4-mut

Ileqqorissaarnissaaq pillugu malittarisassani aalajangersakkat, piginneqatigiilluni inissiatillit peqatigiiffiannit akuerineqartut, attartortunut illuummiiginnartunut, pisussaaffiliipput. Piginneqatigiilluni inissiatillit peqatigiiffianni ileqqorissaarnissaaq eqqarsaatigalugu, attartortoq taamaalilluni attartortitsisuminit, tassaasumit kommunalbestyrelsi piginneqataasoq, pitsaanerusunik pisinnaatitaaffeqassanngilaq. Ileqqorissaarnissamut maleruagassat unioqqutinneqarnerat, piginneqatigiilluni inissiatillit peqatigiiffiannit ilaasortaajunnaarsitsilluni alloriarnermik malitseqassagaluarpat, tamanna taamaalilluni toqqaannartumik attartortumut tutsinneqassaaq.

Kommunalbestyrelsi piginneqatigiilluni inissiamut kalluarneqartumut tunngatillugu piginneqataasutut ingerlaannarnissamik kissaateqaruni, kommunalbestyrelsip piginneqataasutut ilaasortaajunnaarsitsinissamut pissutaasoq peertariaqarjaa. Tamanna inissianik attartortitsisarneq pillugu Inatsisartut peqqussutaat atuuttoq naapertorlugu, attartortup attartornermut isumaqatigiissutaata atorunnaarsinneratigut, taamaallaat pisinnaavoq.

§ 43-imut

Aalajangersakkami, attartortut illuummi allanngortinneqartumi attartortutut ingerlaannartut, sukkulluunniit inigisaminnik piginneqatigiilluni inissiatut tigusinissamut, pisinnaatitaaffeqartinneqarput. Attartortup kaammattuineratigut, kommunalbestyrelsi, piginneqatigiilluni

inissiatillit peqatigiiffianni piginneqataassutiminik attartortumut tunniussinissamut, pisisaaffeqarpoq.

Tunniussinissaq taanna piginneqatigiilluni inissiatillit peqatigiiffiata akerlerisinnaanngilaa. Aalajangersagaq ilanngunneqarpoq, tassami attartortut arlallit suliniuteqaqqaarnerup nalaani immaqa piginneqataalernissamut aningaasaqarnikkut atugassaqaassanngitsut, naatsorsuutigineqartariaqarmat. Ilaqutariit aningaasaqarnikkut atugaat allanngorsinnaapput, taamaattumillu taakkua, imminnut naleqqutilerpat, inigisaminnik piginneqatigiilluni inissiatut tiguisinnaanissaat aalajangiisuulluinnartumik pingaaruteqarpoq.

§ 44-mut

Imm. 1-imut

Kommunalbestyrelsip attartortoq, inissiamik attartortittakkamik tigusinissamik kissaateqanngitsoq, inissiamik allamik neqeroorfigippagu, inissiaq inoqutigiit amerlassusaannut naapertuutissaaq. Innersuussinermi inissianik attartortitsisarneq pillugu Inatsisartut peqqussutaanni, inissianik tunniussisarnermut tunngaviusut nalinginnaasut, malinneqassapput.

Kommunalbestyrelsip nuunnermut aningaasartuutit naleqquttut akilissavai. Nuunnermut aningaasartuutit naleqquttunut ilaapput assersuutigalugu inuit nuutitsisartut aamma inissiap qimanneqartussap nalinginnaasumik iluarsanneqarnera. Inissiaq aalajangersagaq malillugu iluarsanneqarpat, attartortup inissiamut qularnaveeqqutit tamakkiisut utertillugit tigussavai.

Imm. 2-mut

Attartortup inigisani qimallugu nuuppat, kommunalbestyrelsi piginneqatigiilluni inissiatillit peqatigiiffiannut tamanna pillugu nalunaaruteqassaaq. Piginneqatigiilluni inissiatillit peqatigiiffiata siunnersuummi kapitali 9-imi aalajangersakkanut aamma piginneqatigiilluni inissiatillit peqatigiiffiata malittarisassaannut naapertuuttumik kommunalbestyrelsip piginneqataassutaa tuniniassavaa.

Imm. 3-mut

Kommunalbestyrelsip piginneqataassutaa piginneqatigiilluni inissiatillit peqatigiiffiannit tuniniarneqassaaq. Piginneqatigiilluni inissiaq sapinngisamik pitsaanerpaamik tuniniarneqassaaq aammalu pisisussamut piginneqatigiilluni inissiatillit peqatigiiffiannit akuerineqarsinnaasumut tuniniarneqassalluni. Piginneqataassut sapinngisamik sukkanerpaamik tuniniarneqassaaq aammalu siunnersuummi kapitali 8-imi aalajangersakkat aamma piginneqatigiilluni inissiatillit peqatigiiffiata malittarisassai isiginiarneqarlutik tunineqassalluni.

§ 45-mut

Kommunalbestyrelsi pisinissamik neqeroorummi, ininik, piginneqatigiilluni inissiatillit peqatigiiffiannit attartornissamut pisinnaatitaaffeqarnissamik piumasaqarsinnaavoq. Piginneqa-

taasut inissiani najugaqartussaataasarmata, aalajangersagaq manna taamaallaat init najugaqarfigineqarnissaminit allaanerusumik atorneqartussat pineqarput. Illuut tiguneqartoq errorsisarfeqarsinnaavoq, naqqup ataani ataatsimoorussamik sikkiliisiveqarsinnaalluni assigisaannilluunniit peqarsinnaalluni.

Kommunalbestyrelsi pisinissamik neqeroorummi, illuummi atuisinnaatitaaffioreersut, soorlu inuussutissarsiornermut tunngatillugu, atuutiinnarnissaannik piunasaqarsinnaavoq. Taamaatumik inuussutissarsiutinut atuinissamut inerteqquteqarnek, takuuk § 55, illuummi inuussutissarsiornikkut pisinnaatitaaffioreersunut atuutinnilaq.

§ 46-imut

Aalajangersakkap atuunnerani sanatitsisup namminersortup piginneqatigiilluni inissianik, piginneqatigiilluni inissiatillit peqatigiiffiannut tunniunneqartussamik, sanaartortarnera pillugu kapitali 3-imi maleruagassat, kommunalbestyrelsi piginneqatigiilluni inissiatillit peqatigiiffiannut tunniunnissaat siunertaralugu, piginneqatigiilluni inissialiornissamik kissaateqarpat, taamaaqataanik atuutissapput.

Imm. 1-imut

Kommunalbestyrelsi piginneqatigiilluni inissiatillit peqatigiiffiannik, kapitali 3-imi maleruagassat malillugit inissaliortussamik, pilersitsisinnaavoq. Kommunalbestyrelsi ataatsimeersuarnermi piginneqataasutut aammalu piginneqatigiilluni inissiatillit peqatigiiffiini pilersinneqartuni siulersuisutut aammalu inatsisinut aamma piginneqatigiilluni inissiatillit peqatigiiffiannut malittarisassanut killissaliussat iluanni piginnaatitaaffeqartuussaaq pisussaaffeqartuussallunilu.

Kommunalbestyrelsi piginneqatigiilluni inissiatillit peqatigiiffianni illuliortiternerup aningaasersuutissaannik taarsigassarsiornermut peqataasinnaavoq, taarsigassarsititsinissamik neriorsuut atsiorsinnaavaa, sanaartornissamut sanasussamik isumaqatigiissuteqarsinnaavoq aammalu aningaaserivimmit imaluunniit realkreditinstitut-imit inaarutaasumik aningaasersuutissat isumaqatigiissuteqarfigisinnaallugit.

Imm. 2-imut

Aalajangersakkami killiliussat, suup iluani taarsigassarsititsisoqarsinnaanera, nassuiarneqarput. Kommunalbestyrelsi nutaanik piginneqatigiilluni inissialiornissamut aningaasersuutissamik, annertussusissanut aningaasartassanullu killissat siunnersuummi §§ 3-9-imi aalajangersarneqartut iluanni, taarsigassarsititsisinnaavoq.

§ 47-imut

Kommunalbestyrelsi piginneqataalerpat, piginneqatigiilluni inissianut atuisinnaatitaaffigineqartunut piginneqatigiilluni inissiatillit peqatigiiffiannut ineqarnermut akitsuut nalinginnaasoq akilerneqassaaq.

§ 48-imut

Imm. 1-imut

Kommunalbestyrelsi piginneqataalerpat, kommunalbestyrelsip inissiat atuisinnaatitaaffigineqartut taakkua, inissianik attartortitsisarneq pillugu inatsimmi namminersortut attartortitsisarnerat pillugu maleruagassat malillugit, attartortissinnaavai. Taamaattoq ineqarnermut akiliutip annertussusaa, piginneqatigiilluni inissiatillit peqatigiiffiannut ineqarnermut akitsuut 15 %-inik ilallugu annertussusilimmik, aningaasartaqarsinnaavoq. Attartortitsineq piffissami killili-gaanngitsumi atugassarititaasutut tunngavigalugit pissaaq.

Imm. 2-imut

Kommunalbestyrelsip piginneqataassutini inunnut piginneqatigiilluni inissiatillit peqatigiiffiannit akuerineqartumik piginneqatigiilluni inissiatillit peqatigiiffiannut ilaasortannorsinnaasunut, tunniunniassavai.

Imm. 3-imut aamma 4-imut

Kommunalbestyrelsip piginneqataassutini pisisussamut kommunimit toqqarneqartumut piumasaminik tunisnaangilai. Piginneqataassutit tunineqarnerat, piginneqatigiilluni inissiatillit peqatigiiffiat aqutugalugu aammalu inatsisinut aamma peqatigiiffiup malittarisassannut naapertuuttumik, pissaaq.

Imm. 5-imut aamma 6-imut

Kommunalbestyrelsi attartortup aalajangiinerinut akisussaasuvoq. Attartortup aalajangiineri, piginneqatigiilluni inissiatillit peqatigiiffiata tungaanut, kommunalbestyrelsimit aalajangiusatut isigineqassapput. Kommunalbestyrelsi attartortup aalajangiussaasa malitsigisaanik ilaasortaajunnaarsinneqassagaluarpat, attartornissamut isumaqatigiissut atorunnaassaaq aammalu attartortoq qimagulluni nuussalluni.

§ 49-mut

Imm. 1-imut

Piginneqatigiilluni inissiatillit peqatigiiffianni piginneqataasut amerlassusaasa, piginneqatigiilluni inissiatillit peqatigiiffiata illuutaani piginneqatigiilluni inissiat amerlaqatigissagaat. Piginneqataasoq piginneqatigiilluni inissiatillit peqatigiiffianni piginneqatigiilluni inissianut marlunnut amerlanerusunulluunniit atuisinnaatitaalersinnaangilaq. Taamaattumik tassani piginneqataasut assigiinngitsuunissaat pineqarpoq.

Imm. 2-mut

Piginneqataassut ataaseq inummit ataasiinnarmit pigineqarsinnaavoq, taamaalillunilu assersuutigalugu piginneqateqaqataaffigineqarsinnaanani. Taamaattorli allatut pigisaqarnissaq iluminni isumaqatigiissutigineqarsinnaavoq. Taamatut isumaqatigiittoqarsimassappat, tamanna piginneqatigiilluni inissiatillit peqatigiiffiannit susassarineqanngilaq, taamaattumillu illuatungeriit akunneranni taamaallaat atuuttussaalluni. Isumaqatigiissut taamaattoq soorunami piginneqatigiilluni inissiatillit peqatigiiffianni pisinnaatitaaffinnik pisussaaffinnillu piler-sitsiviussaangilaq.

Piginneqatigiilluni inissiatillit peqatigiiffiata kina assersuutigalugu akiligassanut, nalunaa-rutinut, peqqussutinut tunngatillugu saaffigisassaneraa qularnarunnaarsinniarlugu aalajangersagaq ilanngunneqarpoq, aammalu ataatsimeersuarnermi taasisinnaatitaanermut, piginneqataassutillu tunineqarneranut tunngatillugu kina pisinnaatitaanersoq ersarissumik ilisimassallugu pingaaruteqarpoq.

Aappariit piginneqatigiilluni inissiaammut nuunnissamik kissaateqartut kina arlartik piginneqataassanersoq, taamaalillunilu assersuutigalugu ataatsimeersuarnermi pisinnaatitaassanersoq pillugu isumaqatigiissuteqartariaqarput. Tamatuma kingorna aappariit akunnerminni piginnittuunermut tunngasunik allanik isumaqatigiissuteqarsinnaapput, assersuutigalugu piginneqataassutip 50 %-ianik tamarmik piginnittunngorsinnaallutik. Taamatut isumaqatigiissuteqarneq piginneqatigiilluni inissiatillit peqatigiiffiannit susassarineqanngilaq.

Imm. 3-mut

Inuinnaat aammalu inuit namminersorsinnaatitaasut kisimik piginneqatigiilluni inissiatillit peqatigiiffianni piginnittunngorsinnaapput. Taamaattumik tassani peqatigiiffiit, ingerlatseqatigiiffiit allallu piginnaatitaasut pisussaataitaasullu piginneqatigiilluni inissiatillit peqatigiiffianni piginneqataaansaminnut periarfissaqanngillat.

Imm. 4-mut

Kommunalbestyrelsi aamma sanatitsisoq namminersortoq piginneqataasutut inississinnaapput, peqatigisaanillu piginneqatigiilluni inissiami ataatsimit amerlanerusuni atuisinnaatitaasinaallutik.

Sanatitsisoq namminersortoq, tamanna sanatitsisup namminersortup inissianik nutaanik piginneqatigiilluni inissiatillit peqatigiiffiannut tunniunneqartussanik sanaartorneranut ilaatillugu pippat, takuuk siunnersuummi kapitali 3, aatsaat piginneqataasutut inississinnaavoq.

Kommunalbestyrelsi, tamanna kommunalbestyrelsip illuummik attartortittakkanik inissiaartartumik piginneqatigiilluni inissiatillit peqatigiiffiannut tunniussineranut, takuuk siunnersuummi kapitali 4, ilaatillugu pisimappat aatsaat piginneqataasutut inississinnaavoq.

§ 50-imut

Imm. 1-imut

Piginneqatigiilluni inissiatillit peqatigiiffianni siulersuisut piginneqataasunut allattuiffimmi allattuissapput. Piginneqataasunut allattuiffik piginneqatigiilluni inissiatillit peqatigiiffianni sukkulluunniit piginneqataasut pillugit paasissutissanik imaqassaaq aammalu paasissutissat arlallit allanneqassallutik, ilanngullugulu piginneqataasoq piginneqataassut tunineqassagaluarpat ilanngaaseereernermi tunisinermi iluanaarutinik nuussinissamik nalunaaruteqarsimanersoq, allanneqassaaq.

Aaqqissuussap allaffissornikkut aqukkuminartuunissaa, peqatigisaanillu takussutissiap nutarterneqarsimanissaata qulakkeerneqarnissaa pingartinneqarput. Tamatumalu peqatigisaanik piginneqataasut ilanngaaseereernermi tunisinermi iluanaarutinik takussutissiamik ataatsimoorussamik siulersuisut ataatsimoorfissaqalernissaat pingartinneqarput. Piginneqataasunut allattuiffik ileqqorissaarnissakkut malittarisassaavoq. Taamaalilluni piginneqataassutit tunniunneqarnissaannut imaluunniit nuussinissamik nalunaaruteqarnissamut, piginneqataasunut allattuiffimmi tamatuma ilanngunneqarsimanissaa, atuutsitsinissamut piunasaqaataangilaq.

Imm. 2-mut

Piginneqataasunut allattuiffiup tunniunneqarnerani, ilanngaaseereernermi tunisinermi iluanaarutinik nuussineq pillugu susassaqqanngitsunut paasissutissanik tunniussisoqqannginnissaa, qulakkeerneqassaaq. Piginneqataasunut allattuiffiup, ilanngaaseereernermi tunisinermi iluanaarutinik nuussineq pillugu paasissutissanik imaqartup, pappialanngortinnera, piginneqataasumut pineqartumut taamaallaat tunniunneqarsinnaavoq.

Imm. 3-mut

Pilersaarutigineqarpoq nalunaarusiornikkut assigiiartumik piginneqataassutsinut allattuiffeqarnermik pilersitsinissaaq.

§ 51-imut

Imm. 1-imut

Piginneqataasut ataasiakkaat piginneqatigiilluni inissiatillit peqatigiiffiata pisuussutaannut tamakkiisunut piginneqataavoq. Pisuussutinit piginneqataassutit aggorinnngorlugit naatsorsorneqassapput, piginneqataasut ataasiakkaat inigisaasa annertussusaat kvadratmeterinnngorlugit naatsorsukkat, piginneqatigiilluni inissiatillit peqatigiiffiata inissiaataanni inigisap annertussusaannut tamakkiisunut naleqqiunneqassallutik.

Assersuut: Piginneqatigiilluni inissiatillit peqatigiiffiata inissiaatai arfinillit 90 m²-isut annertussuseqarput aammalu arfinillit 110 m²-isut annertussuseqarlutik. Inigisap annertussusaa kattillugit 1.200 m²-isut annertussuseqarpoq. Taamaattumik inissiaq 90 m²-inik annertussusilik 90/1200-tut imaluunniit 7,5 %-itut aggornilernejassaaq, aammalu inissiaq 110 m²-inik annertussusilik 110/1200-tut imaluunniit 9,16 %-itut aggornilernejassalluni.

Assersuutigalugu piginneqatigiilluni inissiatillit peqatigiiffiata pisuussutai 5 millioner koruuninik naleqarpata, piginneqataasullu ataasiakkaat piginneqataassutinit qanoq annertutigisoq piginneqataaffigalugu paaserusuppasuk, aallaqqaammut peqatigiiffiup inissiaataanni inigisap tamakkiisumik kvadratmeterinngorlugu angissusaa naatsorsorneqassaaq. Tulliullugu piginneqatigiilluni inissiani ataasiakkaani inigisap annertussusaa naatsorsorneqassaaq. Inigisat annertussusaasa uuttuutaat peqatigiiffiup pisuussutaannut tamakkiisunut, 5 millioner koruuniusunut amerlisinneqassaaq. Tassani kisitsit nassaarineqartoq tassaavoq piginneqataasup ataatsip pisuussutinit tamakkiisunit piginneqataassutaa.

Assersuut:

Pisuussutit katillugit: 2,5 millioner koruunit

Inigisap katillugu annertussusaa: 800 m²

Piginneqatigiilluni inissiani arfineq pingasuni tamani inigisap annertussusaa 100 m²-isut annertussuseqarpoq, tassalu inissiami ataatsimi aggorniliissut 1/8-iuvoq. Tassalu inissianut ataasiakkaanut naligititaasoq peqatigiiffiup pisuussutaasa tamarmiusut 1/8-eraat, piginneqataassut ataaseq 312.500 koruuninik naleqarluni.

Piginneqatigiilluni inissianut ataasiakkaanut naligititaasoq tunngaviusumik tamanut assigiippoq. Sananeqarnerminni inigisap annertussusaanut m²-imut ataatsimut akiusut assigiillutik.

Imm. 2-mut

Aalajangersakkami pineqarpoq naligititaasussanik allatut aalajangersaanissaq pisariaqartinneqarsimasoq. Tamanna assersuutigalugu piginneqatigiilluni inissiatillit peqatigiiffiata illunik immikkoortunik, kujammut avannamullu sammisunik sananerani pisinnaavoq. Piginneqataareersut tunngavissaasa isasoorsinnaanerit pinngitsoorniarlugu taamatut naleqqussaanissaq kingusinnerpaamik inissiat piginneqatigiilluni inissiatut atorneqalernerini taamaallaat pisinnaavoq, tamannalu ataatsimeersuarnermi aalajangerneqassaaq.

Piginneqatigiilluni inissiat kujammut sammisut assersuutigalugu inissianit avannamut sammisunit seqernup tungaanut isikkiviginnerujussuusinnaapput. Taamaattumik inissiat kujammut sammisut kvadratmeterimut akii assersuutigalugu 500 koruuninik akisunerusunngortinneqarsinnaapput, avannamullu sammisut akii 500 koruuninik appartinneqarsinnaallutik. Tamanna aamma illuni portusuuni, inissiat alliit inissianut qullernut naleqqiullutik isikkivilunnerusumiippata atorneqarsinnaavoq.

Tassalu piginneqataassutinit ataasiakkaanut naligititaasut tunisinermut akiusumut pingaaruteqarpoq, tak. matuma kinguliani assersuusiat:

Sanaartornermi aningaasartuutit inigisap m²-imut annertussusaanut akiusoq assersuutigalugu 15.300 koruuniuvoq. Piginneqataassut ataaseq inissiap inissisimaffia pissutigalugu 1,16-imik nalilerneqarpat, kiisalu piginneqataassut alla 0,96-imik nalilerneqarluni, inissianik tunisiner-

mi, inigisap kvadratmeterimut annertussusaanut akiusooq piginneqataassummut siullermut 17.748 koruuninik aamma piginneqataassummut tullermut 14.688 koruuninik naatsorsorneqassaaq. Tassani erseqqissaatigineqassaaq, ingerlatsinermut akiliutissaq inigisap annertussusaani kvadratmeterit amerlassusaat tunngavigalugit naatsorsorneqartarmat, taamaattumillu inissianut ataasiakkaanut naligititaasoq tassunga tunngatillugu pingaaruteqartussaanani.

§ 52-imut

Imm. 1-imut

Pigineqatigiilluni inissiatillit peqatigiiffiat peqatigiiffiuvoq, illuummik ataatsimik amerlane-rusunilluunniit pigisaqartoq, tassanilu piginneqataasut ataasiakkaat taamaallaat pigineqatigiilluni inissiamut aalajangersimasumut ataatsimut atuisinnaatitaaffeqarput. Pigineqatigiilluni inissiatillit peqatigiiffiat namminerisaminik inatsisit malillugit niuernissamut pisinnaatitaaffeqarpoq, tamannalu tunngavigalugu pigisani tamakkiisut qularnaveeqqusiissutigisinnaal-lugit. Aalajangersakkami piginneqataasut ataasiakkaat pigineqatigiilluni inissiatillit peqatigiiffianni pigineqatigiissummik pisinerminni aningaasannorlugit akiliutigisamik nalinginut pisussaatitaaffeqartut aalajangersarneqarpoq. Tassalu aningaasanut, piginneqataasup nammi-neerluni aningaasaliinermi akiliutaasa amerlaqataannik. Pigineqatigiilluni inissiatillit peqatigiiffiata akiitsoqarfigisaasa pigineqatigiilluni inissiatillit peqatigiiffiata akiitsui pillugit piginneqataasut ataasiakkaat eqqartuussisutigoortumik suliakkiissutigisinnaanngilaat.

Imm. 2-mut

Pigineqataasoq pigineqatigiilluni inissiat peqatigiiffiannit ilaasortaajunnaarsinnaanngilaq nutaamik pigineqataalersumik ilaasortaalersinnagu. Pigineqataalersussap nutaap ilaasortanngornissaata tungaanut, pigineqataasoq ilaasortaajunnaartoq taassumaluunniit qimatai akiitsunut akiliisussaatitaavoq. Pigineqataasup nutaap pigineqatigiilluni inissiaq tiguguniuk, pigineqataasup ilaasortaajunnaartup pisinnaatitaaffii pisussaaffiilu tigussavai.

Pigineqatigiilluni inissiatillit peqatigiiffiata pisussaaffiinik inuttut akiliisussaatitaanermut immikkut pisussaaffeqarneq, pigineqatigiilluni inissiatillit peqatigiiffianni ilaasortaajunnaarnermi atorunnaartussaanngitsoq, pigineqataasup ilaasortaajunnaartup eqqumaffigissavaa. Pigineqataajunnaartup pisussaaffii akiitsoqarfigisamit aalajangersimasumit isumaqatigiissusiortoqarneratigut aaqqiisoqassaaq. Taamatut pisoqartillugu pigineqataasup ilaasortaajunnaartup akiligassaqarfiata akuersaarnissaa, pisussaajunnaarnissamut pisariaqarpoq.

Imm. 3-mut

Pigineqatigiilluni inissiatillit peqatigiiffiata pigisaannik nalilinnik pigineqataasup pigineqataanera, qularnaveeqqusiussinissamut imaluunniit eqqartuussivikkut malersuinissamut atorneqarsinnaanngilaq. Tassani ilaapput assersuutigalugu qularnaveeqqusiussineq pillugu isumaqatigiissut, akiliussinerit aamma akiliisinnaajunnaarneq.

Imm. 4-mut

Piginneqataasoq ilanngaaseereernermi tunisinermi iluanaarutaasimasinnaasuni qularnaveeqqusiinermut nuussisinnaavoq, kisianni nuussivigineqartup piginneqataassut tunineqassasoq piumasaqaatigisinnaangilaa. Aalajangersakkap atuunnerani aamma piginneqatigiilluni inissiatillit peqatigiiffiata, nuussineq apequtaatinnagu, tunisinermi iluanaarutini pisassaasinnaasut ilanngaatigisinnaavai. Taamaalilluni ilanngaaseereernermi tunisinermi iluanaarutini taamaallaat nuussisoqarsinnaavoq.

Ilanngaaseereernermi tunisinermi iluanaarutit nuussinermut atorneqarsinnaapput. Tassunga atatillugu ilanngaaseereernermi tunisinermi iluanaarutit aamma eqqartuussivikkut malersuinnermut atorneqarsinnaasutut isigineqarsinnaapput. Akiligassa qarfigineqartup eqqartuussivikkut malersuisussap, nuussisoq assigalugu, piginneqataasut tunineqassasoq piumasarisinnaangilaa.

Nuussinermik tiguisup imaluunniit ilanngaaseereernermi tunisinermi iluanaarutini akiliisitsisup, isumaqatigiissute qarfigineqartunut aammalu akiligassa qarfigineqartunut eqqartuussivikkut malersuisunut illersuinissaq anguniarlugu, maleruagassat nalinginnaasut pisariaqartut mallugit qularnaveeqqusiinermut allagaatit isumagisariaqarpai.

§ 53-mut

Imm. 1-imut

Ataatsimeersuarneq piginneqatigiilluni inissiatillit peqatigiiffianni qullersatut oqartussaasuvoq. Piginneqatigiilluni inissiatillit peqatigiiffiata peqatigiiffimmi inissititernermi tulleriittarneq nalinginnaasoq malippaa, piginneqatigiilluni inissiatillit peqatigiiffianni piginneqataasut tamarmik najuuffigisinnaasaannik ataatsimeersuartitsisarluni. Piginneqataasut tamarmik immikkut ataatsimeersuarnermi ataatsimik taasisinnaapput.

Ataatsimeersuarnermi taasisinnaatitaasut tassaapput piginneqatigiilluni inissiatillit peqatigiiffiat isumaqatigiissute qarfigalugu piginneqataassummik pisisimasut. Ataatsimeersuarnermi piginneqataasunut allattuiffiup pappialanngartinnera saqqummiunneqassaaq.

Imm. 2-mut

Ataatsimeersuarnermi aalajangiinerit, piginneqatigiilluni Inatsisartut inatsisaanni matumani inissiatillit peqatigiiffiata malittarisassaanni imaluunniit peqatigiiffinnut inatsisini maleruagassani nalinginnaasuni allatut aalajangiisoqarsimangippat, nalinginnaasumik amerlanerusuteqarnikkut aalajangiiffigineqassapput.

Imm. 3-mut

Ataatsimeersuarnermi ukiumut ineqarnermut akiliutissaq, piginneqataasunit ataasiakkaanit akilersinneqartussa, aalajangersarneqassaaq. Ineqarnermut akiliut ukiumut ataatsimut arlalinnulluunniit missingersuutit tunngavigalugit nalinginnaasumik aalajangersarneqartarpoq aammalu ingerlaavartumik ingerlatsinermit aserfallatsaaliuiner nullu kiisalu pilersaarutaasumik

piffissakkaartumillu aserfallatsaaliuinnermut ileqqaaraluni aningaasassat qulakkeerneqassallutik.

Imm. 4-mut

Nalunaarutiortoqarnerani malittarisassanik minnerpaaffeqartunik, piginneqatigiilluni inissiatillit peqatigiiffiisa ataasiakkaat malittarisassaasa ilusilersugaaner atapeqqutaatinnagu atuutussanik, suliaqartoqassasoq. Malittarisassat minnerpaaffeqartut pingaarutilinnik aalajangiinerni amerlanerussuteqarnissaq aammalu assersuutigalugu taarsigassarsisarneq, ilaasortaajunnaarsitsisarneq aamma atorunnaarsitsineq pillugit maleruagassanik imaqarsinnaassaaq. Piginneqataassutinik tunniussisarneq pillugu maleruagassanik ilassutaasunik aalajangersaasoqarsinnaavoq. Maleruagassat aamma Inatsisartut inatsisissaannut siunnersuutip matuma killissaa sa iluanni aalajangersarneqarsinnaapput.

§ 54-mut

Imm. 1-imut

Piginneqatigiilluni inissiatillit peqatigiiffiata siulersuisui ataatsimeersuartunit qinerneqartassapput. Siulersuisut katitigaanerannut suliaasaannullu maleruagassat sukumiinerusut piginneqatigiilluni inissiatillit peqatigiiffiata malittarisassaani aalajangersarneqassapput. Piginneqataasut ataasiakkaat kisimik siulersuisunut qinigaasinnaassuseqarput.

Ataatsimeersuarnermi aqutsisussamik, piginneqatigiilluni inissiatillit peqatigiiffiata ulluinnarni ingerlanneqarneranik isumaginninnermi ikiuuttussamik toqqaasoqarsinnaavoq. Aqutsisussamik toqqaasoqanngippat ulluinnarni aqutsineq siulersuisunit isumagineqassaaq.

Imm. 2-mut

Piginneqatigiilluni inissiatillit peqatigiiffiat, siulersuisut illuummik ulluinnarni ingerlatsineranni, siulersuisut akisussaasuunerannut sillimmasiissuteqassapput. Pingaartumik piginneqatigiilluni inissiatillit peqatigiiffiini mikinerusuni siulersuisut piginneqatigiilluni inissiatillit peqatigiiffiisa aqunneqarneranik isumaginnittuusut takuneqartarput. Siulersuisut amerlanertigut inuinnarnik, illuutinik aqutsinermik misilittagaqanngitsunik, taamaattumillu piginneqatigiilluni inissiatillit peqatigiiffiannut aningaasaqarnikkut annaasaqaataasumik aalajangeeria-taarsinnaasartunik ilaasortaqartarput. Sillimmasiissut taamaattoqaratarsinnaanerannut matussutissaavoq.

§ 55-imut

Imm. 1-imut

Piginneqatigiilluni inissiaq najugaqarfigineqartussatut aalajangigaavoq aammalu inuussutisarsiornermut atorneqaaqqusaanani. Tamanna Inatsisartut inatsisaata atuuffissaannut aammalu kommunalbestyrelsip piginneqatigiilluni inissiatillit peqatigiiffiannut taarsigassarsiarititaannut tunngavissarititaasunut, akerliusussaavoq, taamatullu tamanna piginneqatigiilluni inissiaa-

tillit peqatigiiffeqarnissamut siunertaasumut, najugaqarfigineqarnissarpiaanut tunngasumut, akerliulluni.

Ilaatinneqanngilaq kommunip illuutaani attartortittakkanik inissiartaqartumi, piginneqatigiilluni inissiatillit peqatigiiffiannut tunniunneqartumi, tak. § 45, inuussutissarsiornermut atuinerit pioreersut.

Imm. 2-mut

Inissiamit najukkamit inuussutissarsiummik namminersortumik annikitsumik ingerlatsisinnaaneq ataatsimeersuarnermi akuerineqarsinnaavoq. Tassa imaappoq inuussutissarsiummik ingerlatsiviusoq inissiap najugaqarfigineqarneranut naleqqiullugu annertunerussanngilaq. Assersuutigalugu piginneqataasoq piginneqatigiilluni inissiap initaasa ilaanni fax-imik, qarasaasiamik allaffimmillu inissiiikkut siunnersorteqarfimmik imaluunniit naatsorsuuserisoqarfimmik ingerlatsisinnaavoq. Inuussutissarsiummi sullitat piginneqatigiilluni inissiamut akulikitsumik saaffiginnittarnerannik nassataqassapat, tamanna inerteqquteqarnermut ilaatinneqassaaq, tassami inissiaq assersuutigalugu ulluunerani angerlarsimaffimmi paaqqinnittarfittut, nujalerisarfittut, nerisassianik ineriikkanik pisiniartarfittut, nerisassianik ineriikkanik amerlasuukkaanik pisiniartarfittut, isikkanik passussisarfittut assigisaattullu atorneqaruni inuussutissarsiorfinngorluni allanngortussaammat.

§ 56-imut

Piginneqatigiilluni inissiatillit peqatigiiffiat minnerpaamik ikuallattoornissamut aamma illuutip ajoqusernissaanut sillimmasiissaaq. Tamatumunnga pissutaavoq, piginneqatigiilluni inissiat assersuutigalugu ikuallassagaluarpata, aammalu illuutit sillimmaserneqarsimanatik, kommunalbestyrelsip illuummi qularnaveeqqutaa naleqartussaannгимmat.

§ 57-imut

Imm. 1

Aalajangersakkap atuutilerneratigut piginneqatigiilluni inissiatillit peqatigiiffiata illuutaa aammalu inissiat ataasiakkaat naammaginartumik aserfallatsaalineqartussaapput. Pisussaaffik eqqumaffigineqarnerisoq ataasiakkaatigut naliliisarnikkut pissaaq. Ataatsimut isigalugu ingerlaavartumik aserfallatsaaliuinnikkut illuutip aserfallanninnissaa, taamaalillunilu nalimigut piginneqatigiilluni inissiatillit peqatigiiffiannut taarsigassarsititsisimasunullu, illuummi qularnaveeqquteqartunut annaasaqaataannginnissaa qulakkeerneqassaaq. Tassalu aserfallatsaaliuisussaatitaanermik naammassinninnissami tunngaviatigut suut tamarmik pineqarput, assersuutigalugu piginneqatigiilluni inissiammi ingerlaavartumik naternik lakkerisarnermiit ruujorinillu ussiitsunik taarsersuisarnermiit qaliat qalliutaannik taarsersuisarnermut illullu silataata qalipanpeqartarneranut.

Imm. 2-mut

Illup iluani aserfallatsaaliuineq nutarterinerlu piginneqataasut ataasiakkaat isumagisassaraat, taakkulu akiligaannik suliarineqartussaallutik. Tassalu piginneqataasut aserfallatsaaliuisussaa-titaanerannut ilaatigut qalipaaneq, qaqortorterineq, tapetilersuineq, naternik, illup iluani matu-nik, igaffimmi nerriviusanik, sikaavinnik aalaakkaasunik uffarfimmilu atortunik taarsersuineq ilaapput.

Pigineqatigiilluni inissiatillit peqatigiiffiat pigineqatigiilluni inissiatilinnut aserfallatsaa-liuinerlutit ilitersuummik suliaqarsinnaavoq, aserfallatsaaliuinerlutit suliaqarnerup assassor-nikkut eqqortumik suliarineqarnissaanik qulakkeerisussamik.

Imm. 3-mut

Pigineqatigiilluni inissiatillit peqatigiiffiat, aserfallatsaaliuinerlutit allanut tamaginnut nutar-terinerlutit, pigineqataasut ataasiakkaat illup iluani aserfallatsaaliuinerlutit nutarterinis-saannullu pineqartunut ilaanngitsunut, akisussaasuvoq aammalu aningaasartuutit akilertus-saallugit.

Imm. 4-imut

Ataatsimeersuartut aserfallatsaaliuinerlutit maleruagassanik, pigineqataasut ataqqissallugit malissallugillu pisussaaffigisaannik akuersisinnaavoq. Aserfallatsaaliuinerlutit maleruagas-sat aserfallatsaaliugassanut, pigineqatigiilluni inissiatillit peqatigiiffianit akisussaaffigine-qartunut aamma pigineqataasunit akisussaaffigineqartunut tunngasinnaapput. Tamatuma sa-niatigut aamma illup iluani silataanilu suliaasanut tunngatillugu aserfallatsaaliuinerlutit ma-leruagassanik akuersisoqarsinnaavoq.

Aserfallatsaaliuinerlutit maleruagassat imarisassat sukumiinerusut pigineqatigiilluni inis-siatillit peqatigiiffianit namminerlutit aalajangersarneqassapput, taamaattumillu pigineqati-giilluni inissiatillit peqatigiiffiani assigiinngitsuni allanngorarnissaat naatsorsuutigineqarluni.

Aserfallatsaaliuinerlutit maleruagassat akuersissutigineqarnerini nalinginnaasumik imm. 4 naapertorlugu aserfallatsaaliuinerlutit pilersaarusiortoqartassaaq, tassanilu illup iluani sila-taanilu aserfallatsaaliuinerlutit tunngatillugu suliaasat ataasiakkaat qanoq akuttutigisumik suliarineqartarnissaat nassuiaatigineqartassalluni.

Imm. 5-imut

Pigineqatigiilluni inissiatillit peqatigiiffianit siulersuisut pilersaarutaasumik piffissakkaar-tumillu aserfallatsaaliuinerlutit pilersaarummik suliaqassapput. Pilersaarut tunngaviummik pilersaarutaasumik piffissakkaartumillu aserfallatsaaliuinerlutit suliaasat suliaasannngortartut naatumik nassuiaataannik aammalu tamatumunnga aningaasartuutissat missiliorneqarneran-nik, imaqassaaq. Pilersaarutip ingerlaavartumik nutarterneqartariaqarpoq aammalu nalingin-naasumik ataatsimeersuarnerlutit naatsorsuutitut missingersuutitut ilanngullugu suliarine-qartariaqarluni.

Aamma pilersaarummut illup silataata eqqaatalu, illut ataatsimoorussat assigisaasalu aserfallatsaaliorneqarnissaat ilaassapput. Aserfallatsaaliuinissamut pilersaarut aamma piginneqataasut ataasiakkaat aserfallatsaaliugassanik akiliisinneqarnissaannut tunngavigineqarsinnaavoq.

Aserfallatsaaliuinissaq naatsorsuutigineqareersinnaatillugu aammalu akuttoqatigiinnik pisariaqalertartillugu aammalu ajutoornerup, ajoqusernerup imaluunniit tassanngaannartumik illup iluani silamiluunniit sunniutit kingunerissannik pisussaatinagu, pilersaarutaasarpoq ataavartuusarlunilu. Pigisap pioreersup atorsinnaassusia isikkualuunniit isumannaarneqarpat imaluunniit allanngutsaalineqarpat tassaassaaq aserfallatsaaliuineq.

Aserfallatsaaliugassat piffissami naatsorsuusiorfiusumi suliarineqassappata, aserfallatsaaliuinerup nalaani aningaasartuutissat toqqaannartumik akilerneqassapput. Kisiannili aserfallatsaaliugassat assersuutigalugu ukiut imaluunniit piffissat naatsorsuusiorfiusut tallimakkaarlugit suliarineqartarpat, ukiut imaluunniit piffissat naatsorsuusiorfiusut sisamat qaangiuttut ingerlanerini ingerlatsineq aqutigalugu aserfallatsaaliugassanut sillimmatissatut illuartitsisoqartassaaq, tamatumalu kingorna aserfallatsaaliugassat naammassineqarnerini aningaasartuutissat akilerneqassallutik.

Oqariaatsip pilersaarutaasumik uani atorneqarnera taamaallaat suliassap piffissalernerqarneranut tunngatinneqarpoq. Aserfallatsaaliuinissaq ukiut x-ikkaarlugit suliarineqartartussatut pilersaarusiugaappat, taaguut taanna atorneqassaaq. Taamaattumik ukiut tamaasa pilersaarutaasumik aserfallatsaaliuinissamut aningaasanik sillimmatissatut illuartitsisoqartarpoq.

§ 58-imut

Aserfallatsaaliugassat piffissap naammaginatup sukumiinerusumik aalajangerneqartup iluani suliarineqarnissaat pillugu siulersuisut piginneqataasunut peqqussuteqartarnissaannut pisussaaffilerneqarput. Piffissaliussap sivissussusaanut aserfallatsaaliugassat qanoq isikkoqarnersut apequtaassaaq. Siulersuisut suut aserfallaaliorneqarsimannginnerinut ilaatigut pingaarnersiuisinnaapput taassumalu kingunerisaanut illuummut ajutoorutaasinnaaneranik naliliillutik. Suliassarli siulersuisunit piffissaliunneqartup iluani suliaritissallugu ajornassappat, tamanna piginneqataasumut ajoqutaasinnaassanngilaq. Tamanna assersuutigalugu sanasussamik pissarsinnaannginnermik pissuteqarsinnaavoq imaluunniit silamik pissuteqarsinnaalluni.

Siulersuisut piffissaliussap qaangiunnerani aserfallatsaaliugassat suliarineqarsimanersut paasiarlugu inissiamik takuniarsinnaavaat. Siulersuisut misissuinissamut piffissamik isumaqatigiissuteqarniarlutik piginneqataasumut attaveqassapput.

Piginneqataasoq misissuisoqarnissaanut akerliuppat, aserfallatsaaliugassat suliarineqarsimanngitsut ilimanaateqartoq siulersuisut isumaqarnissaminnut pissutissaqarsinnaapput. Tamatuma kingorna § 77, imm. 2 naapertorlugu ilaasortaajunnaarsitsinissamut aallartitsisinaanermut tunngavissaqalertoqarsinnaavoq.

Piginneqataasoq ilaasortaajunnaarsinneqarpat, taamaalillunilu piginneqatigiilluni inissiamit nuuppat, piginneqatigiilluni inissiami aserfallatsaaliugassat, iluarsagassat ilaalu ilanngullugit taakkualu nalinginik aalajangersaaneq, piginneqatigiilluni inissiamit anisoqarnerani maleruagassat nalinginnaasut naapertorlugit suliarineqassapput.

§ 59-imut

Imm. 1-imut

Aalajangersakkap atuutilerneratigut piginneqataasoq inissiap iluani nalinginnaasunik annikinerusunik allannortiterissalluni pisinnaatitaavoq, tamatumanilu matunik, igaffimmi atortunik, sikaavinnik aalaakkaasunik, uffarfimmi atortunik il.il. ikkussuineq piiaanerluunniit pineqarput, kisiannili allannortiterinerit sanasut suliaattut pitsaassuseqarlutik eqqortumik suliarineqarnissaat piginneqataasup akisussaaffigaa.

Allannortiterinerit paarlattuanik pisariunerusunik allannortiterisoqarsinnaavoq, tamannali aatsaat siulersuisuni akuersisoqarnerani pisinnaavoq. Tassani assersuutigalugu illup iluata sannaanik allannortiterinerit, imaluunniit teknikkikkut atortulersuutinik immikkut ittunik, soorlu silaannarissaatinik aalaakkaasunngorlugit ikkussanik ikkussuinissaq eqqarsaatigineqarput.

Imm. 2-mut

Silataani allannortiterinissat tamarmik ataatsimeersuartunit akuerineqarsimanissaat piumasaqaataavoq.

Imm. 3-mut

Illup iluani aamma silataani allannortiterinerit tamarmik assassornikkut isumannaatsumik aammalu illuliornermut malittarisassanut aammalu illuliornermut pilersarusiornermullu inatsisinut attuumassuteqartunut allanut naapertuuttumik, suliarineqassapput.

§ 60-imut

Imm. 1-imut

Kommunalbestyrelsip qularnaveeqqutaasa akilerneqartussanik tulleriinnilersuinermi piginneqatigiilluni inissiatillit peqatigiiffiata pilersaarutaasumik ataavartumillu aserfallatsaaliuinissamut taarsigassarsiaasa, kiisalu pitsanngorsaatissatut allannortitigassatullu kissaatigisaminut taarsigassarsiaasa akilerneqareernerini akilerneqarsinnaapput.

Kommunalbestyrelsip taarsigassarsiarititaasa pilersaarutaasumik ataavartumillu aserfallatsaaliuinissamut taarsigassarsiarititat akilerneqareernerini akilerneqartussatut inissinneqarnerannut, aningaasat sillimmatissatut illuartinneqartut, assersuutigalugu sillimmatissatut illuarti-

tassat annertussusilerneqarnerini naatsorsuutigisamit aserfallatsaaliuinissap pineqartup akisunerunera pissutigalugu naammanneriataarnissaat, tungaviuvoq.

Kommunalbestyrelsip taarsigassarsiarititaat akilerneqartussanik tulleriinnilersuinermi inissisimanerat nikisinneqassappat, qularnaveeqqusiiffigisat kingornani inissisimasut taamatuttaa inissisimanerminnik nikisinneqarnissartik akuerisariaqassavaat. Kommunalbestyrelsip qularnaveeqqutaasa ajorseriannginnissaat qulakkeerniarlugu aalajangersagaq manna ilanngunneqarpoq.

Imm. 2-mut

Piginneqatigiilluni inissiatillit peqatigiiffiata illuutiminik aserfallatsaaliuisimannnginnini iluarseqqinnissaat siunertaralugu taarsigassarsiaanit, tassalu piginneqatigiilluni inissiatillit peqatigiiffiata nalinginnaasumik aserfallatsaaliuisussaatitaanera unioqquatinneqarsimappat, akilerneqartussanik tulleriinnilersuinermi kingusinnerusumut inissinneqassasoq kommunalbestyrelsi nalunaaruteqarsinnaangilaq. Tassalu piginneqatigiilluni inissiatillit peqatigiiffiata ukiuni arlalinni, assersuutigalugu illuutip igalaavinik aserfallatsaaliisussaatitaanini sumiginnarsimappagu, qularnaveeqqusiussat igalaat iluarsateqqinnissaannut taarsigassarsianit kingusinnerusumut inissinneqassasut, kommunalbestyrelsi nalunaarsinnaangilaq.

Imm. 3

Piginneqatigiilluni inissiatillit peqatigiiffiat taarsigassarsiaminik allannortitsiniarluni taarsigassarsisimassappat, tamatumanili aatsaat taarsigassarsiat nutaat iluanaarutit tunniunneqarnissaat siunertaralugu amerlanerulissanngippata, kommunalbestyrelsi nikisitsinnermut atsiorniarluni nalunaaruteqarsinnavoq. Piumasaqaat taanna naammassineqarpat, kommunalbestyrelsip qularnaveeqqutaata akilerneqartussanik tulleriinnilersuinermi inissisimanerat ajornerulersinneqassanngilaq, taamaattumik allannortitsinissaq akuerineqarsinnaalluni.

§ 61-imut

Piginneqataasoq piginneqatigiilluni inissiami atuisinnaatitaaffigisamini najugaqassasoq pingaarnertut maleruagassaavoq.

Piginneqataasup inissiami pinngitsoorani nammineerlunilu ineqarnissaa piumasaqaatigineqarpoq. Taamaattumik piginneqataasup najukkami najugaqartutut nalunaarsorsimaannarluni inissiaq najugaqarfiginngikkuniuk najugaqartussaataaneq naammassisimassanngilaa.

Najugaqartussaataaneq naammassineqanngippat, piginneqataasoq piginneqatigiilluni inissiatillit peqatigiiffianni ilaasortaajunnaarsinneqassaaq, tak § 76, imm. 4. Piginneqataasoq inullunniit piginneqataasup inoqutigisaanut ilaasoq ukiup ataatsip ingerlanerani sivikinnerpaa-mik katillugit qaammatini arfinilinni piginneqatigiilluni inissiatillit peqatigiiffianni unnuisimappat, najugaqartussaataaneq naammassineqarsimassaaq.

Piginneqataasup inoqutaanut naatsorsuunneqarput aappaasoq, inooqataasoq, qitornat angerlar-simaffimmi najugaqartut inuillu allat, piginneqataasumut inooqatigiinnertut ittumik attuumanngikkaluarlutik inoqutaasut.

Taamaattumik inuit suliffitik aqutigalugit aamma piffissap ilaani nunani allaniittartut, soorlu timmisartortartut inissiami najugaqartussaataitaanerannut piumasaqaammik naammassinninnissaannut, pineqartup ukiup ataatsip ingerlanerani sivikinnerpaamik qaammatini arfinilinni inissiami unnuisimanissaat aalajangiisuusaaq.

Tassalu inissiaq piffissap ilaani allanit atorneqassappat, tamanna taamaallaat inissiamik najukkamik allamut attartortitsisarnermut maleruagassat malillugit pisinnaavoq, tak. § 62. Inissiami isumannaallisaanissaq nakkutilliinissarlu eqqarsaatigalugit inissiamik nakkutilliisoq ullormi ataatsimi marlunniluunniit inissiami unnuisariaqassappat, nakkutilliisoq pineqartoq assersuutigalugu illoqarfiup avataaneersuuppat tamanna akuerineqarsinnaavoq.

§ 62-imut

Imm. 1-imut

Piginneqatigiilluni inissiaatillit peqatigiiffianni siulersuisut, qinnuteqaateqarneq malillugu najugaqartussaataitaanerup saneqqunneqarnissaanut akuersissuteqarsinnaavoq. Piffissap ukiunik 5-inik sivilissuseqartup iluani qaammatit 12-it tikillugit allamut attartortitsinermi, najugaqartussaataitaaneq saneqqunneqarsinnaavoq. Piginneqataasup peqannginnera utaqqiisaasutut isigineqartariaqartoq, siulersuisut misissussavaat. Siulersuisut, assersuutigalugu piffissanut 4-inut qaammatinik 3-inik sivilissuseqartunut, akuersissuteqarsinnaapput.

Piginneqatigiilluni inissiaatip allamut attartortinneqarnissaanut akuersissuteqarnissamut inatsimmi piumasaqaateqartoqanngilaq, allamut attartortitsinermit akuersissuteqartoqassanersoq, siulersuisut ataasiakkaanik nalilersuinerat apeqqutaavoq.

Imm. 2

Peqannginneq utaqqiisaannaagallartumik pippat aammalu napparsimanermik, ilinniarnermik, paarnaarussivimmiinnermik imaluunniit nuutinneqarallarnermik pissuteqarpat, siunnersummi imm. 1-imi piffissamut killilersuinerit apeqqutaatinnagit, siulersuisut allamut attartortitsinermit akuersissuteqarsinnaapput. Taamatut pisoqarnerani, piginneqatigiilluni inissiap piffissap ukiunik 5-inik sivilissuseqartup iluani qaammatinit 12-init sivilunerusumi allamut attartortinneqarneranik tamanna kinguneqartussaagaluartoq, siulersuisut aalajangernerat malillugu allamut attartortitsineq akuerineqarsinnaavoq.

Piginneqataasoq napparsimappat, nappaataalu illoqarfimmi najukkamini katsorsarneqarsinnaanngippat, taamaattumillu piginneqataasoq katsorsartiffissaminut nuukkallarsimappat, tamanna assersuutitut taaneqarsinnaavoq. Piginneqataasoq sulisitsisuminit piumaffigineqarluni imaluunniit teknologiip ineriartornerata kingunerisaanik ilinniaqqittussaappat, ilinniagarlu il-

loqarfimmi piginneqatigiilluni inissiap inissisimaffigisaani ingerlanneqarsinnaanngippat tamanna aamma assersuutigineqarsinnaavoq. Kiisalu peqqissarnerit, allamut ilinniaqqinnerit, peqquneqarluni suliarernerit, peqquneqarluni allamut nuutinneqarallernerit eqqaaneqarsinnaapput. Aamma peqannginneq piginneqataasup aappaata, inooqataata qitornaasaluunniit taamatut atugaqarnerinik pissuteqarsinnaavoq. Peqannginnissamut tunngaviusut unioqqutit-siviunngitsut taaneqartut tamakkiisuunngillat.

§ 63-imut

Imm. 1-imut

Inigisap allamut attartortinneqarnerani attartortitsinermut akiusup annertussusissaa atugassari-titaasussallu allat siulersuisunit akuerineqartussaapput. Attartornermut akiliut akilersinneqar-tussaq annerpaamik ineqarnermut akiliutip, piginneqataasup piginneqatigiilluni inissiaatillit peqatigiiffiannut akilertagaata annertoqatigissavaa. Taamaattumik, soorlu nungullarnernut il.il. matussutissanik akiliutissaq ilaneqarsinnaanngilaq.

Inissiarli pequtitaqartillugu attartortinneqarpat, piginneqataasup tamatumunnga akiliutissatut ineqarnermut akiliutip annerpaamik 10 %-ii naatsorsuutigissavai. Taamaattumik piginneqa-taasoq inigisaminik pequteqartillugu allamut attartortitsissaguni, ineqarnermut akiliut 10 %-imik ilallugu attartornermut akiliisitsisinnaavoq. Aalajangersakkami piginneqataasup inigi-saminik allamut attartortitsinermigut iluanaaruteqarnissaa pakkersimaarniarneqarpoq.

Piginneqataasoq inigisamillu najukkaminik attartortitaa akunnerminni attartornermut isuma-qatigiissuteqarsimasuummata, ineqarnermut akiliutip piginneqataasup inigisamillu attartortup akunnerminni ineqarnermut akiliummik iluarsisarnissaat eqqornerpaatut isigineqarpoq, taa-maalilluni piginneqatigiilluni inissiaatillit peqatigiiffiat inigisamik attartortinneqartup ineqar-nermut akiliisinneqartarnerani suliakkersorneqassanngilaq. Taamaattumik allamut attartortit-sinermut isumaqatigiissut malillugu ineqarnermut akiliut piginneqataasumut toqqaannartumik akilerneqartassaaq.

Taamaalilluni piginneqataasup aamma piginneqatigiilluni inissiaatillit peqatigiiffiata akornan-ni pissutsit inigisamik allamut attartortitsinermut sunnerneqassanngillat. Piginneqataasup ini-gisaminik allamut attartortitsinini taamaalilluni tamakkerlugu ineqarnermut akiliut piginneqa-tigiilluni inissiaatillit peqatigiiffiannut akilertassavaa. Taamaaliornikkut inigisaq allamut attar-tortinneqarsimagaluarpat attartortinneqarsimanngikkaluarpalluunniit, ineqarnermut akiliutip akilerneqannginneranut tunngatillugu piginneqatigiilluni inissiaatillit peqatigiiffiata piginne-qataasumut peqqusisinaanera allannguuteqassanngilaq. Matumani pingaartumik ilaasortaa-junnaarsitsinissamut piginnaatitaaneq pisussaaffeqarnerlu eqqarsaatigineqarput.

Imm. 2-mut aamma 3-mut

Inigisamik allamut attartortitsinissamut isumaqatigiissut attartortinneqartup piginneqatigiilluni inissiaatillit peqatigiiffiannut imaluunniit piginneqataasumut allanulluunniit, allanik isumaqatigiissuteqarnissaa piumasaqaatigineqarsinnaangilaq.

Tassalu inigisamik allamut attartortitsinissamik isumaqatigiissuteqarnermi inigisamik attartortinneqartup, soorlu sanilip biilianik pisinissaa, piginneqataasup qamuterallannik attartornissaa imaluunniit piginneqataasup pequtaanik pisinissaa piumasaqaatigineqassappat, tamanna inerteqqutaavoq. Taamatut isumaqatigiissuteqartoqarsimappat, isumaqatigiissut taanna, inigisamik allamut attartortitsinissamut piumasaqaataasoq atortussaassangilaq. Inigisamik allamut attartortitsinissamik isumaqatigiissut atuutiinnassaaq, kisiannili piumasaqaataasoq ilanngunneqartoq atuutissangilaq.

Isumaqatigiissutit, inigisamik allamut attartortitsinermut atasut, soorlu innaallagissamik, imermik, kiassarnermik, eqqaavilerinermik assigisaannillu atuisunngornerit aalajangersakkami ilaatinneqanngillat. Aalajangersagaq atituumik, aammalu isumaqatigiissutinut qanorluunniit ittunut atuuffeqartutut paasineqassaaq. Tamanna tunngavigalugu isumaqatigiissut alla, inigisamik allamut attartortitsinissamut piumasaqaataasoq, assersuutigalugu immikkut allakkiatut oqaluinnarnikkulluunniit isumaqatigiissutaasimanersoq apeqqutaajunnaassaaq.

Aammattaq erseqqissarneqassaaq, inigisamik allamut attartortitsinissamut isumaqatigiissutinik allanik piumasaqaateqarnissamik inerteqquteqarnermut sanilliullugu, allanik isumaqatigiissusiornissaaq inerteqqutigineqanngimmat, tamatumani taamaallaat pineqarpoq isumaqatigiissutit allat inigisamik allamut attartortitsinissamut isumaqatigiissummut piumasaqaatinik nassataqassanngimmata.

"Nerriviup ataatigut aningaasat" ajornartorsiutaasarnerata unitsinneqarnissaa kissaatigineqarpoq. Inigisamik allamut attartortitsinermut isumaqatigiissut atortussaajunnaarsinneqassanngippat, maleruagassap taassuma unioqqutinniarneqarnerani inigisamik attartortinneqartup tamanna nalunaarutigerusunnerusinnaassavaa.

Kisiannili piginneqatigiilluni inissiaatip tigunerani pitsaassusiatut itsillugu utertinneqarnissaa isumaqatigiissutigineqarsinnaavoq.

Imm. 4-mut

Inigisamik attartortinneqartup siulersuisut akuersisimagaluarpata akuersisimangikkaluarpataluunniit attartukkamik atuinini allanut tunniutissanngilaa. Taamaattoqarpat allamut attartortitsinermut isumaqatigiissut ilimasaarinertaqanngitsumik atorunnaassaaq aammalu attartortup piginneqatigiilluni inissiaq qimallugu piaartumik nuussaaq.

§ 64-imut

Piginneqataasooq piginneqatigiilluni inissiatillit peqatigiiffiannut tunngatillugu allamut attartortitsinerminut akisussaasuusooq erseqqissarniarlugu siunnersuut ilanngunneqarpoq. Suliaqarnermi aalajangersakkap malitsigissavaa, attartortup aalajangiinerini tamatumunnga piumasaqaatit naammassineqarsimappata, piginneqataasup piginneqatigiilluni inissiatillit peqatigiiffianni ilaasortaajunnaarsinneqarsinnaanera aarlerinaateqartoq, tak. kapitali 10. Ilaasortaajunnaarsitsinissamut piumasaqaatit naammassineqarsimappata, allamut attartortitsinermit isumaqatigiissutip atorunnaarsinneqarnissaanut piumasaqaatit naammassineqarsimanersut apeqqutaatinagu, ilaasortaajunnaarsitsineq pisinnaavoq. Ilaasortaajunnaarsitsinermit attartortup piginneqatigiilluni inissiaq qimallugu nuunnissamik pisussaaffeqarpoq, takuuk tamatumani siunnersuummi § 79.

§ 65-imut

Imm. 1-imut

Attartortoq piginneqatigiilluni inissiami attartortutut killilersuinernik malinnittussaavoq. Killilersuinerit piginneqatigiilluni inissiatillit peqatigiiffiannut aammalu piginneqataasunut allanut mianerinninnissamik tunngavilersugaapput. Piginneqataasooq ilaasortaajunnaarsinneqarpat, peqatigisaanik inissiamik piginneqataassutaasumut attartornissaq imaluunniit allamut attartortitsinissaq pillugu isumaqatigiissut atorunnaassaaq. Tamanna, attartortup allamut attartortitsinissamut isumaqatigiissut sumiginnarsimaneraa taamaassimannginnorsorluunniit apeqqutaatinnagu, atuuppoq. Attartortoq piginneqatigiilluni inissiatillit peqatigiiffiannut tunngatillugu piginneqataasumit pitsaanerusunik pisinnaatitaaffeqalissanngilaq.

Piginneqataasup attartortoq tamanna pillugu nalunaarfigissavaa. Allamut attartortitsineq pillugu isumaqatigiissuummi, taassuma siulersuisunut akuerisassanngorlugu nassiuunneqannginnerani, tamanna ilanngunneqartariaqarpoq.

Imm. 2-mut

Aalajangersakkami aalajangersarneqarpoq paasissutissiisussaataaneq taamaallaat piginneqataasup aamma attartortup akornanni pisussaasooq. Paasissutissiisussaataanerup isiginiarneqannginnera, piginneqataasup ilaasortaajunnaarsinneqarnerani imaluunniit attartortup siunnersuummi § 63, imm. 3-mut akerliusumik iliuseqarnerani, attartortup piginneqatigiilluni inissiaq qimallugu nuunnissamik pisussaaffeqarneranut pingaaruteqanngilaq.

§ 66-imut

Imm. 1-imut

Erseqqissarneqarpoq piginneqatigiilluni inissiatillit peqatigiiffianni piginneqataassutit tunniunneqarnissaat pillugu isumaqatigiissuteqarnissamut siulersuisut kisimik aalajangiisinnaatitaasut. Piginneqataassutip tunniunneqarnissaa pillugu piginneqataasooq isumaqatigiissuteqarsinnaanngilaq. Pisisooq imaluunniit tunisisooq piginneqatigiilluni inissiatillit peqatigiiffiannut

tunngatillugu piginneqataassutip tunniunneqarnissaa pillugu isumaqatigiissummut pisinnaatitaanermut tapersiisinnaanngillat.

Piginneqataasup piginneqatigiilluni inissiatillit peqatigiiffianni ilaasortaajunnaarnissamik kissaateqartup, tamanna pillugu siulersuisut nalunaarfigissavai aammalu siulersuisut piginneqataassummik tunniussinissaannik qinnuigissallugit. Piginneqataasup soorunami pisisussamut siunnersuuteqarluni siulersuisut paasitissinnaavai, kisianni siulersuisut tamatuminnga pisisussaaffilerneqassanngillat.

Tunniussinissap tungaanut pineqartoq piginneqatigiilluni inissiatillit peqatigiiffianni ilaasortaaginnarluni pisisussaaffinnik pisinnaatitaaffinnilu ingerlatsiinnassaaq.

Siulersuisut suliassamisut pingaarnertut aammalu siulersuisuni suliassanik ilumoorussillutik isumaginnittussaanerminnut atatillugu piginneqataassutip tunniunneqarnissaata sulissutiginnissaa pisisussaaffigaat. Iliuseqannginneq aammalu piginneqataasup saaffiginnissutaanik isiginningitsuusaarneq siulersuisut ataatsimeersuarnermi tunuartinneqarnerannik, aammalu siulersuisutut akisussaaffimminnut pisisussaaffilerneqarnerannik kinguneqarsinnaavoq.

Imm. 2-mut

Piginneqataassutip tassanilu pisinnaatitaaffiit pisisussaaffiillu piginneqataasumut nutaamut tunniunneqarnissaasa tungaanut, piginneqataasup piginneqatigiilluni inissiatillit peqatigiiffianni ilaasortaaginnassaaq. Aalajangersakkakut piginneqatigiilluni inissiatillit peqatigiiffiata inissiat amerlaqataannik ilaasortaqaannarnissaa qulakkeerniarneqarpoq.

Piginneqataasut arlaalluunniit nammineeirluni piginneqatigiilluni inissiatillit peqatigiiffiannut pisisussaaffimminik unitsitsinerminik nalunaaruteqarsinnaanngilaq. Piginneqataassutip piginneqataalersussamut tunniunneqarnissaa pillugu isumaqatigiissuteqartoqarpat, aammalu piginneqataalersoq piginneqatigiilluni inissiatillit peqatigiiffianni piginneqataasimasup pisisussaaffinnik tiguspapat, aatsaat piginneqataasoq pisisussaaffeerutsinneqassaaq.

§ 67-imut

Imm. 1-imut

Aalajangersakkami piginneqatigiilluni inissiatillit peqatigiiffianni piginneqataassutinik tunisinermi annerpaamik akigititassamik naatsorsuisarneq maleruagassiivigineqarpoq. Akigititamik qaffasinnerpaamik angusaqartoqarsinnaanersoq, niuerfimmi pisut aammalu pisinissamik soqutiginnittut apequtaapput. Taamaattumik piginneqataassummut akigititamut, naggataatigut neqeroorutit ujartuinerillu, apequtaasussaapput, taamaattoq aalajangersagaq malillugu naatsorsukkanit qaffasinnerusinnaanani.

Imm. 2-mut

Aalajangersakkami allaaserineqarput aningaasartuutissat suut qaffanneqassanersut aammalu qanoq annertussusilerneqassanersut. Qaffaanerit tamatigut januaarip ulluisa aallaqqaataanni pisassapput. Piginneqataassummut akigititaasumut ukiup qanoq ilinerani tunniussinerup pi-simanera apeqqutaanngilaq.

Tassani erniat erniaannut qaffaasarneq pineqarpoq, taamaattumillu qaffaanermit tamatigut pif-fissami pineqartumi aningaasartaliussatut qaffanneqarsimasut naapertorneqartassapput. Taa-maattumik qaffaanermit aningaasartaliussaq ukiut tamaasa qaffattassaaq. Assersuut:

Aningaasat qaffanneqartussat = 100.000 koruunit.

Qaffaanermit aallaaviusussaq = 6,5 %.

Ukiumi siullermit qaffaaneq: $100.000 \text{ koruunit} / 100 \times 6,5 \% = 6.500 \text{ koruunit}$.

Ukiup aappaani qaffaaneq: $106.500 \text{ koruunit} / 100 \times 6,5 \%$ (tassanili qaffaanermit aallaaviusooq allanngorsimasinnaavoq) = 6.922,50 koruunit. Ilaalu ilanngullugit.

Imm. 3-mut

Atuilernissamut akuersissutip tunniunneqarnissaata tungaasut, piginneqataassummut akigiti-taq piginneqataasup nammineq aallarniutissatut akiliutaanit, annertunerusinnaanngilaq. Pigin-neqatigiilluni inissiatillit peqatigiiffianni piginneqataassutit, sulii inissiatiminnut atuisinnaa-titaaffeqarfigineqalersimannigitsut, niuerutiginerat iluanaaruteqarfigineqarsinnaanngilaq.

§ 68-imut

Imm. 1-imut

Pitsanngorsaanerit annerpaamik akigititassamik naatsorsuinermit ilanngunneqarsinnaasussat, piviusumik pitsanngorsaanerit isikkoqassapput. Iliuserineqartoq pitsannguinerit isigine-qassanersoq aalajangiinermit, ilaatigut iliuuserineqartup piginneqatigiilluni inissiap atorneqar-nerata nalinganut qaffaataasinnaanersoq, imaluunniit tassani taamaallaat aserfallatsaaliuineq nalinginnaasoq allannguinerilluunniit pineqarnersut naliliinermit pingaartinneqassaaq.

Tassalu assersuutigalugu piginneqatigiilluni inissiap nutaamik aalamik milluaaserneqarnera, aalamik milluaammik atorluarsinnaasumik pioreersumik taarsiinermit naleqqiullugu atui-nerup nalinganut qaffaataassaaq. Kisiannili aalamik milluaammik aserorsimasumik taarsiineq aserfallatsaaliuineruvoq nalinginnaasoq.

Allanngorsaaneq pitsannguinerit isigisariaqanngilaq. Tamatumani pingaarutilik tassaavoq al-lanngorsaaneq pineqartoq atui-nerup nalinganut qaffaataasimanersoq. Pitsanngorsaanerup nali-nga taamatuttaaq pissarsinermit akiusoq, pisoqaassuseq nungullarnerillu eqqarsaatigalugit aa-lajangersarneqassaaq.

Imm. 2-mut

Pitsannguinerup tunisinermit ilaatineqarnissaanut, pitsannguinerup siulersuisunit allakkatigut akuerineqarsimanissaa piumasarineqarpoq. Pitsannguinerup suliarineqarneraniit kingusinner-

paamik qaammatit arfinillit qaangiunnerini allakkatigut akuersissut tunniunneqassaaq. Tunisnermi pitsannguinnermut allakkatigut akuersissummik takutitsisoqarsinnaatinnagu, aningaasartuutit taakku naatsorsukkanut ilaatinneqarsinnaanngillat.

§ 69-imut

Imm. 1-imut

Piginneqataassummut katissimallugu aappaasoq qimagaasoq, atugassarititaasut allannguuteqartinnagit piginneqataassutip tiginissaanut aammalu piginneqataasutut nutaatut ingerlaannarnissaminik, pisinnaatitaavoq. Tunniussinnermut isumaqatigiissut nalinginnaasoq, suliarineqassaaq. Piginneqataassummut akigititaq nalinginnaasumik pisartutut naatsorsorneqassaaq.

Katissimallugu aappaasoq qimagaasoq, toqukkut qimagunnerup siunitsianngua ataatsimut aammalu inuit nalunaarsorsimaffianni nalunaarsorsimasumik katissimallugu aappani inoqtigisimassagaa, piumasaqaataavoq. Aappariit piginneqatigiilluni inissiami najugaqatigiissimanngippata, katissimallugu aappaasoq qimagaasoq, piginneqataassutip tiginissaanik, piumasaqarsinnaanngilaq.

Imm. 2-mut

Aalajangersagaq imm. 1-imut tapertatut atuuppoq, tassani inuk piginneqataasup toqunissaa sioqqullugu sivikinnerpaamik ukiuni marlunni piginneqataasumut inoqutaasimasoq aammalu inuit nalunaarsorsimaffianni nalunaarsorsimasoq, imm. 1 naapertorlugu aappaasumut qimagaasumut atugassarititaasut assinginik atugassaqartinneqarluni piginneqataasutut ingerlaqqinnissamut pisinnaatitaaffilerneqarami.

Tassalu inooqataasutut atugaqarsimansoq tassani piumasarineqanngilaq, inoqutaasimaneq kisimi piumasarineqarluni.

§ 70-imut

Imm. 1-imut

Aalajangersakkami piginneqataasoq, assersuutigalugu utoqqalinini imaluunniit napparsimanini pissutigalugu illumut paaqqinnittarfimmu assigisaanulluunniit nuuppat § 69-ip tamatumunngattaq atorneqarnissaa aalajangersarneqarpoq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu, tassalu piginneqataalersussap piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqqutitsisimanera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

§ 71-imut

Imm. 1-imut

Aalajangersagaq piginneqataasup averusersimaneranut, avissimaneranut aappaqarnerataluunniit atorunnaarsinneqarsimaneranut tunngasuvoq. Taamatut pisoqartillugu aappariinni arlaat piginneqataasutut ingerlannarnissaanik aalajangiiniarnermi, pisariaqassappat akuersissut eqqartuussulluunniit atorneqassaaq. Tunniussinermut isumaqatigiissut nalinginnaasooq suliarineqassaaq. Piginneqataassummut akigititaq nalinginnaasumik pisartutut, naatsorsorneqassaaq. Piginneqataasutut ataasiinnaq nalunaarsorneqarsinnaavoq, tak. § 49, imm. 2. Aappaasooq piginneqatigiiffimmi ingerlaqqittoq piginneqatigiiffiup allattuiffianut nalunaarsorneqassaaq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu, tassalu piginneqataalersussap nu-taap piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqqu-titsisimanagera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

§ 72-imut

Imm. 1-imut

Aalajangersakkami piginneqataasooq piginneqataassutiminik inooqatiminut tunniussinissamut pisinnaatitaaffilerneqarpoq, tassani inooqataasooq inooqatigiinnerup taamaatinneqarnissaa si-oqqullugu sivikinnerpaamik ukiuni marlunni inoqutaasimappat aammalu inuit nalunaarsorsimaffiat malillugu taamaassimappat. Tunniussinermut isumaqatigiissut nalinginnaasooq suliarineqassaaq. Piginneqataassummut akigititaq nalinginnaasumik pisartutut, naatsorsorneqassaaq.

Imm. 2-mut

Aalajangersagaq manna naapertorlugu siulersuisut tamatumunnga tunngavissaqarluarunik akerliusinnaapput. Tamanna immikkut pisoqarsimatillugu, tassalu inooqataasup piginneqatigiilluni inissiatillit peqatigiiffiata torersaarnissamut maleruagassaanik arlaleriarluni unioqqu-titsisimanagera uppersaatissaqarpat, imaluunniit piginneqatigiilluni inissiatillit peqatigiiffiata katitigaanerata eqqarsaatigineqarnissaa tamatumunnga tunngaviuppat pisinnaavoq.

§ 73-imut

Pisuni allani tamaginni piginneqataassutip tunniunneqarnera qanoq aammalu atugassarititaasut suut tunngavigalugit pissanersooq pillugu malittarisassani aalajangersakkat piginneqatigiilluni inissiatillit peqatigiiffiata aalajangersarsinnaavai. Piginneqataassutip tunniunneqarnerani akigititassaaq, § 67-imut siunnersuut malillugu akigititassamik naatsorsuinnermit qaffasinnerus-

sasoq, pillugu atugassarititaasut piginneqatigiilluni inissiatillit peqatigiiffiata aalajangersarsinnaangilai.

§ 74-imut

Imm. 1-imut

Siulersuisut piginneqataajunnaartussallu inissiamit nuunnissamut piffissaq kiisalu inissiap misissorneqarnissaanut, piginneqataasup ilisimasalimmik ilaqarluni peqataasinnaatitaaffigisaa-nut piffissaq, akunnerminni isumaqatigiissutigissavaat.

Piginneqatigiilluni inissiatillit peqatigiiffiata nalinginnaasumik immersugassaq assigiissaa-gaasoq, krydsilersuinikkut piginneqatigiilluni inissiap qimanneqarnerani qanoq issusianut ta-makkiisumik takutitsisussaq atorsinnaavaa. Illuatungeriit illersorniarlugit immersugaq siuler-suisut sinniisaannit taamatullu piginneqataasumit atsiorneqartariaqarpoq. Taamaattoq immer-sugassamik atuinissaq pinngitsaaliissutaangilaq.

Imm. 2-mut

Aalajangersagaq naapertorlugu siulersuisut piginneqatigiilluni inissiatip qanoq issusia, kiisa-lu suliassat, piginneqataajunnaartussap akiligaanik suliarineqartussat pillugit nalunaarusius-sapput. Piginneqataasup suliassat suut piginneqataasup akiligaanik suliarineqassanersut pillu-git siulersuisut akerlerippagit, tamanna nalunaarummi allanneqassaaq.

Piginneqataajunnaartussap akiligaanik suliassat annertuussusaat akerleriissutigineqarpat, siu-lersuisut kingusinnerusukkut uppersaatsissanik takutitsisinnaajumallutik pissutsit akerleriif-fiusut uppersaatsissatut assilisaqattaartariaqassavaat, taamaalilluni suliassat aaqqiagiinngin-nerup aaqinneqarnissaata tungaanut utaqqisinnagit suliarineqarniassammata. Pingaaruteqar-porli uppersaatsissatut assilisat tunngavigineqarnissaasa isumaqatigiissutigineqarnissaat, taamaattumik nalunaarusiaq tamatumunnga nalunaarummik imaqartinneqassaaq. Misissuiner-mi illuatungeriit peqataasimappata, misissuinermit nalunaarut tamakkiisoq illuatungeriinnit atsiorneqartariaqarpoq.

Imm. 3-mut

Aalajangersagaq manna naapertorlugu piginneqataasooq misissuinissamut takkutinngippat, mi-sissuinermit nalunaarusiaq siulersuisut piginneqataasup akiligaanik suliassangortitsinissamut tunngavissangortissinnaavaat. Piginneqataasup takkutinnginnera pissutigerpiarlugu misissui-nermit nalunaarusiaq illuatungeriinnit atsiorneqarsinnaangilaq. Taamaakkaluartoq misissui-nermit nalunaarusiaq tunngavissangortinneqarsinnaavoq.

Imm. 4-mut

Aalajangersagaq manna naapertorlugu suliassanut, piginneqataasup akiligaanik suliaritinne-qartunut aningaasartuutit tunisinermit iluanaarutinit ilanngaaticineqassapput. Aningaasartuu-

tit matussuserneqanngitsut piginneqataasup inissiamit nuuttup piginneqatigiilluni inissiatillit peqatigiiffiannut akilissavai.

§ 75-imut

Imm. 1-imut

Aalajangersakkami najoqqutassat, piginneqataasumut nutaamut, piginneqataassummik pisineranut aamma piginneqatigiilluni inissiatillit peqatigiiffiannut ilaasortanngorneranut atatillugu tunniutissallugit siulersuisut pisussaaffigisai taagorneqarput.

Imm. 2-mut

Aalajangersagaq manna naapertorlugu piginneqataassummik pisisup piginneqataassutip akiata nalinga piginneqatigiilluni inissiatillit peqatigiiffiannut akilissavaa, taassanilu pissarsiassaa-sinnaasut aningaasartuutaasinnaasullu ilanngaatigereernerini aningaasat sinneri piginneqataa-junnaartumut akilerneqassapput. Piginneqatigiilluni inissiatillit peqatigiiffiat avataaniit piler-suisumit, ukiumoortumik naatsorsuusiortartumit imermik ataatsimoorussamik imaluunniit innaallagissamik ataatsimoorussamik pisisarpat, piginneqatigiilluni inissiatillit peqatigiiffiat aningaasanik annikitsunik naammaattunillu, atuinermut naatsorsuutit saqqummiunneqarneri-nut atatillugu tapiutaasinnaasunut matusissutissanik piginneqataajunnaartup pissarsiassaant ilanngaassisinnaavoq.

Imm. 3-mut

Aalajangersagaq manna naapertorlugu tunniussinermi piginneqataalersup piginneqataajun-naartumut allanik isumaqatigiissuteqarnissaa piumasaqaatigineqarsinnaanngilaq, tassanili taa-maallaat pequtinik, immikkut piginneqatigiilluni inissiamut naleqqussarneqarsimasunik ik-kunneqarsimasunilluunniit pisineq pineqanngilaq. Aalajangersakkami pineqartut suunerinut killiliinermi peqqut pineqartoq aalaakkaasuunersoq aalaakkaasuunnginnorsorluunniit tunnga-vigineqassaaq. Tassani pequtit aamma atortulersuutit teknikkimut tunngassuteqartut tunngas-suteqanngitsullu, soorlu silaannarissaateqarfiit imaluunniit sikaaviit ikkussukkat eqqarsaatigi-neqarput.

Aalajangersagaq atituumik, aammalu isumaqatigiissutinut qanorluunniit ittunut tunngasutut paasineqassaaq. Tamatuma kingorna isumaqatigiissut alla, tunniussinermi piumasaqaateqarfi-usoq, assersuutigalugu nammineerluni allakkiatut oqaluinnarnikkulluunniit isumaqatigiissu-taasimanersoq apeqquataajunnaassaaq.

Aammattaaq erseqqissarneqassaaq, tunniussinissamut isumaqatigiissutinik allanik piumasa-qaateqarnissamik inerteqquteqarnermut sanilliullugu, allanik isumaqatigiissusiornissaaq iner-teqqutigineqanngimmat, tamatumani isumaqatigiissutit allat taamaallaat tunniussinissamut piumasaqaatinik nassataqassanngimmata.

§ 76-imut

Aalajangersakkami pisut, siulersuisut piginneqatigiilluni inissiatillit peqatigiiffianni ilaasortamik ilaasortaajunnaarsitsinissaannut pisussaaffiliisut taagorneqarput.

Aalajangersakkap atuutilerneratigut siulersuisuni nakkutilliisut piginneqataasup piginneqatigiilluni inissiatillit peqatigiiffiannut aningaasatigut iluarsisassai aammalu piginneqataasup Inatsisartut inatsisaannik matuminnga malinninersoq nakkutigissavaa.

Ilaasortap ilaasortaajunnaarsinneqarnera taamaalilluni makkuninnga inatsisitigut malitseqasaaq:

- Piginneqatigiilluni inissiatillit peqatigiiffianni ilaasortaaneq atorunnaassaaq.
- Piginneqatigiilluni inissiamik atuisinnaatitaaneq atorunnaassaaq.
- Inissiamit nuunnissamik pisussaaffiliisoqassaaq.
- Siulersuisut piginneqataassutip tuninissaa isumagissavaat.

Piumasaqarnermi piffissarititaasup naatsorsorneqarneranut arfininngornerit sapaatillu, aammalu nalliuttut ilaatinneqassanngillat. Piumasaqarnermi piffissarititaasoq piumasaqaatip allakkatigut tигuneraniit qaammammi ulluinnaat arfineq aappaata, 14-ata 30-atalu naanerani naassaaq.

§ 77-imut

Imm. 1-imut

§ 76 siulersuisut pisut ilaanni ilaasortaajunnaarsitsinissamut pisussaaffeqarnerannut tungasuuvoq, aalajangersagarlu manna ataatsimeersuartut qaqugukkut piginneqatigiilluni inissiatillit peqatigiiffianni ilaasortamik ilaasortaajunnaarsitsinissamik pisussaaffeqarneranut tungasuulluni.

Piginneqataasup qaammadini tulleriinni aqqaneq marlunni siulersuisunit malinninnissamik allakkatigut marloriarluni peqquneqartarsimagaluarluni, piginneqatigiilluni inissiatillit peqatigiiffiata torersaarnissamut maleruagassaanik malinnittussaanini sumiginnarsimappagu tamanna pissaaq. Aamma pissutsit ilaasortaajunnaarsitsinermut tunngavigineqartut attartortup, inissiami piginneqataasup atuisinnaatitaaffigisaani inimilluunniit ataatsimik attartorsimasup piussutigippagit, ilaasortaajunnaarsitsinissamut pisussaaffik atorneqassaaq.

Tassalu ilaasortaajunnaarsitsineq inatsisit malillugit atuuttussanik makkuninnga malitseqasaaq:

- Piginneqatigiilluni inissiatillit peqatigiiffianni ilaasortaaneq atorunnaassaaq.
- Piginneqatigiilluni inissiamik atuisinnaatitaaneq atorunnaassaaq.
- Inissiamit nuunnissamik pisussaaffiliisoqassaaq.

- Siulersuisut piginneqataassutip tuninissaa isumagissavaat.

Imm. 2-mut

Piginneqataasoq piginneqatigiilluni inissiap iluani aserfallatsaaliugassanik suliaqarnissamut siulersuisunit allakkatigut pingasoriarluni peqquneqartarsimagaluarluni suliassanik isumagin-nissimangippat, ataatsimeersuartut piginneqataasumik ilaasortaajunnaarsitsisinnaapput. Qaammatit tulleriit 12-it iluanni tamanna pillugu siulersuisunit peqqusissuteqarluni allakkiat marluk tunniunniarneqaraluareernerisa kingorna, ataatsimeersuarnermi piginneqataasoq ilaasortaajunnaarsinneqarsinnaavoq.

Ataatsimeersuarnermi piginneqataasoq ilaasortaajunnaarsinneqarsinnaavoq, kisianni tamatumunga pisussaaffiliisoqanngilaq. Aalajangersagaq ilaasortanik peersitsinissamik kissaateqarneq tunngavigalugu malersuinermit atorneqaqqusaanngimmat, ataatsimeersuartut aatsaat aserfallatsaaliuinnginnerup, illummut imaluunniit piginneqatigiilluni inissianut ataasiakkaanut ajoqusiisinaanera, aarlerinaateqarpat, ilaasortamik ilaasortaajunnaarsitsisinnaassapput. Aserfallatsaaliuinissamut suliassat annikinnerusut pingaaruteqanngitsullu pineqarpata, piginneqataasoq ilaasortaajunnaarsinneqarsinnaanngilaq.

Aserfallatsaaliuisimanginneq illuutip imaluunniit piginneqatigiilluni inissiat ataasiakkaat ajoqusernissanut aarlerinaateqarnersoq, ataasiakkaatigut nalilersuisoqassasoq, tassani anner-tuumik pineqarpoq. Piginneqataasup ilaasortaajunnaarsinneqarnera akuliunnerummat anner-tooq, ataatsimeersuartut suliame qularutissaqassanngillat. Taamaattoq aarlerinartoqarnersoq aalajangersakkami pingaartinneqarpoq. Aalajangersakkami ajoqusiinissaq ataasiakkaatigut annertuumillu navianaateqarnersoq, pingaartinneqanngilaq.

Imermut ruujori ussiitsoq piginneqatigiilluni inissiap ataaniittup natianik, toqqavianik imaluunniit qilaavanik ajoqusiisoqarsimatillugu tamanna qularutissaassanngilaq. Aamma siulersuisut aserfallatsaaliugassatut peqqussutigineqartoq suliarineqarsimanersoq suliarineqarsi-manginnorsorluunniit paasiniarlugu piginneqatigiilluni inissiamut iserniarneranni piginneqataasup itigartitsisimanera piginneqataasumik ilaasortaajunnaarsitsinissamut tunngavigineqarsinnaavoq.

Taamatut pisoqarsimappat, piginneqataasup aserfallatsaaliugassanik suliarinnitsissimangin-nera ilimagineqarsinnaavoq. Taamaattumillu taamatut pisoqarnera qanorluunniit suliaq iner-neqarsimagaluarpat ilungersuuttarialittut taaneqarsinnaavoq.

Pisut amerlanersaanni pissutsit ilungersuuttariaqannginnerit, taamaattumillu ataatsimeersuar-tut piginneqataasumik ilaasortaajunnaarsitsinissaannik pisussaaffiliinngitsut pineqartarput. Tamatumani allaat pissutsit utoqqatsissutissartallit pineqarsinnaapput, soorlu piginneqataasup aallarsimaneranik imaluunniit aallaqqasimaneranik, taamaattumillu marloriarluni allakkatigut peqquneqartarsimagaluarluni nammineerluni aserfallatsaaliuinissamut periarfissaqannginnera-

nik pissuteqartut. Taamaattoqartillugu ataatsimeersuartut piginneqataasumik ilaasortaajunnaarsitsisisariaqanngillat.

§ 78-imut

Imm. 1-imut

Aalajangersakkami ilaasortamik piginneqatigiilluni inissiatillit peqatigiiffiannit ilaasortaajunnaarsitsisarnermi periaatsit malitassat nassuiaatigineqarput. Aalajangersakkami peqqussut inatsisitigut atuutsinneqassaguni qanoq iliorluni piginneqataasumut tunniunneqassanersoq allaaserineqarpoq. Tassalu allakkat nassiunneqartussat marluussapput. Pissutsini § 76, nr. 3-mi aamma 4-mi taaneqartuni, peqqussut aamma piginneqatigiilluni inissiamut piginneqataasup atuisinnaatitaaffigisaanut siulersuisunut ilaasortat marluk nammineeurlutik tunniutissavaat. Piginneqataasoq pissarsiarineqarsinnaanngippat, siulersuisunut ilaasortat allakkap piginneqatigiilluni inissiamut, piginneqataasup atuisinnaatitaaffigisaanut tunniunneqarsimanera pillugu nalunaarut atsiussavaat. Nalunaarutip assilinera erngerluni piginneqatigiilluni inissiatillit peqatigiiffiata siulittaasuanut tunniunneqassaaq.

Imm. 2-mut

Aalajangersakkami paasissutissat, siulersuisut ataatsimeersuartulluunniit §§ 76 aamma 77 naapertorlugit nalunaarutaannut minnerpaamik ilaatinneqartussat taagorneqarput. Piginneqataasup ilaasortaajunnaarsinniarnegartup ilaasortaajunnaarsitsinissamut tunngavissanik tamakkiisunik, aammalu ilaasortaajunnaarsitsiniarneq akerlilernerqarsinnaanersoq pillugu misissuisinnaanissaa eqqarsaatigalugu aalajangersagaq ilanngunneqarpoq. Ilaasortaajunnaarsitsiniarnermik nalunaarut allagaassaaq, taamatullu paasissutissat ilaasortaajunnaarsitsiniarnermik nalunaarummut ilanngunneqartut allagaassallutik.

Imm. 3-mut

Aalajangersakkami atuisinnaatitaanerup kingusinnerpaamik qaqugukkut atorunnaarnissaa, tassalu piginneqataasoq qaqugu inissiamit nuussanersoq nalunaarneqarpoq.

Imm. 4-mut

Ilaasortaajunnaarsitsinissamik nalunaarutip nassiunneqarnerani suleriaaseq suna malinneqassanersoq ersarinnerulersinniarlugu, ilaasortaajunnaarsitsinissamik nalunaarutip atorsinnaassaguni tamatigut allakkatigut marlunnik assigiinnik oqaasertaqartunik nassiussinikkut pisassaaq, ataatsit allakkatut nalinginnaasutut aappaallu tammatsaalisatut piginneqataasup najugaani allakkanik tigusisarfianut nassiunneqartarnissaa aalajangersakkami allassimavoq.

§ 79-imut

Imm. 1-imut

Aalajangersakkami piginneqatigiilluni inissiatillit peqatigiiffianni attartortut imaluunniit inigisanik attartortinneqartut piginneqataasumik ilaasortaajunnaarsitsisarnermut tunngatillugu

piginneqataasumit pitsaanerusunik pinsinnaatitaaffeqannginnissaat aalajangersarneqarpoq. Tamatuma nassatarisaanik ilaasortaajunnaarsitsineq attartortumut imaluunniit inigisamik attartortinneqartumut toqqaannartumik atuuttussanngortinneqassaaq. Kommunalbestyrelsi imaluunniit inuinaq sanatitsisoq piginneqataasunnorsimappat, ilaasortaajunnaarsitsinermullu pissutaasoq suugaluarpalluunniit aalajangersagaq atorneqassaaq. Inissiamik attartortoq imaluunniit inigisamik attartortinneqartoq isumaqatigiissummik sumiginnaasimanngikkaluarpalluunniit, attartortitsinermut imaluunniit inigisamik allamut attartortitsinermut isumaqatigiissut atorunnaassaaq, inissiamik allamik neqeroortussaataitaanermik ilaqartinneqanngitsumik.

Inissianik attartortitsisarneq pillugu Inatsisartut peqqussutaanni maleruagassanut tunngatillugu, aalajangersakkap atuutilerneratigut kommunalbestyrelsip imaluunniit namminersortup sanatitsisup, ilaasortaajunnaarsitsineq innersuussutigalugu, attartortumut attartornermut isumaqatigiissut atorunnaarsissinnaavaat.

Imm. 2-mut

Piginneqataasup ilaasortaajunnaarsinneqartup attartortumi imaluunniit attartortitami ilisimatinnissaanik pisussaaffeqarpoq. Tassalu piginneqataasup ilaasortaajunnaarsinneqarneq pillugu attartortuni imaluunniit inigisamini attartortitani allakkatigut ilisimatittussaavaa. Ilisimatitsissummik nassiussinissamut pisussaataaffik aatsaat ilaasortaajunnaarsinneqarneq piviusunngorpat atuutilissaaq. Tassalu piginneqataasup peqquneqarnini naammassiniarnagu aalajangerpagu. Tunngaviatigut attartortup imaluunniit inigisamik attartortinneqartup peqqussuteqarnermut, ilaasortaajunnaarsinneqarnermik taamaalillunilu attartortitsinermut inigisamillu allamut attartortitsinermut unitsitsinermik kinguneqartussaannngitsumut tunngasorpiamik ilisimatinneqarnissaq soqutigisarinngilaat. Allakkatigut ilisimatitsissut piginneqatigiilluni inissiatillit peqatigiiffiata piumasqaataani piffissaliussap naaneraniit kingusinnerpaamik ulluinaat tallimat qaangiunnerini attartortup imaluunniit inigisamik attartortinneqartup najugaanut, allanik tiguisarfianut allakkatut nalinginnaasutut aamma tammatsaalisatut nassiunneqassaaq.

Imm. 3-mut

Paasissutissiisussaataaneq taamaallaat piginneqataasup taassumalu attartortuata imaluunniit attartortitaata akornanni pisuuvoq. Paasissutissiisussaataanerup isiginiarneqannginnera, piginneqataasup ilaasortaajunnaarsinneqarnerani, attartortup imaluunniit attartortitap piginneqatigiilluni inissiaq qimallugu nuunnissamut pisussaaffeqarneranut, pingaaruteqanngilaq.

§ 80-imut

Imm. 1-imut

Aalajangersakkami kommunalbestyrelsip taarsigassarsiarititaasa akiligassanngortinneqartarnerannut tunngaviusut taagorneqarput. Tassani tunngaviuvoq, pissutsit aalajangersakkami taaneqartut pitillugit kommunalbestyrelsip taarsigassarsiarititaat akiligassanngortinneqassasut, kisiannili pisuni aalajangersimasuni taarsigassarsiat akiligassanngortinneqanngiinnarnissaat aalajangissallugu kommunalbestyrelsi periarfissaqartoq.

Pisut ataatsimut isigalugit pisuni ataasiakkaani taarsigassarsiarititassat akiligassanngortinneqarnissaat iluaqutaanani artukkiinerusinnaavoq. Tamatumani pisup aalajangersimasup naliliiffigineqarnera tamatigut tunngavigineqartassaaq, aammalu pinngitsoorani immikkorluinnaq ittumik pisoqarsimassalluni.

Nr. 1-3-mut

Akiligassanngortitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu taakkununga atatillugu immikkut ittumik oqaaseqaateqartoqas-sanngilaq.

Nr. 4-mut

Inuinnaat piginneqatigiilluni inissiatillit peqatigiiffiitut kommunalbestyrelsip ingerlatsiner-mut tunngatillugu tunngaviatigut sunniuteqarfigninnaanngisaannik aningaasarpassuarnik uningasoqarpoq. Tamatuma nassatarisaanik pisortat, piginneqatigiilluni inissiatillit peqati-giiffianni akisussaassuseqanngitsumik ingerlatsisoqarneratigut aningaasaqarnikkut annaasaqa-ratarsinnaapput.

Nr. 5-7-mut

Akiligassanngortitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu tamatumunnga atatillugu immikkut ittumik oqaaseqaateqartoqas-sanngilaq.

Nr. 8-mut

Aalajangersagaq marlunnut immikkoortitaavoq. Tassalu piginneqatigiilluni inissiatillit peqa-tigiiffiata ukiumoortumik naatsorsuutit kingumoortumik misissortinngippagit, kiisalu piginne-qatigiilluni inissiatillit peqatigiiffiata ukiumoortumik naatsorsuutini kommunalbestyrelsimut taarsigassarsititsisunut nassiutinngippagit, tamanna akiligassanngortitsinissamut tunngavigi-neqassaaq.

Kingumoortumik misissuineq nunani tamalaani kukkunerisiuisut malitassaraat, kukkunerisiui-nermi iliuutsini aalajangersimasumik suussusilinni aammalu kukkunerisiuisup nalunaarutaanut aalajangersimasumik suussusilimmut atorreqartartoq.

Nr. 9-mut

Suliat ingerlasarnerini aalajangersakkap pisariaqarnera paasinarsisimavoq. Pisuni arlalinni paasineqarpoq, piginneqatigiilluni inissiatillit peqatigiiffianni ilaatigut aningaaserisup sulias-saminik isumagisaqarnissamut piginnaanerisa amigarnerat, ilaatigullu aningaaserisup aamma piginneqatigiilluni inissiatillit peqatigiiffiata kukkunerisiuisuata akornanni attaveqatigiinne-rup amigarnera pissutigalugit aningaasaqarnermik aqutsinerat naammattanngitsoq. Kukkuner-siuisup inerniliinera peqatigiiffiup naatsorsuutaannut tunuarsimaarfeqartumik saqqummiunne-qarpat, akiligassanngortitsisarnermut aalajangersagaq atorreqassaaq.

Nr. 10-12-imut

Akiligassanngortitsisarnermut tunngaviusartut amerlanersaat paatsoorneqarsinnaanngitsumik ersaripput, taamaattumillu tamatumunnga atatillugu immikkut ittumik oqaaseqaateqartoqas-sanngilaq.

Imm. 2-mut

Aalajangersagaq naapertorlugu taarsigassarsiat akilerneqartussanngorlugit atorunnaarsinne-qarnissaat sioqqullugu, kommunalbestyrelsip pineqartoq iluarseqqullugu qaammammik ataatsimik piffissaliillutik piginneqatigiilluni inissiatillit peqatigiiffiannut peqquissapput.

§ 81-imut

Imm. 1-imut

Aalajangersakkami piginneqatigiilluni inissiatillit peqatigiiffianni piffissap naatsorsuusiorfi-usup sivisussusissaa, kiisalu ukiumi naatsorsuusiorfiusumi siullermi, imaluunniit piffissaq naatsorsuusiorfiusooq allanngortinneqarpat qaammatit 18-it tikillugit sivitsuinissamut periarfissiineq nassuiarneqarput.

Imm. 2-mut

Kukkunersiuinerpiap akerlianik misissuinissaq kisimi piunasaqaatigineqarpoq. Tamatumalu nassatarisaanik kukkunersiuusup pisussaaffii annikillineqarput, kisiannili piginneqatigiilluni inissiatillit peqatigiiffiata aningaasaqarnikkut inissisimamillu paasissutissiisarnissaq pisariaqartinneqartoq qulakkeerneqarluni.

Piginneqatigiilluni inissiatillit peqatigiiffiat kukkunersiuusutut nalunaarsorsimasumik imaluunniit kukkunersiuusumik naalagaaffimmit akuerisamik atorfinitsitsissanerluni toqqaasinnaavoq. Taamaattumik inuk taamaallaat naatsorsuuserinermik ilisimasaqartoq, imaluunniit kukkunersiuusutut nalunaarsorneqartussatut kukkunersiuusutulluunniit naalagaaffimmit akuerisatut ilinniagaqarnerminik naammassinnissimangitsoq piginneqatigiilluni inissiatillit peqatigiiffianni kukkunersiuusutissallugu naammangilaq.

Inuit kukkunersiuusooqarfimmik ingerlatsinissamut akuersissummik arsaarneqarsimasut piginneqatigiilluni inissiatillit peqatigiiffianni atorfinitsinneqassanngillat. Kukkunersiuusooq kukkunersiuusup allattuiffiani allattuissaaq.

Imm. 3-mut

Piginneqatigiilluni inissiatillit peqatigiiffiata siusinnerpaamik kukkunersiuusumik atuinissamut pisussaaffeqarpoq, tassanilu piffissat marluk uku pineqarput: Piffissami pisinnaatitaaffiup nalunaarsorneqarnerani, imaluunniit piffissami piginneqatigiilluni inissiatillit peqatigiiffiata piginneqatigiilluni inissiaataanik atuilerfiusumi.

Imm. 4-mut

Aalajangersakkami Naalackersuisut piginneqatigiilluni inissiatillit peqatigiiffiata missingersuusiornissamut, ukiumoortumik naatsorsuusiornissamut, oqaasertaliinissamut kisitsillu pingaarnerit allattornissaannut, taakkulu inissititernissaannut maleruagassanik aalajangersaasinnaanerat tunngavissiuunneqarpoq. Assersuutigalugu kontunut pilersaarut immikkuullarissiq imaluunniit allattukkat immikkuullarissut aamma kisitsisit pingaarnerit aammalu aserfallat-saaliuinissamut il.il. illuartitat pillugit piumasaqaateqartoqarsinnaavoq.

§ 82-imut

Piginneqatigiilluni inissiatillit peqatigiiffiat, kommunalbestyrelsimit taarsigassarsinermigut piginneqatigiilluni inissianik pisisimasoq, pisussaavoq ukiumoortumik naatsorsuutit ataatsimeersuartunit akuerineqarneranni erngerluni ukiumoortumik naatsorsuutit assilinerinik kommunalbestyrelsimut nassiussissalluni.

Kommunalbestyrelsip ukiumoortumik naatsorsuutit piginneqatigiilluni inissiatillit peqatigiiffiannit akерlerineqarsinnaanani tigussavai. Aalajangersakkami piginneqatigiilluni inissiatillit peqatigiiffiat naatsorsuutinik nassiussinissamik pisussaaffilerneqarpoq, taamaalilluni kommunalbestyrelsi sukkulluunniit piginneqatigiilluni inissiatillit peqatigiiffiisa aningaasaqarnikkut inissisimanerat pillugu paasissutissinneqarsimassalluni.

Kapitali 13-imut

Kapitali 13 ilaatigut piginneqatigiilluni inissiatillit peqatigiiffiannik atorunnaarsitsisarnermut aalajangersakkanik nalinginnaasunik imaqarpoq, ilaatigullu piginneqatigiilluni inissiatillit peqatigiiffinik atorunnaarsinneqartunik, aammalu taamaattunut taarsigassarsitiseriaaseq immikkut ittoq atorlugu inissiatut nammineq pigisatut tunineqartunut maleruagassanik immikkut ittunik imaqarluni.

§ 83-imut

Imm. 1-imut

Piginneqatigiilluni inissiatillit peqatigiiffianni ataatsimeersuartut, piginneqatigiilluni inissiatillit peqatigiiffiata atorunnaarsinneqarnissaanik, aammalu piginneqatigiilluni inissiatillit peqatigiiffiata inissiaataasa inissiatut nammineq pigisatut tunineqarnissaannut aalajangiisinnaapput.

Ataatsimeersuartut sukkulluunniit atorunnaarsitsinissamik aalajangiisinnaapput, tamatumungalu maleruagassat nalinginnaasumik piginneqatigiilluni inissiatillit peqatigiiffiata malittarisassaani allassimasarput.

Piginneqatigiilluni inissiatillit peqatigiiffiata atorunnaarsinneqarnerani inissianik ataasiakkaanik piginnittuuneq piginneqataasunut ataasiakkaanut tunniunneqassaaq. Piginneqataasut piginnittuulissapput aammalu illuutillit peqatigiiffianni ilaasortaalissallutik. Taamaalilluni piginnaatitaasumit pisussaataasumillu (piginneqatigiilluni inissiatillit peqatigiiffianniit) inunnut aalajangersimasunik amerlassusilinnut tunniussineq pissaaq.

Imm. 2-mut

Aalajangersakkami erseqqissarneqarpoq piginneqatigiilluni inissiatillit peqatigiiffiata inissiatiminik inissiatut nammineq pigisatut tunisinissani aalajangerpagu, tamatuma piginneqataasunit tamanit taperserneqarnissaa piumasarineqartoq. Piginneqataasut ataatsimeersuarnermi peqataasut tamarmik siunnersuummut akuersinissaat naammangilaq. Assersuutigalugu piginneqataasut quliusimappata, qulit tamarmik akuersillutik taasisariaqarput.

Piginneqataasut aallaqqaammulli piginneqatigiilluni inissiamik pisiniarlutik aalajangersimasut, taakkulu tunngavigisaasa aserorneqannginnissaat illersorniarlugit aalajangersagaq ilanngunneqarpoq. Taakku piginneriaatsimut allamut nuunnissaannut, immaqalu aningaasanik amerlanerusunik inissiamut atuisussanngortinneqarnissaannik pisussaaffilerneqarsinnaassanngillat.

Imm. 3-mut

Aalajangersakkami atorunnaarsitsinerup inunnit marlunnik isumagineqarnissaa, taassumalu aappaata eqqartuussissuserisuunissaa, aappaatalu ataatsimeersuartunit toqqarneqarsimanissaa aalajangersarneqarpoq.

Imm. 4-mut

Atorunnaarsitsinermi naatsorsuutit inaarutaasut piginneqatigiilluni inissiatillit kukkunersiuisuanit kukkunersiorneqassapput, aammalu kommunalbestyrelsi piginneqatigiilluni inissiatillit peqatigiiffiannut taarsigassarsititsisuusimappata, taakkununga nassiuutissallugit.

Imm. 5-imut

Piginneqatigiilluni inissiatillit peqatigiiffiata atorunnaarsinneqarnerminut atatillugu, piginneqatigiilluni inissiatillit peqatigiiffiata atorunnaarsinneqarnissaminik aalajangerneqarnerata nalaani pisuussutai ilanngaaseriikkat piginneqataasut akornanni angeqqatigiikkaarlugit agguarneqassapput. Aningaasanik agguaassinermi piginneqataasut ataasiakkaat peqatigiiffimmi piginneqataassutaannut naligitaasut tunngavigineqassapput, tak. § 51, imm. 2.

§ 84-imut

Imm. 1-imut

Aalajangersakkami pisortat aningaasaleeqataassutissaat, inissianik nammineq pigisanik nutaanik pisisut pisinnaatitaaffigisaat nassuiaatigineqarput. Aalajangersakkami ilaatinneqarput

kommunalbestyrelsimit taarsigassarsiat inatsisissatut siunnersuut manna aqcutigalugu tunniunneqartut.

Taarsigassarsiat illuliortiternermut aningaasalersuineri Inatsisartut inatsisaat naapertorlugu kommunalbestyrelsimit taarsigassarsiat annertoqqataanik piumasarineqartullu assigalugit paarlaassinermut taarsigassarsiarititassanik taarserneqarsinnaapput, taamaattoq tak. imm. 2

Illuliortiternermut aningaasalersuineri Inatsisartut inatsisaanni aalajangersakkat paarlaassinermut taarsigassarsianut aamma atuupput. Tassani pineqarput nammineerluni akiliutinut, qularnaveeqqutinut, akilersuineriut ernialersuinerinullu, piginnittut nikinnerannut piginnittullu nikinneranni akiliummut, akiligassanngortitsinermut, akiliisussanngortitsinermut, qaavatigut akiligassanut, taarsigassat tunniunneqarnerinut kiisalu taarsigassat akilerneqarnerinut.

Imm. 2-mut

Paarlaassinermut taarsigassarsiat qanoq sivisutigisumik ingerlanneqarsinnaaneri imm. 2-mi aalajangersarneqarput. Annerpaamik ukiuni 20-ni ingerlanneqarsinnaapput. Piffissaq erniaqaranilu akilersuiffiusussaangitsoq annerpaamik ukiuni 10-ni ingerlanneqarsinnaavoq.

Piginneqatigiilluni inissianik peqatigiiffiup qaqugukkulluunniit aalajangiukkalarpagu atorunnaarsitsinissamik kiisalu inissiatut nammineq pigisatut tunisinermi paarlaassinermut taarsigassarsiat piginneqatigiilluni inissiani peqatigiiffimmut taarsigassarsiat kingusinnerpaamik pileqqaarnerisut assinganik ullulerlugit akilersorneqassapput.

Piginneqatigiilluni inissiat peqatigiiffiannut taarsigassarsiat Inatsisartut inatsisissaattut siunnersuut manna naapertorlugu katillugit ukiuni 45-ini sivisussuseqarpoq, taakkunani ukiut 30-it erniaqaratillu akilersuiffiussanngillat. Ukiut 30-it ingerlareerpata taarsigassarsiat ukiut 15-it ingerlanerini akilersorneqassapput. Ukiut 25-it ingerlareerneranni piginneqatigiilluni inissiaatillit peqatigiiffiat atorunnaarsinneqassappat paarlaassinermut taarsigassarsiat ukiuni 5-ini erniaqaratillu akilersuiffiunngitsutut tunniunneqassapput. Tamatuma kingorna taarsigassarsiat akilersorneqarnerat aallartissaaq. Taarsigassarsiat ukiut 10-t ingerlaneranni akilersorneqassapput.

§ 85-imut

Imm. 1-imut

Aalajangersakkami pisortat aningaasaleeqataassutissaat, inissianik nammineq pigisanik nutaanik pisisut pisinnaatitaaffigisaat nassuiaatigineqarput. Aalajangersakkami ilaatinneqarput kommunalbestyrelsimit taarsigassarsiat piginneqatigiilluni inissiat peqatigiiffii pillugit inatsisit siusinnerusukkut atuuttut tunngavigalugit tunniunneqartut. Taarsigassarsiat taakku erniaqanngitsumik akilersugassaangitsumillu tunniunneqarnikuupput, aammalu kingusinnerusukkut akilersorneqarnissaanik piunasaqaateqaratik.

Aalajangersakkami nassuiarneqarpoq pisortat akileeqaanerat, inissiamik nammineq pigisatut pisisup piumasarisinnaasaa. Aalajangersakkami nassuiarneqarpoq kommunalbestyrelsip Inatsisartut inatsisissaattut siunnersuut manna aqqutigalugu taarsigassarsiarititai.

Taarsigassarsiat illuliorititernermut aningaasalersuinermi Inatsisartut inatsisaat naapertorlugu kommunalbestyrelsimit taarsigassarsiat annertoqqataanik piumasarineqartullu assigalugit paarlaassinermut taarsigassarsiarititassanik taarserneqarsinnaapput, taamaattoq tak. imm. 2

Illuliorititernermut aningaasalersuinermi Inatsisartut inatsisaanni aalajangersakkat paarlaassinermut taarsigassarsianut aamma atuupput. Tassani pineqarput nammineerluni akiliutinut, qularnaveeqqutinut, akilersuineranut ernialersuinernullu, piginnittut nikinnerannut piginnittullu nikinneranni akiliummut, akiligassanngortitsineranut, akiliisussanngortitsineranut, qaavatigut akiligassanut, taarsigassat tunniunneqarnerinut kiisalu taarsigassat akilerneqarnerinut.

Imm. 2-mut

Paarlaassinermut taarsigassarsiat qanoq sivilutigisumik ingerlanneqarsinnaaneri imm. 2-mi aalajangersarneqarput. Piffissaq erniaqaranilu akilersuiffiusussaanngitsoq annerpaamik ukiuni 10-ni ingerlanneqarsinnaavoq, tamatumalu kingorna taarsigassarsiat angeqqatigiinnik aningaasartalerlugit ukiuni qulini akilersugassanngortinneqassallutik.

§ 86-imut

Aalajangersakkami inissiamik nammineq pigisamik pisisup piginneqatigiilluni inissiat inissiatut nammineq pigisatut tiguneqarneranut atatillugu aningaasartuutinut akiliisussaana aalajangersarneqarpoq, taakkununga teknikkikut siunnersorteqarnermut, aningaasaqarnikkut, aningaasalersuineranut inatsisilerituumillu siunnersorteqarnermut, allaffissornermut, aningaasalersuineranut, piginnittuuneranut uppersaatip aamma suliarineqarnerinullu aningaasartuutit ilaallutik. Naqissusiineranut akitsuutit pisisumit tuniniaasumillu assigiimmik agguarneqassapput.

Aalajangersakkami pisisup illuummik niueruteqarnermut atatillugu aningaasartuutissat annerpaartanik nammineerluni akiliisussaananeranut tunngavissat nalinginnaasut malinneqarput, tamanna annerusumik pisisup soqutigisaanut tunngassuteqarmat.

§ 87-imut

Imm. 1-imut aamma 2-mut

Aalajangersakkami piginneqatigiilluni inissiatillit peqatigiiffiata piginneqatigiilluni inissiatillit peqatigiiffiat atorunnaarsinniarlugu aalajangerpat, tamatumunngalu peqatigitillugu inissiat inissiatut nammineq pigisatut tunioqqarnissaat aalajangerneqanngippat qanoq pisoqarnissaa isummerfigineqarpoq. Piginneqatigiilluni inissiatillit peqatigiiffiata inissiaataat tunniussinissaq sioqqullugu pisortat attartortittakkatut inissiatigisimappatigit aalajangersagaq aatsaat a-

torneqassaaq. Taamaattumik piginneqatigiilluni inissiat, piginneqatigiilluni inissiaatillit peqatigiiffiata imaluunniit sanatitsisutut namminersortutut nutaatut sanatissimasaat pineqanngillat.

Aalajangersakkap ulluinnarni atorneqangaatsiarnissaa naatsorsuutigineqanngilaq. Aalajangersakkami piginneqatigiilluni inissiaataasimasut piginnittuusimasunut, tassalu Namminersorlutik Oqartussanut imaluunniit kommunalbestyrelsimut tunniunneqarlutik inissiatut attartortittakkatut nalinginnaasutut atorneqalernissaat aalajangersarneqarpoq. Piginneqataasut attartortutut inissiani najugaqaannarnissartik pisinnaatitaaffigaat.

Attartortitsisup attartortitsinissamik isumaqatigiissusiornermut tassunga atatillugu qaammatini sisamani inissiamik attartornermut akiliutissap nalinganik qaammammi ataatsimi attartornissamut siumoortumik akiliut, kiisalu qaammatini pingasuni attartornerup nalinganut assingusumik qularnaveeqqusiissut akiliisoqarnissaa piumasarisinnaavaa.

Imm. 3-mut

Aalajangersagaq piginneqatigiilluni inissiaatillit peqatigiiffiata atorunnaarsinneqarnerani peqatigiiffiup inissiaataasa inissiatut attartortittakkatut nalinginnaasutut atorneqalernerinut atatillugu Naalakkersuisut maleruagassanik aalajangersaanissaannut piginnaatitsissutaavoq. Aalajangersagaq ilaatigut piginneqatigiilluni inissiaatillit peqatigiiffiannut taarsigassarsiarititaasimasut aammalu piginneqatigiilluni inissiaatillit peqatigiiffiata piginnittunngortullu akornanni aningaasaqarnikkut iluarsisassat assigiinngitsut qanoq pineqarnissaat pillugit maleruagassanik aalajangersaanissamik periarfissiivoq. Aammattaq Naalakkersuisut aalajangersaasinaapput piginneqatigiilluni inissiat peqatigiiffianut taarsigassarsiat utertillugit akilersorneqarnissaat pillugit aammalu aningaasatigut akiligassat allat pillugit.

§ 88-imut

Siunnersuutigineqarpoq Inatsisartut inatsisaat ulloq 1. januar 2018 atuutilissasoq. Peqatigisaanik piginneqatigiilluni inissiat pillugit Inatsisartut peqqussutaat atuuttoq, atorunnaarsinneqarpoq.

Namminersornerullutik Oqartussat kommunillu inissiaataasa attartortittakkat teknikikkut aningaasatigullu naliliivigineqartarnerat pillugu Namminersornerullutik Oqartussat nalunaarutaat nr. 9, 12. maj 2003-meersoq, Inatsisartut inatsisaat manna naapertorlugu aalajangersaanikkut allanngortinneqarnissami atorunnaarsinneqarnissamilu tungaanut atuutiinnassaaq.

§ 89-imut

Namminersorlutik Oqartussanit taarsigassarsiarititat aammalu Namminersorlutik Oqartussat akiitsortitsisoralugu taarsigassarsiat arlalippassuupput. Inatsisartut inatsisaannut siunnersuummi matumani kommunalbestyrelsip aalajangiisartuunissaa, atsiornissamik akuersisarnissaa

maleruagassinneqarluni il.il., Inatsisartut inatsisaanni aalajangersakkat taamaaqataanik Namminersorlutik Oqartussat aalajangiisarnissaannut il.il., atuutiinnassapput.

§ 85 malillugu taarsigassarsianik taarsiisarnermut tunngatillugu kommunalbestyrelsi piginneqatigiilluni inissiatillit peqatigiiffiannut paarlaassinissamut taarsigassarsianik tunniussissapput, taarsigassarsiarititanut namminersorlutik Oqartussanit tunniunneqartunut. Kommunit Namminersorlutik Oqartussanit aningaasanik tunniussisarnerat aqputigalugu taarsiiffigineqasapput.

§ 90-imut

Maleruagassat 1. januar 2018 sioqqullugu atuuttut malillugit taarsigassarsititsinissamik neriorsuutit aammalu taarsigassarsiarititassat atugassarititaasut allannguuteqartinnagit ingerlatiinnarneqassapput, tamatumani aamma ernianut akilersuisussaataaanginnermullu piumasaqaatit ilanngullugit.

Taarsigassarsititsinissamik neriorsuut ulloq 1. januar 2018 sioqqullugu nalunaarutigineqartoq aammalu taarsigassarsiat ulloq 1. januar 2018 tunniunneqarsimanatik, qinnuteqaatigeqqinneqassanngilaq. Namminersorlutik Oqartussat taarsigassarsititsinissamik neriorsuummik tunniussisoqarniariartoq, aningasassat Sanaartornissamut Iluarsaassinissamullu aningaasaateqarfimmut illuartittarpai. Neriorsuut ulloq 1. januar 2018 sioqqullugu tunniunneqartoq tunngavigalugu taarsigassarsianik tunniussinissamut aningaasassat taamaalilluni Sanaartornissamut Iluarsaassinissamullu aningaasaateqarfimmiittarput aammalu Namminersorlutik Oqartussanit tunniunneqartarlutik.

§ 91-imut

Taarsigassarsititsinissamik neriorsuutit aammalu taarsigassarsiarititassat suli tunniunneqarsimanngippata, Inatsisartut inatsisaat manna malillugu neriorsuummik nutaamik aammalu maannakkut taarsigassarsititsinissamik neriorsuutaasumut taartissamik kommunalbestyrelsi qinnuteqarfigineqarsinnaavoq.